

FAASOLOGA MATAUPU VASEGA MATUTUA 2020

IANUARI:

26 Liliuina o le isi alafau Mataio 5: 38-42
(Aso Sa o Tupulaga)

FEPUARI:

2 Mafaufau loloto i le Afioga a le Atua
Iosua 1: 1-11
9 Alofa faamaoni Pese a Solomona 2: 1-17
16 Pe a faasagatau mai le lalolagi ia te oe
1 Peteru 1: 1-16
23 Molimau ola mo se faatuatua ola
2 Peteru 1

MATI:

1 Vaai ae i le lagi Salamo 8
8 Alofa i ou fili Esoto 23: 1-11
15 Aua e te taufaavalea Mareko 10: 17-27
22 O le agalelei atamai Salamo 112
29 O se amataga fou:ia avea e pei o tamaiti
Mataio 18:1-10

APERILA:

5 Ua toe fesili, 'O ai lenei?' Mataio 21:1-11
(Aso Sa o le Laupama)
12 Tafa ata i le ulua'i aso Mataio 28: 1-10
(Aso o le Toetu)

19 O lo'u mafaufau i le 3 i le vaveao
Kenese 19: 15-28
26 Tepa i tua, tagai i luma 1 Tesalonia 1

ME:

3 Au so'o o le taeao segisegi 1 Tesalonia 5:1-11
10 Savaliga i le faatoaga Kenese 3: 1-13
(Aso Sa o Tinā)
17 Savavali faatasi ma Iesu
Luka 9: 57-62
24 O a mea ua e va'ai atu i ai? Galuega 3: 1-10
31 Lauaufaiva afi Galuega 2: 1-13

IUNI:

7 Mauga ua mumu Teuteronome 4: 9-14
14 Ua tatala le faitotoa Mataio 7: 7-12
21 Faatuatua ma le fefe Mataio 8: 23-9:1
28 O le silafaga a le Atua ma lona agalelei
Kenese 1: 1-5

IULAI:

5 O le Atua faimalaga Numera 4: 4-16
12 O le tau o le saolotoga
Numera 11: 18-23,31-34
19 Aua le popole Numera 22: 1-14
26 Tali atu i le loto e tasi Esoto 19: 1-9

AOKUSO:

2	Fifilemu ma iloa	Salamo 46: 1-11
9	Malolo ane te isi (Aso Sa o Tamā)	Mareko 6: 30-32
16	Le nofoaga na amata ai	Luka 5: 1 -11
23	Filifiliga o Isaraelu	Roma 9: 1-5
30	O ala o le Atua	Roma 11: 25-36

SETEMA:

6	Aua le faalavelavea e le tasi i le isi (Aso Sa o le Tala Lelei)	Roma 14: 13-23
13	Sa'o pe sese	Teuterenome 18: 18-22
20	Aisea ua filifili ai le auala le saogalemu?	Luka 4: 14-21
27	O le valaaulia	Mataio 11: 25-30

OKETOPA:

4	Fai e oe	Mataio 14:13-21
11	Lotu Tamaiti	
18	Tapuaiga i luga o paneta (Marasa)	Kenese 1: 14-19
25	Atamai e fai ma faavae	Faataoto 3:19-26

NOVEMA:

1	Puapuaga ma le faamoemoe	Roma 5: 1-11
8	Valaauina o Ieremia	Ieremia 1: 1-10
15	Fa'aatoatoa e le na faia i tatou	Ieremia 18: 1-11

22	Toe amataina	Ieremia 30: 1-11
29	Mauga paia o le Atua	Esoto 19: 10-25

TESEMA:

6	E le i ai le Alii i le mafuie	1 Tupu 19: 9-18
13	Apefai a Iakopo	Kenese 28: 10-22
20	Faailoa mai le alofa o le Atua	1 Ioane 4: 7-19
27	Iloaina	Ioane 10: 11-18

ASO SA: 26 IANUARI 2020

MATAUPU: LILIUINA O LE ISI ALAFAU
(*Turning the other cheek*)

SINI: Ia a’oa’o tamaiti ia malamalama, i le uiga loloto o le fetalaiga a Iesu, lea e aumai ai le mataupu o le aso.

TUSI FAITAU: Mataio 5: 38 – 42

FESOASOANI MO FAIAOGA:

O le mataupu o lenei Aso Sa, e aumai mai le tusi o le Tusi Paia, tatou te tau so’o ane ai, a’e o se vaega o le lauga fa’aamuia a Iesu i luga o le mauga. E mafai ona tatou faaulutalaina le vaega sa faitauina e faapea, “O le a’oa’oga a Iesu, i le tali e tatau ona tali atu ai, i lē ua sauā mai.” (Teaching of Jesus about retaliation). E moni lava la o le auala faa-Iesu, o fai ma mamamu o lo tatou ola tali atu i mea faapea, a’o afifi mai ai ma le uiga loloto o le fa’aamuia a Iesu, i so o se tasi na te talia le ala ua ia a’oa’o mai, e tali atu ai.

O le tala o aumai ai le mataupu o le asō, o iloa mai ai, o lo tatou ola o fai nei, e tele sootaga o le faatuatua ma le faatinoga. “O le liliu atu o le isi alafau, pe a po mai le isi.” O le finagalo lea o Iesu ua tatou iloa, E tatau ona tatou nofo fealofani ma fegalegaleai faatasi, auā o tatou lava o le aiga e tasi i le Alii. O le tausiga la o lea fealofaniga, e tatau ona to’afilemu lo tatou va nonofo ai i aso uma. A po mai la lou alafau, o le uiga o le liliu atu i ai o le isi, i le finagalo o Iesu. O le ‘aua e te tali atu i ai i le po, auā o le taui ma sui le mea lena, e leai se filemu e maua ai, na o le vevesi atili. A e taua tele ona e iloa le mafuaaga o le po mai, a’e sili ona lelei lou liliu atu i ai o le isi. Aua o le avanoa lena ua e tu’u atu i lē na po maia oe, e malamalama ai ma iloa le pogai o lona ita, po o lona le fiafia.

A e faasaga foi i se tagata o ia po maia lou alafau, i lona lima taumatau po o lona lima tauagavale, a e liliu atu i ai le isi (180° turn) (180 tikeli le liliu) uma ona e liliu, ua u i ai lou tua i lea tagata, o le faailoga o le a e savali ese ma le filemu, ma lou le fia taui ma sui i le leaga ua fai mai.

A fua foi i maila e lua o ta’u mai mulimuli ane, ua sili atu ona faigata, nai lo le alu i le maila e tasi. E tutusa lava ma le lē faigofie ona tatou avatu fua mea totino a tatou mo isi, o se vaega o o tatou taimi, malosi, po o tupe foi. Peitai, o lo tatou faia o ia tulaga e tusa o le finagalo o Iesu, e le o so tatou fia lelei, pe ina ia alalaga mai tagata e viia tatou, ae faia ona o le Agaga o le Atua o galue i totonu o o tatou loto.

Tupulaga o tama ma teine talavou, o se lagona taua tele lea mo tatou, na te tomatauina o tatou loto ma lagona, mo la tatou savaliga umi o lenei tausaga ua amatalia. O le upu moni o a’oa’oga a le Alii e le faigofie, ae ua tatou talitonu i lo tatou Alii, o ala faigata tatou onosaia i le ola nei, e tatou te taunuu ai i se taunuuga manuia, ma faafiafiaina ai tatou, ae viia ai lona suafa. Tatou faamalolosi ma onosai e ui i ala ua a’oa’o mai e Iesu. Auā e le faatusalia ala fita ma le matuitui sa ia ui ai, lea lava na taunuu i lona maliu ai, ae na toe soifua mai manumalo, ina ia ta ola ma manuia ai. O le taulaga lea o le Faaolataga mo tatou ma le lalolagi uma, na te lei talia i lona toasa, a’o lona alofa faamaoni ma lona onosai.

GALUEGA FAATINO:

1. Fai sina faatinoga pu’upu’u lava o le tala.
2. Faavasega upu o tusia atu i lalo, i le vaega e tatau ona i ai, e fua i le tala ma lona uiga.

Vaega A - O lē sa poina le alafau

Vaega E - O lē na liliu atu le isi alafau

O upu nei – Faalii; loto ita, onosai; fulufulu lele, alofa, loto maulalo, faamaualuga, palaai, faamagalalo, filemu.

Tali: “A” - 1, 2, 4, 7
“E” - 3, 5, 6, 8, 9, 10

PESE: 23

A’OA’OGA:

1. Ia ia i tatou le filemu o le Atua.
2. Faamagalo atu, e fealofani ai.
3. Onosai i mea e tiga ai.

.....

ASO SA: 2 FEPUARI 2020

MATAUPU: **MAFAUFAU LOLOTO I LE AFIOGA
A LE ATUA** (*Meditate on God’s word*)

SINI: Ia a’oa’o tamaiti ia latou iloa le uiga tonu o le mafaufau loloto i le Afioga a le Atua, o le Tusi Paia lava lea.

TUSI FAITAU: Iosua 1: 1 – 11

FESOASOANI MO FAIAOGA:

E lei faigofie ia Israelu ma Iosua le oti, po o le tuua o i latou e Mose, le sa fai ma o latou taitai mo se taimi umi lava. E le gata o le mafutaga ua mafanafana ae ua tele foi mea taua ua latou a’oa’oina mai ia te ia. O Iosua, pei o ia le tagata mafatia tele; auā e le gata i le mafutaga mafanafana fai umi, a o lea foi ua filifilia ia e fai ma sui o Mose. I lona lava lagona, o ia o le tagata faatauvaa e le gata o lona filifiliaina, a o le taunuuga o le folafolaga a le Atua, e uiga i eleele o Kanana mo Israelu, o le galuega tele lena o le a gafa nei ma ia.

O le tofiaina o Iosua e fai ma taitai, o le Atua lava na ia filifilia. E i ai mea tatou te matauinagofie ai le lotu mau ma le faatuatua o Iosua i le Atua, atonu foi o le ala lea o lona filifiliaina. E le gata o ia sa auauna, sa fai ma lima taumatau o Mose i la latou malaga umi; ae toe toa lua i laua o ola pea, o fai ma faamaoniga pe sa vaai tino i mala i Aikupito, ma le o ese mai o le nuu. Na o Iosua foi ma Kalepo mai ituaiga e sefulu ma le lua, sa mau lo la talitonuga i le Atua, na te manumaloina le nuu. O ia lava mea e pei ona taua i luga, e iloga ai lava Iosua, ona o lona faamaoni e tumau ma usitai i le Atua. O lo o iloa i le tala, e faatolu ona fetalai le Atua ia Iosua, “e faamalosi ma loto tele.” Ua muai ta’u atu foi e le Atua ia Iosua, na te manumaloina nuu o Kanana, o le a la faatasi foi i aso uma, na te le tuua lava o ia. A o nei lavasiga ma aiaiga uma, e pei ona filifilia e fai ma taitai ma le galuega tele o taoto mai luma; o le autu lava e taoto i le f.8. “Aua nei tea i lou gutu le tusi o lenei tulafono.” O lona uiga, mafaufau pea ma teu i le lotu, ma mulimuli ai i tulafono uma a le Atua. O ana afioga lava nā e faavae ai le manuia, ma le taunuu saogalemu, o ala uma na te uia. Ua tatou iloa le tala i le soifuaga ma mea sa fai e Iosua, e oti lava o sologa lelei, ona o le tumau i le Atua. Tupulaga talavou, taua tele le faavaa lea o le ola mo outou aua o le manuia o aiga, nuu, malo ma Ekalesia, o outou le faamoemoega, mulimuli pea i le Atua ma lona finagalo e manuia ai. O Iesu foi, sa alu lava i le faalogo ma usitai, e tusa o le finagalo o lona Tamā, lea na tau tumutumu i le galuega o le faaolataga mo le lalolagi.

GALUEGA FAATINO: (Taliga Fesili)

1. O le a le folafolaga a le Atua ia Israelu, lea na taunuu i le taimi o Iosua?
- Tali: E fai mo latou tofi le nuu o Kanana, o tafe ai le susu ma le meli.

2. O le a le telē o le eleele lea o Kanana, o le a fai mo Isaraelu?

Tali: O le eleele atoa lava e soli e Isaraelu i lo latou ō atu, o le eleele uma lava lena. (f 3 – 4)

3. O fea na aumai ai le malosi o Iosua na ia taitai ai le nuu?

Tali: E aumai i le Atua le sa faalogo ma usiusitai i ai.

4. O le fuaiupu e fia o tautino mai ai, le iai o le Atua ia Iosua i mea uma e alu i ai?

Tali: f (9)

5. O ai le tagata lea sa na o ia ma Iosua tagata loto tetele i le asiasiga lea na alu o le laueleele? E le o taua i le tala, ae mate mai e oe!

Tali: O Kalepo

PESE: 174

A’OA’OGA:

1. Tausi i tulafono a le Alii ma mulimuli ai, e manuia ai.
2. Lototetele ma faamoemoe i le Atua, i o tatou valaauina.
3. Ia loto maulalo ma faatuatua i le Atua.

.....

ASO SA: 9 FEPUARI 2020

MATAUPU: **ALOFA FAAMAONI**
(Kiss me with the kisses of yours lips)

SINI: Ia a’oa’o tamaiti ia latou iloa, o le alofa faamaoni o le Atua, e le faailoga tagata, auā e a’oa’o mo tagata uma lava na Ia faia.

TUSI FAITAU: Pese a Solomona 1: 1 - 17

FESOASOANI MO FAIAOGA:

Ona o le tusi o aumai ai la tatou Mataupu o lenei Aso Sa, e le faigofie ona tatou faitau i ai ma malamalama. O lea o le a taumafai atu ai se faamatalaga e fai ma fesoasoani, e tau tatai ai o tatou mafaufau i le uiga o le pese, ma e o aofia ai, le mafuaaga, ma lona autu, pe fai ma fesoasoani mo lau susuga i le faiaoga.

O Solomona le atalii o Tavita le tupu o Isaraelu, o ia lea sa ia tusia lenei pese. O le ata o le faaipoipoga o faavae i le alofa faamaoni, e pei ona fai mai la tatou mataupu o le aso. O le pese foi, o le feofofoaiga i le va o le tupu ma le tamaitai, ma ana uo. O le tupu sa taamilo e vaai ma asiasi i ana togavine, ma atinae a le malo. E tau atu le asiasiga i le tasi aso, o punou lava se tamaitai lalelei i ana galuega i le togavine, ua uliuli lona pa’u i le galue fa’ala, a’e le solomuli i lona valaauina. Na lolofi atu tagata i lo latou tupu, ae faafuasei ona savali ese le teine, ona e matafefe, e le taualoa foi i lona lava manatu. Na foi le asiasiga, ae ua le te’a i le mafaufau o le tupu le tamaitai, ona toe alu lea i le isi aso, ma sa ia toe tau atu foi i le teine, o galue lava e leai se faavaivai. Sa tautino e le tupu i le teine, lona alofa iā ia, ma sa i’u ina manumaloina e le tupu lona loto, ona la malaga lea i Ierusalema i le maota o le tupu; ma sa faatasia ai i la’ua mulimuli ane i le faaipoipoga.

O la tatou tusi faitau, ma le tusi atoa lava “Le Pese a Solomona; e matuia lona i ai i le Tusi Paia i la tatou lava faitau, ona o upu fa’aogaina o lana gagana. I le f.2, o upu amata ia o lenei pese, O le tamaitai o manao e kisi mai lana uo iā ia; Peitai o le aotelega o le pese, o aumai ai le ata o le alofa faamaoni o le Atua, i le auauna lelei ma le faamaoni, e pale i manuia ma valaauina foi e lona Matai la te faatasi ma ia i lona maota. Lea na fetalai ai Iesu; “Le auauna lelei e ma le faamaoni, ulufale maia i le fialia o lou Alii.”

O le Alofa o le mea alofa a le Atua, e sili atu ona mananao i ai tagata, na i lo le uaina o ta'ua i le (f.4). O le tovine o ta'ua i le (f.6.) e mautinoa o le faatoaga a le tupu, na tofia nisi latou te tausia, o i latou ia sa faafaigaluegaina le teine. Lea lava sa vaaia lelei e le teine i le vevela o le la. Fai mai le tamaitai, “a’o lo’u lava tovine, ou te le i leoleoina,” o faasino iā ia lava, na te lei puipuia lona lava tagata, ae sa faamaoni e tausii le tovine o le tupu, i le vevela o le la, lea e mafua ai ona uliuli lona pa’u. Lona uliuli lea ua ese ai ona lagona ina ua oo i le maota, auā o tamaitai o le aai ma le maota, e sasa’o o latou lauao, momosi o latou tino, toe papae o latou lanu, ma foliga e silisili lo latou lalelei. Ae mo Solomona lava ia, sa sili lona alofa i le lalelei o le auuana faamaoni, nai lo le lalelei o le tino.

Sa lagona lava e le tamaitai lona le atoatoa pe a tuua na o ia i le maota, o le ala lea o lona naunau ai lava i lona malu puipuia. O le Alofa lava la ma le faamaoni, o ala ia na te aveesea le fefe, e le toe i ai se faaleaga ma se taotaomia. Lea lava na faamautu le alofa e ala i le ofoina atu atoa e le tupu o ia lava, la te faaipoipo ma le tamaitai. Ona avea ai lea lo la fanua lafulemu, ma moega uluola e fua mai i manuia o le alofa faamaoni. Le alofa lena tupulaga o teine ma tama, sa iloa i le taulaga faaola na ofo atu e Iesu, e ala ia Ia lava, mo tagata uma, ina ia saogalemu ma ola.

Uiga o Upu ma faitau:

- i) Fale ie o kitara (f.5) - O kitara, o le igoa lea e ave i tagata Arapi i Matū, tagata feoi solo e le nofomau i se nofoaga e tasi. (Nomadic people); Ae lauiloa i ō latou fale ie, e lalaga mai le fulufulu oti lanu uliuli.
- ii) “Matou te faia mo oe ni pale auro, e ema i ario” (f.11) O le upu ema, o lona uiga o le teuteu. O pale auro e teuteu i ario.

- iii) nato (f.12) O le igoa o le suauu manogi. (O le u’u nato)
- iv) tautega (f.12) talisuaga/taumafataga
- v) pulu muro (f.13) O le muro o le laau manogi, o lona pulu e fai ai le u’u (U’u manogi) se tasi o mea-alofa mo Iesu i lona soifua mai.
- vi) fuifui kofero (f.14) Kofero o le laau foi, e le gata ina manogi manaia, ae matagofie foi.
- vii) utupoto (f.17) O laau tetele o fai ma loka malolosi o le fale i totonu, e ese mai amopou ma taofi.
- viii) Perosi (f.17) O le laau tupu tele, sa ola tele i Lapanona, sa fa’aaogā e tata ai vaa.

GALUEGA FAATINO:

1. Fai sina faatinoga pu’upu’u e fai ma vaaiga e faamanino atili ai le Alofa faamaoni.
2. Saunia e lau susuga ni nai fesili, e faamalamalama atili ai la tatou Mataupu.

PESE: 73

A’OA’OGA:

1. Ia faamaoni le alofa atu i le isi tagata.
2. E fiafia le Atua i le galue faamaoni.
3. E le faailoga tagata le Atua.

.....

ASO SA: 16 FEPUARI 2020

MATAUPU: PE A FAASAGATAU MAI LE LALOLAGI IA TE OE. (*When the world turns against you*)

SINI: Ia malamalama le vasega, pe a faasagatau mai le lalolagi ia te oe, o le Agaga o le Atua, e te faalagolago i ai, o le auupega lea e te manumalo ai.

TUSI FAITAU: 1 Peteru 1: 1 – 16

FESOASOANI MO FAIAOGA:

O le faasagatau mai o le lalolagi ia te oe ma au ma tagata uma, na amata mai lava ina ua uma ona foafoa le lalolagi. Na pau ai le uluai tagata ma faoa le pule e le alii o le lalolagi, ma faasagatau ai i le Atua. Ua agasala tagata uma, ma ua i lalo o le pule a le alii o le lalolagi, ua leai se tagata e agavaa i le afioaga mamalu o le Atua.

Na amata ai i lea lava taimi, ona galue mai le Atua mo lana galuega faaola mo le lalolagi uma. O lona finagalo alofa i ona tagata i le lalolagi, ina ia toe maua le mafutaga mafanafana ma Ia, na Ia tuua ai lona nofoalii e ala i lona Atalii pele e toatasi, ua Afio ifo mai le lagi, ina ia faaolaina le fanau a tagata ia te Ia.

Ia malamalama tamaiti ma tagata uma, o mea uma e matuā lelei lava, e fanau mai i le Atua. E pei ona molimauina i le foafoaga aoao. Na mae'a loa ona faia e le Atua le tagata, ua silasila atu i mea uma na Ia faia, ua matua lelei lava. O lona uiga e matua le talia se mea leaga i totonu o lona afioaga.

O le Afio mai o Iesu Keriso le Alo e toatasi o le Atua i le lalolagi, o le atoaga lea o lana galuega faaola mo tagata uma. Ia fanaufouina tagata uma i le Agaga Paia, ina ia liliuina lo latou loto naunau i le lalolagi ma ona tuinanau, a ia fai tagata uma ma fanau a le Atua ua paia i amio uma.

O le tatou mataupu i lenei taeao, 1 Peteru 1: 1 – 16, o lo o faamalosi au atu ma faamafanafana atu ai le Aposetolo, i le au Kerisiano uma o taape ma salalau i Pono, ma Kalatia, ma Kapatoikia, ma Asia ma Pitumia. O le vaega lea o le lalolagi, ua faaigoa o Asia Itiiti. O le galuega a le Agaga Paia, i le taimi na afio ifo ai i Ieruselema i le Aso Penetekoso. O i latou tagata Asia Itiiti na faalogologo i le lauga a Peteru, ma le mata'utia o le Agaga Paia i lea aso, na foi mai ma latou faasalalau le Tala Lelei a Iesu Keriso ma le faaolaina o tagata uma ia te Ia.

Ua faafetaia ai le Atua, le Tamā o lo tatou Alii o Iesu Keriso, o le na liliuina i tatou e lona Agaga Paia, ma fai ai tatou ma tagata fou, ona o le mana o le Alofa Tunoa, ina ia i ai i tagata uma le faamoemoe ola, i le Toetu mai o Keriso mai le oti, ina iu tagata uma i le faaofuina i le tino ua fanaufouina e le Agaga Paia ma ola ai lava e faavavau.

Ia outou iloa lenei mea, o i latou ua fanaufouina e le Agaga Paia, e na te leoleoina foi i latou i le faatuatua ua mausali, e taunuu foi i le faaolataga tele ua saunia i ona po o le toe Afio mai o Keriso. Ia outou mautinoa foi lenei mea, o i latou uma lava ua fanaufouina e le Agaga Paia, o le a matua faasagatau mai i ai le lalolagi ma ona taitai. E matua sauaina ma puapugaina outou, ia outou loto tetele, ia matua maua'a lo outou faatuatua, aua ua na o si taimi puupuu tou te tauave ai ia tiga. O le tofotofoga lava lea o lo outou faatuatua, ma o lo outou faatuatua ua maua'a ia Iesu Keriso, e silisili atu lea i le auro. Aua o le auro o le mea a le lalolagi, a o le faatuatua i le Atua le Tamā o lo tatou Alii o Iesu Keriso, e na te aumaia le olioli loloto ma lona filemu, ina ua tatou taunuu i le malologa lelei e le toe i ai lava ma se mea tiga.

E ui ina outou le vaai Iesu Keriso i le tino, a ua alolofa pea ia te Ia, ona o le faatuatua, tou te olioli ai ma le fiafia o le loto ua faamalieleina i mea lelei ua saunia e le Agaga o lona Alofa Tunoa. O le tamaoiga lenei o le Atua, ma ana faamanuiaga na sailia e le au Perofeta ma Israelu i le Feagaiga Tuai, na latou valoia mai le Alofa Tunoa o le Atua mo tagata uma, o lenei ua oo mai ia te outou. O le Alofa Tunoa lea o le Atua e ala ia Iesu Keriso,

ua fanaufouina le lalolagi uma, ma avea ai tagata uma ma fanau a le Atua i le faatuatua ua le maluelueina.

O le mea lea, a faasagatau mai le lalolgi ia te outou, ia outou olioli ina ua outou tumau i le faatuatua i le Atua le Tama o lo tatou Alii Faaola o Iesu Keriso, o Ia na fanaufouina i tatou i lona Agaga Paia, ma avea ai tatou ma tagata fou mo le malo o le Atua.

O le uiga lea o le tatou mataupu ma le feau mo lenei Aso Sa. Ia tatou iloa e le fiafia mai tagata o le lalolagi ia i tatou, pe a fanaufouina i tatou e le Agaga Paia. Aua ua paia a tatou amio uma. E pei ona fetalai le Atua, “*Ia paia outou, auā o A’u nei e paia lava.*”

Ia tatou faamalolosi ma finafinau i le faatuatua, aua o i le lagi lo tatou tau e tele. O Iesu Keriso i lona Alofa Tunoa tele ua afio mai i le lalolagi, ina ia fanaufouina i tatou i lona toto na maligi ifo i luga o le satauro, ua faatautauina faatasi ma tatou tagata tuai, ina ia avea i tatou ma tagata fou i lona Toetu manumalo ua iu ai i tatou i le tofi e le pala, e leai se leaga o i ai. Ia manuia lenei Aso Sa.

Uiga o Upu:

- i) sa’aluuga - sasa’a atoa
- ii) tofi e le pala - faatautu i le tino o le tagata ua fanaufouina

GALUEGA FAATINO:

Ta’u mai ni au gaoioiga se tolu e te faia e tali atu ai pea faasagatau mai le lalolagi ia te oe.

PESE: 234 (Pese ma Viiga – Pe a ita tele mai)

A’OA’OGA:

- 1. Ia maua’a le faatuatua.

- 2. O tua atu o tigā, o lo o i ai le olioli
- 3. Ia faafetai ia Iesu, ona o lona Agaga Paia.

.....

ASO SA: 23 FEPUARI 2020

MATAUPU: MOLIMAU OLA MO SE FAATUATUA OLA (*Living memory for a living faith*)

SINI: Ia malamalama le vasega o galuega lelei e te faia ma faia e isi tagata, o molimau ola ia e tupu ma ola ai pea le faatuatua o isi tagata, e ui ina ua le vaaia i latou i lenei ola.

TUSI FAITAU: 2 Peteru 1: 1 – 12

FESOASOANI MO FAIAOGA:

O molimau ola lava, e sili ona tumau i loto ma mafaufau o tagata aua e manuia ai ma maua ai e tagata uma le ola fiafia i aso uma. E pei ona fai mai le tusi a Failauga 7: 1, “E sili ona lelei o le ta’uleleia i le suauu lelei.” O galuega lelei e faia e tagata, e manatua pea ma sili atu lona manogi nai lo le suauu lelei. E fai ma taitaiga i tagata e naunau ai pea e faatino galuega lelei. Ua tumu le Tusi Paia i faamaumauga o galuega lelei a tagata na fai o lo latou faatuatua, aemaise ai lava le galuega o le faaolataga a le Atua mo le lalolagi ma ona tagata uma.

O lea lava ua tatou molimauina ai le Afio mai o le Atua le Tama, e ala i lona Atalii pele e toatasi i le faatinoga o galuega o lona Alofa Tunoa mo le lalolagi agasala. O molimau ola ia, e tupu a’e ai pea ma ola ai le faatuatua. O le uiga lea o le tatou tusi faitau i lenei taeao 2 Peteru 1: 1 – 12, o loo matua faamalosi atu ai le Aposetolo o Peteru i Kerisiano uma o salalau i Asia

Itiiti. O Kerisiano ua fememea'i ona o talaiina sese o le talitonuga faa-Nositika. Fai mai e le taua le tino, ua na o le agaga. E tusa lava po o a agasala e faia e le tino, e le afaina aua e le o aafia le agaga. Ua avea talaiga sese nei, ma mea ua fenumia'i ai le ola faatuatua o Kerisiano i Asia Itiiti.

A ua faamalosi atu Peteru, i lona faafeiloai atu i upu nei, o outou ua maua le faatuatau e tusa lelei ma i matou nei. O i matou o molimau ola, na matou vaai tino i galuega o le Alofa Tunoa o le Atua e faatatau ia Iesu le Mesia na valoia. O molimau ola ia mo lo matou faatuatua ua ola, o lea foi ua matou naunau atu ai ia te outou o molimau ola mo lo outou faatuatua ola. Ia faula'i ia te outou le alofa tunoa ina ia manuia outou, ina ua outou matua iloa lelei le Atua ma le Alii o Iesu.

O i matou ma outou ua fanaufouina e le Atua le Tamā e ala ia Iesu Keriso ma lona Agaga, ua tatou i ai faatasi uma i totonu o lona aiga paia. Ia alualu i luma lo outou faatuatua e atili ai ona outou iloa lelei le Atua, e oo ai i le ola ma le amio Atua.

O nei mea uma ua matou folafola atu, ina ua matou mautinoa le silisili ese ma le aoga ia te outou ma i matou nei. Ia outou sosola ese i le amio leaga o i lalolagi i le tuinanau. Ia outou matua faamalosi ina ia tupu tele lo outou amio lelei i aso uma, e iu ina fai ai ma masani le iloa o le amio lelei. E fua mai ai fua o le Agaga ma fai outou ma tagata ua faapaiaina.

O le atugaluga o le Aposetolo o Peteru, ua latalata mai ona itu aso e tuua ai le lalolagi. Ua ia pulunaunau atu ai i le au Kerisiano, ina ia matuā alualu i luma le faatuatua, le amio lelei ma le amio Atua, ina ia mautinoa le faaolaina o agaga o le au uso Kerisiano uma. Ua ia tautino atu ai lona le faatamala ina ia mautinoa le nofo mau o le Agaga o le Atua i le au uso, ina ia manumalo pea Keriso i o latou olaga.

Ua tautino atu ai Peteru i le au uso, ina ia latou lafoa'i tala o le vavau ma tala tu'u, a ia latou faasaga tasi i le Atua ma lona Alo o Iesu Keriso ma le Agaga Paia, ina ia mafai ona latou iloa le amio lelei ma le amio Atua. Ia aoga lo latou ola e fai ma molimau ola mo ni faatuatua ola. Ia iu foi lo latou ola e fai ma viiga o le Atua ma faateleina pea lona mamalu.

O le feau foi lea ma se a'oa'oga o le tatou mataupu i lenei Aso Sa. Ia tumau lo tatou loto fiafia i le Atua ma lo tatou Alii Faaola o Iesu Keriso, na te faailoa mai amio lelei tatou te faia i aso uma o lo tatou olaga. Ia naunau o tatou loto e faatino galuega lelei ma fai le amio lelei a o tatou ola, ina ia fai ma molimau ola mo nisi e ola ai ma iu atu ai i le faaolaina o agaga i le ola faavavau. O Iesu Keriso o le molimau ola mo faatuatua ola, ua faaolaina ai i tatou uma e ala i lana galuega faaola mo le lalolagi uma.

GALUEGA FAATINO:

Ta'u mai ni amio se lima o lo o ta'u mai e le tusi faitau, tatou te faia, ina ia faia ma molimau mo se faatuatua ola.

PESE: Pese ma Viiga 146

A'OA'OGA:

1. Ia fai le amio lelei.
2. Ia faatino galuega lelei.
3. Ia aoga lou ola e fai ma molimau ola mo se faatuatua ola.

.....

ASO SA: 1 MATI 2020

MATAUPU: VAAI A'E I LE LAGI
(Look at the Heavens)

SINI: Ia malamalama le vasega, o le vaai ae i le lagi, o le afioaga o le Atua, a o tagata uma o i le lalolagi e tutusa uma i lalo o lana pule aoao, o lona Alofa Tunoa.

TUSI FAITAU: Salamo 8

FESOASOANI MO FAIAOGA:

O le Salamo lenei e valu, o mafaufauga loloto ma lagona tutupu a'e o le faisalamo. Ua o se pese malie ua ia fatuina, e faamatalaina le Atua soifua i lona tulaga silisili ese e faatusa i le tagata na Ia faia.

Fai mai la tatou mataupu i lenei Aso Sa, "Vaai a'e i le lagi." Aisea e vaai ae ai i le lagi? Aua o lou vaai ae i le lagi faalemafaufau loloto, ma le loto ma le agaga ua fia inu i le Atua, ona e lagonaina ai lea o le Atua e silisili ese ma lana pule aoao o i ai le alofa ma le amiotonu.

O le vaai a'e i le lagi a le Faisalamo, ua ia vaaia ai le tulaga maualuga ma le mamalu silisili ese o leAtua. Ua osofia ai lona agaga e pese ma vivii, ma tautino mai i tagata uma i le gagana a Eperu, e silisili lava le suafa o le Alii le Atua i le lalolagi uma.

E le tausailia se viiga o le Alii le Atua mai i tagata. E alalaga mai lava ma fai pesega mea uma na Ia faia le Alii le Atua. O i latou uma foi ua fanaufouina i le mana o lona Alofa Tunoa ua faatumauina viiga i o latou gutu. O tagata uma o pepe fou i le ola faatuatua, ina ua feliuaina e le Agaga o le Alofa Tunoa o le Atua, e fai pesega i viiga i lona mamalu.

O le vaai ae foi i le lagi a le Faisalamo na molimauina ai o mea uma ua faia i le lagi, o galuega o aao o le Alii le Atua, ua ia faia i lona Alofa Tunoa ma lona alofa mutimutivale i le fanau a tagata i le lalolagi. Ua ia valaau ai i le Alii le Atua, "O ai ea le tagata e te manatu mai ai ia te ia, ma le atalii o le tagata e te asiasi mai ai? Ua oo lava ina ua e faamaualalo te isi ifo i agelu. Ua e tuuina mai foi le pule i galuega uma a ou aao, ma faapaleina foi i le mamalu ma le matagofie auā ua e tuuina mea uma i lalo ona vae.

O le manatu o le Faisalamo i lona vaai ae i le lagi, e le mafai lava ona momotuina e le Atua lana fesootaiga tumau ma le tagata. Aua o lo o i le tagata mea patino i le Atua i le lagi. O lona faatusa na Ia faia ai le tagata, ma lona Agaga ola na manavaina ma ola ai lava le tagata.

O le manatu o le Faisalamo, o tagata uma ua fanaufouina e le Agaga o le Alofa Tunoa o le Alii le Atua, latou te maua faamanuiaga e pei ona taua i le fuaiupu 4 – 8. E ui lava ina faamaualalo te isi le Atua, e le faitauina tutusa o Ia ma le tagata. Aua foi o le tagata lava ia o le tagata, o le Alii le Atua, o le Atua lava.

O le vaai ae i le lagi a le Faisalamo, na ia lagona ai le pule aoao a le Atua e tutusa ai tagata uma. E le faailoga tagata le Alii le Atua. O le tagata lava o le tagata, e alofa fua tutusa i ai le Atua. E leai se mea e faasinoinomia ai e le isi tagata le isi uso a tagata. Pe e te mativa ma maualalo ma vaivai, ia e vaai ae i le lagi, ona e iloa lea e tutusa tagata uma i lona alofa tunoa.

O le pese lea a le Faisalamo na ia fatuina, e fai ma viiga, ma ana taulaga faaeaea i le Alii le Atua. A o se valaau alofa mo tagata uma, ia vaai ae i le lagi tatou te iloa ai le Atua ma lana pule aoao, e tu maualuga ai lona alofa tunoa, e laugatasia ai tagata uma.

Ua na o Iesu Keriso lava le tagata, ua ia ausia faamanuiaga e pei ona aumai i lenei Salamo. Aua foi e na te lei faia lona loto, a ua galue mo le faaolaina o tagata uma, ma avatu le viiga ma le mamalu i le Alii le Atua. O lona taunuuga, ua tuuina atu le pule i le lagi ma le lalolagi, ma ua tuuina mea uma i lalo o ona aao. O le vaai a'e i le lagi o Iesu i taimi uma, na faalagolago ai i le Atua, ina ia mafai ona faaolaina tagata uma ia te Ia.

O le a'oa'oga lea ma le feau i le tatou mataupu i lenei Aso Sa. Ia tatou vaai ae i le lagi, o lo o afio ai le Atua, o lana pule aoao e tutusa ai tagata uma i lona alofa tunoa.

Ia 'aua nei o tatou faailoga tagata. Ia tutusa lou alofa i tagata uma, e pei o Iesu Keriso na maliu mo tagata uma, ua Toetu mai i le ola fou faavavau, ua tatou ola ai foi faatasi ma Ia. Ia manuia lenei Aso Sa.

GALUEGA FAATINO:

Ia tusi mai se solo, i ni lagona tutupu ae, a o e vaai ae i le lagi i se taimi o le aso po o le po. **“A ou vaai a’e i le lagi”** Tau o le 2 fuaiupu, 4 laina i le fuaiupu.

PESE: Pese ma Viiga 5

A’OA’OGA:

1. Aua le faailoga tagata.
2. Ia avatu le viiga i le Atua.
3. E silisili lava le Suafa o le Atua i le lalolagi uma.
4. Ia vaai a’e i le lagi.

.....

ASO SA: 8 MATI 2020

MATAUPU: **ALOFA I OU FILI**
(Love your enemies)

SINI: Ia malamalama le vasega, e tāua le faasoa ma alofa autu i ou fili ma e matitiva.

TUSI FAITAU: Esoto 23:1-11

FESOASOANI MO FAIAOGA:

O le mataupu o lenei aso Sa, o lo o i ai i le tulaga o se faatonuga, o se faamanatu, po se a’oa’oga e moomia le faaauau ona faatinoina. O le alofa foi i ou fili, o se faatonuga e matuā faigata lava ona faatino. Leaga o le fili, e leai lava se mea lelei e tupu mai ai. O sē ua fai ma ou fili, o le tagata ua e ita i ai, ma ua e lē mana’o i ai. E seāseā lava ona tupu i le tagata lenei mea o le

alofa i le tagata ua fai ma ou fili, po o le tagata ua e ita ma e lē fiafia i ai.

O le tusi faitau o lenei aso Sa, o se vaega o faamasinoga ma tausamiga sa fai ma tulafono e ta’ita’iina ai le nuu o le Atua, a’o i ai i le vao. Ma e mafai ona vaevaeina i ni vaega se tolu.

Esoto 23:1-3 O faatonuga ina ia usita’i i le tulafono, ae le o tagata (Commands to respect the law, not the crowd).

O nisi o faatonuga tuusa’o, pei ona i ai **‘aua** e lima (5) o lo o i ai. **“Aua** e te sii le tala fatu fua. **Aua** foi le au faatasi ma le tagata amio leaga. **Aua** e te mulimuli atu i le toatele e fai le amio leaga. **Aua** foi e te tali atu i se finauga. **Aua** e te ava i le tagata mativa i lana finauga.

Esoto 23:4-9 O le tulafono e faamapu’epu’eina le alofa ma faatonu e le amio lelei.

O le manaoga lea o le Atua i tagata o lona nuu, ina ia faavae i le alofa i le tagata mativa, aemaise o le tulaga i le tau atia’e o le tagata lava ia, a o i ai i le ala ina ua o ese mai Aikupito. O le ala lea o le faia ai o le tulafono ina ia fai ma ta’ita’i tama po o se faatonu i le olaga o so o se tagata Isaraelu.

Esoto 23:10-11 O nisi o aiaiga faa-Sapati.

O le Sapati faa-le-tausaga, e faatatau lea i le laueleele po o le fanua e galueaina e se tasi. O se tulafono o lo o atagia ai le moomia o le faamaloloina ona galue o le laueleele mo le tausaga e tasi, pe a mae’a tausaga e ono e faaaogaina ai pe galueaina ai.

O i tonu i le vaega o le tusi faitau o lenei aso Sa, o lo o faamamafaina ai le mataupu o lenei aso, **“Alofa i ou fili”**.

O le i ai o Isaraelu i le vao ina ua o ese mai Aikupito, o le i ai lava lea i le tulaga o le ola tapenapena. O le ala lea o le tuuina i ai o tulafono, ina ia koloni ai lo latou ola faapaiaina ma le va fesoota’i lelei o le isi i le tasi, ae sili ai le va fesoota’i o le tagata ma le Atua. O le tala o lenei aso Sa, o lo o lu’iina ai le loto o le tagata ina ia iloa ona ala alofa. Aemaise lava i le tagata mauoloa i le tagata mativa. Sa faitauina le tagata mauoloa i lea vaitau, i le

tulaga i faatoaga ma lafu manu. O lona uiga, o le tagata e i ai sana faatoaga o le tagata manuia lena i totonu o le sosaiete o tagata Isaraelu. O le tagata mativa, o le fili numera tasi lava lea o le tagata mauoa. E vaai maualalo i ai tagata uma. E ita i ai le tagata o lo o i ai lana faatoaga, ona o le tulaga i le afusisina sa tautiga ai ma galue ai ina ia mauoloa ai, a o lea o le a selesele i ai le tagata mativa. E faatiga loto i le tagata sa galue ma ua fua mai, le tuuina atu o mea sa faia i lona malosi, i le tagata sa nofonofu. Ma o le tãua lea o le tulafono faa-Sapati o le tausaga, ina ia maua ai se avanoa o e matitiva latou te aai ma sa'oloto ai i fua o ou lima, po o manuia ua seleseleina mai le soifua galue ma le finau i aso uma.

GALUEGA FAATINO: Tusigã Tala pupuu

Ia saunia se ulutala e uiga i le mataupu sa talanoaina, e fai aga'i i ai le tusigãtala a tamaiti. Ia fesoasoani i ai lau susuga i le faiaoga.

PESE: 177 (Pese ma viiga)

A'OA'OGA:

1. Ia alolofa i tagata matitiva.
2. Aua le ola aiu, a ia faasoa atu ina ia ola ai so o se tagata.

.....

ASO SA: 15 MATI 2020

MATAUPU: AUA E TE TAUFAAVALEA
(Do not cheat)

SINI: Ia malamalama le vasega, e lē lelei le taufaavalea.

TUSI FAITAU: Mareko 10:17-27

FESOASOANI MO FAIAOGA:

O le taufaavalea, e aiga tutusa ma le upu pepelo. O se tu ma se aga ua faafoliga lona faatinoga e le tagata taufaavalea, i le isi tagata. O se aga ma se amioga e lē lelei, ona o le aafia ai fua o le isi tagata i ona taimi ma lona malosi, aemaise o le faaseseina ai fua, ona o le pepelo ma le faafoliga a le taufaavalea.

O le momo'e ifo o le tasi tagata ia Iesu ma tootuli, o le faailoga o le tagata ua sulufa'i ane ma ua moomia vave se fesoasoani ona o se mafatiaga i lona olaga. E le gata i lea, o se faatinoga o lo o atagia ai le iloa lelei e lē sa momo'e ifo, o Iesu e maua ai le tali o le ala i le ola faavavau. O lea lava o lo o manino "**le a'oa'o lelei e,**" o le ata manino o le mautinoa lelei, o Iesu, o le a'oa'o. E le o pogisa i lea tagata le talaaga, ma le tulaga o le Alii o Iesu i le lalolagi, pe a fua i le faatinoga, o le tootuli i luma o Iesu.

Peita'i, o le faatinoga ma le augani atu po o le fesili atu a le tagata na momo'e atu ia Iesu, ua na o se faatinoga i le vaaiga o mata a tagata sa i ai i lea taimi. O le uiga o le manatu, ua na o se ata faafoliga, ae le o i ai atoa le loto.

E mafai foi ona faapea, o se faatinoga e foliga o se tofotofoga, ina ia tofotofu ai le faamaoni o Iesu ma lona i ai i le lalolagi, aemaise lava i le itu, o Ia o le Alii, o le Mesia, o le Faaola, o le Alo o le Atua.

"Le a'oa'o lelei e, se a se mea ou te faia ina ia ou maua ai le ola faavavau?"

O se fesili o lo o matuã manino mai ai le malamalama o lē o lo o fesili, o le ola faavavau, o le nofoaga o loo tausili i ai so o se tagata faatuatua. E malamalama i tulafono a le Atua e pei ona tuuina mai le amataga. Peita'i, ua na o le iloa o le tulafono, ae musu e ola i le tulafono. Afai o le tulafono, e faavae i le alofa, o lona uiga, e le o ola la i le tulafono, ona e musu e foa'i ma tufa atu ana oloa mo e matitiva. E iloa le alofa, ae le iloa le faatinoga o le alofa.

O lo o manino lava le tala i le fuaiupu e 22, o lē na alu ifo ia Iesu, o le tagata e tele ana oloa. E le fesiligia foi lona tulaga i totonu o le sosaiete o tagata, o ia o se tagata taualoa. O le alu ifo ia Iesu, e foliga o le tagata ua manino i oa faa-le-agaga, pe a fua i le fesili i se ala i le Malo o le Atua. E foliga ua musu i oa faa-le-tino. Peita'i, ua leai. Ua malamalama ma manino i le tulafono, ae sili lona malamalama ma manumanu i ana oloa faa-le-tino. E musu e tufa atu ana oloa i e matitiva, ma le lilo i manatu, o le auala lea i le ola faavavau. E le mana'o e aveese le oa ua fai mona atua i le lalolagi. Ae o le fesili, pe aisea la na alu ifo ai ia Iesu ma tootuli i ai, ma fesili fua i ai? O le mea tonu a lea o le taufaavalea. O le alu fua e fesili, ae o lo o ia iloa lona tali. Ua faafoliga le alu ifo e fesili i le Alii, ma ua maumau ai le taimi o Iesu i le tagata taufaavalea.

GALUEGA FAATINO: Faatino le tala

Ia faatino e le vasega le tala, ma ia fesoasoani lau susuga i le faiaoga.

PESE: Saili muamua le malo o le Atua.
(Seek ye first the Kingdom of God)

A'OA'OGA:

1. Aua le ola taufaavalea e lē lelei.
2. Aua le faamuamua ina le oa i lou olaga.

.....

ASO SA: 22 MATI 2020

MATAUPU: O LE AGALELEI ATAMAI
(Wise generosity)

SINI: Ia malamalama tamaiti i le tāua o le agalelei atu, e faamanuiaina e le Atua.

TUSI FAITAU: Salamo 112

FESOASOANI MO FAIAOGA:

O le tagata mafaufau lelei, e na te fuafua lona ola i mea ua i ona lima e ola ai. E galue malosi ma atina'e lona siosiomaga ina ia ola manuia, e pei o fanau, ma nisi atina'e auā le faatumauina o le ola lelei ma le soifua fiafia i aso uma. Ae sili ai, o le mautinoa lea o le alofa o le Atua, ma ua fiafia e ola ai.

O le Salamo e 112, o lo o faamatalaina ai le tagata e mata'u i le Alii, o le tagata e fiafia e tausi ma ola i poloaiga a le Alii i taimi ma aso uma. O le tagata faamanuiaina lena pe a faatulaga le siosiomaga o tagata. Auā e seāseā lava ona maua i soo se sosaiete ni tagata po o se tagata e mata'u i le Atua, ma amio Atua. E le o māua se taimi na tusia ai le Salamo lenei. E faapena foi i le na tusia lenei Salamo. Ae a fua i le vaaiga lautele ma le manatu e fulisia ai le to'atele, pe afai o Salamo a Tavita, po o nisi o pese ma solo a le au Eperu i totonu o le tala faasolopito, ona mafai ai lea ona faamatalaina o lagona o so o se Salamo, e pei foi o le Salamo lenei e 112.

O le gagana o le Salamo e 112, o lo o manino mai ai, le tauia o le tagata e mata'u i le Atua, ma fiafia i poloaiga a le Atua, i lana fanau ma lona aiga. E manuia lana fanau i le nuu, ma e i lona fale le oloa ma mea e tele, ina ua ia mata'u i le Atua.

E iloa le tagata ua mata'u i le Atua, ina ua ia alofa atu e aunoa ma le mana'o ina ia tauai mai. E agalelei i e matitiva, i le tuuina atu lea o ana mea i e o lo o moomia mo le ola, e aunoa ma le manatu ina ia toe totogi mai. Auā o le to'atele o tagata,

latou te maua loa le tamaoaiga, ona alo lea o le vaai i nai tagata matitiva. Peita'i o le tagata ua faamaoni lona iloa o le Atua ma faamanuiga a le Atua i le tagata, e lē faailoga tagata. E moni lona ola faasoa atu mo le isi tagata, aemaise lava i le tagata o loo moomia le fesoasoani.

O le amio Atua, o le tagata ua ola i le soifuaga faa-le-Atua. E le gata e alofa atu, e faasoa atu, e agalelei atu, ae faamaoni foi i lona loto. O le tagata la lena o lo o matuā mautinoa lava, e tauia e le Atua lona ola, e le gata i lana fanau, ae faapena foi i lona aiga. O le mea lena e ta'u o le agalelei atamai. O le mautinoa lelei o le olaga o lo o ia soifua ma ola ai, e ala i ana faatinoga o lo o fai. O le ola mata'u i le Atua ma tausi poloaiga a le Atua, ina ua matinoa ma malamalama i le alofa tau mai o le Atua, i le agalelei faatino i le ola o aso uma.

GALUEGA FAATINO: Fetufaaiga e ala i fesili

Fetufaa'i le vasega i ni o latou manatu i fesili nei:-

1. E faapefea ona iloa ua tatou ola matata'u i le Atua?
2. Po o a faatinoga o tatou fai, e iloa ai le agalelei atamai?.

PESE: Alofa o se mea e te faasoa atu.

A'OA'OGA:

1. Ia fiafia e ola i amio faa-le-Atua i aso uma.
2. Ia agalelei atu i tagata matitiva, e tauia ai oe e le Atua.

.....

ASO SA: **29 MATI 2020**

MATAUPU: **O SE AMATAGA FOU: IA AVEA E PEI O TAMAITI**
(A new beginning: become like children)

SINI: Ia malamalama le vasega, o le amataga fou, o le talia o le Alii i le loto, ma ia loto maulalo.

TUSI FAITAU: Mataio 18:1-10

FESOASOANI MO FAIAOGA:

O le feau lava ia o le tusi lena a Mataio, "O LE MALO O LE ATUA" (the Kingdom of God). E faamamafa le a'oa'oga lea i tusitusiga ma le faamatalaina o a'oa'oga a Iesu, ina ia momoli i loto ma mafaufauga o tagata, e tataua ona finau ma tauivi, mo lea malo.

O le vaega o le tusi lena a Mataio e pei ona i ai le mataupu o lena aso Sa, o lo o faamamafa ai a'oa'oga a Iesu i le loto maulalo, o le auala i le malo i le lagi, po o le malo o le Atua. O le oo atu o le au so'o ma fesili i lo latou Alii o Iesu po o ai ea e sili i le malo o lagi, o lo o tau atagia lo latou faamaualuga i o latou manatu, o i latou ua fai ma soo, o e o lo o tautiga i le galuega a le Alii, e tataua ona sili i le malo o le lagi. O le uiga o le manatu, ua foliga mai i le fesili ma le mafuaaga o le fesili, ua faatulaga lava e i latou lo latou sili i le malo o le lagi. Auā a fua i le tali atu a Iesu i la latou fesili, o lo o matuā manino ai le maualuga o le tulaga ua i ai le manatu o le au so'o. O tamaiti i le sosaiete o tagata Iutaia, e leai so latou tulaga. O lona uiga, e leai se faatāuaina e lē amanaiaina foi o latou leo ma o latou lagona i totonu o lea siosiomaga. A o lea aumai e Iesu i le au so'o, e tali ai la latou fesili.

E le o pogisa i le silasila a le Alii le finau atu a le au soo e tusa o le faafesili, ma le tulaga o lo o i ai o latou manatu i lē ua sili i le malo o le lagi.

“E moni, ou te fai atu ia te outou, a lē liua outou, ma avea ia pei o tamaiti, tou te lē sao lava i le malo o le lagi”. A lē loto maulalo, e lē sao atu i le malo o le lagi.

E moomia le loto maulalo ma lagona e le tagata lava ia, lona faatauvaa, o le auala lea i le malo o le lagi. O le saunoaga a le Alii o Iesu, e faamata e faigofie, ae leai. O le avea o le tagata taualoa i le lio o tagata Iutaia faatasi ma tamaititi, e le o se mea e faigofie, pe a fua i le faatulagaina o tagata i le siosiomaga o Iutaia. O le natura lava ia o le tagata, e lē fia to’ilalo, aemaise lava pe afai ua i ai i se tofiga ma se valaauina ua faamaulugaina ai lona tulaga. O le i ai foi o le tagata i se tulaga mauualuga po o se tofiga taualoa, e mafai ona fai lea ma tulaga e faamaualuga, ma lē amanaiaina ai le tagata vaivai ma le tagata mativa.

O le valaau atu o Iesu i le tamaititi ma faatu i luma o le au so’o, ua fai ma faataitaiga o tagata vaivai uma, tagata matitiva uma, tagata ua tuulafoaina ma lē amanaiaina i le sosaiete. O le faamanatu i le au so’o, e moomia le avea ma se tamaititi e ala i le loto maulalo. O le sui o le loto, o se mea e le faigofie i le tagata faamaualuga.

E toatele tagata ua faifai ma aamu i nai tagata mama’i ua feoa’i i le auala. O nisi ua le atoatoa le malosi o le mafaufau ma nai tagata ua le atoatoa o latou itutino, ua faatausuai ai nisi ma fai upu ai. O le nonoa o se maaolo tele i le ua ma faagoto i le moana loloto, o se faasalaga sa faatinoina e le au Eleni ma le au Roma. A’o lea ua saunoa i ai le Alii, ina ia fai ma faasalaga o le tagata e le talia se tamaititi i lona igoa, ma le tagata ua faatausuai i tagata vaivai o e ua ta’ufaatauvaaaina. Ae o le tagata ua faamaulaloina lona loto, ma talia Iesu i le loto maulalo, o le amataga fou lena i le ola faa-faatuatua, ina ua tumau le mautinoa i le malo o le lagi po o le malo o le Atua.

GALUEGA FAATINO: Taliga fesili

1. O ai e sili i le malo o le lagi?
2. Aisea ua aumai ai e Iesu le tamaititi i luma o le au so’o?
3. O le a le finagalo o le Alii i le au so’o?
4. O le a le tau i o le tagata e faatausuai i isi tagata?

PESE: 122 Pese ma Viiga

A’OA’OGA:

1. Ia loto maulalo, ma lagona le faatauvaa i luma o le Atua.
2. Talia Iesu i le loto, ona manuia lea e faavavau.

.....

ASO SA : **5 APERILA 2020 (Aso Sa Laupama)**

MATAUPU : **UA TOE FESILI, O AI LENEI?**
(Asking afresh, Who is this!)

SINI : Ia malamalama le vasega i le uiga o le fesili na tagata po o ai lenei?

TUSI FAITAU: Mataio 21:1-11

FESOASOANI MO FAIAOGA:

O le mafaufauga lava ia o lenei Aso Sa o le malaga faatupu a Iesu. E mafai foi ona faapea o le amataga lea o le aga atu o Iesu i ona puapuaga ma le satauro. O le molimau a Mataio, sa lima taitaina e le usitai tagata e toalua i le faatonuga a Iesu i le asini. Aua na lagona e nei tagata le uiga o le silisili ese ina ua fetalai ai Iesu i le asini, o lo o i luma atu i le nofoaga e lei vaaia e mata. O tagata nei e toalua e atagia mai o tagata ua vavalalata le mafutaga ma le Alii Faaola. O le uiga loloto o le manatu, ua

malamalama lelei i le tagata e suafa ia Iesu. Ua latou iloa lelei e i ai le peresona e tulagaese ai le Keriso ma le tagata. O le Iesu e na te silafia mea oi luma atu po o mea e lei vaai. (**Knowledge in advance**). O tagata nei e toalua o so'o o Iesu, oi latou ia o le a vaeluaina i ai le mana silisili ese o Iesu e faaauau ai le galuega. O so'o o i latou ua lē toe tau fesili po o ai lenei, auā ua uma ona saa faaoti i ai e Iesu le utu a le Atua silisili ese.

O le asini sa tietie ai Iesu ua tuu faafeagai ai manatu o le Au faresaio ma nisi o tagata Iutaia. Ua manatu nisi o le Mesia e afio mai i se auala mamalu ma aloaia. Peitai, o uiga agamalū ma le lē amanaia o le tamai asini, o uiga ia lea e faamalumu ma faafeao atu ai Iesu i lona alu atu i Ierusalem. ***Faauta o lo o afio mai ia te oe lou Tupu, ua agamalu o ia, o lo o tietie i le asini, o le tamai asini foi.***

Ua iloa lelei e Iesu o si ana toe tietie lava lea i le asini, ua alalaga tagata ma folasia le ala. Na matua leotele tagata ma soona alalaga..*Osana..Osana..*O le upu Osana ua mafai ona faaliliuina faapea – *faaola mai matou i le taimi nei...*O tagata lava foi nei na mulimuli ane toe alalaga foi – *Faasatauro ia te ia....*A manatu i ai, e leai lava se eseese o le faaola mai matou i le taimi nei ma le faasatauro ia te ia. Aua na faaola e Iesu tagata na alalaga e ala i le satauro. E lei faanefu i le faalogo a le Alii Faaola le alalaga, leaga ua fetui fola o le alalaga ma le galuega o lea e agai atu ai Iesu. E leai foi se aoga e soona alalaga ai, leaga e le'o le alalaga na afua ai ona faia e Iesu le faaolataga, ao le faafuaga ua uma ona tosi lauti ma fofola mai e lona Tamā.

Na vevesi le nuu atoa ina ua taunu'u le Alii Faaola i Ierusalem. O le upu vevesi i lona faaliliuga mai le gagana Eleni, e mafai ona faatusa i le lūlūina o se mafuie. O lona uiga ua luluina le ola talitonu. A lūlūina i tatou i se mea e pei e gaogao atoa lota tagata i totonu. E manatu e faapena lagona ia ua tutupu ane i tagata Ierusalem, ua gaogao ma ua leai ni manatu e maua, le ala lea o le tupu ae ai o le fesili tele e pei ona aumaia i le manatu autu...*O AI LENEI ??*. Ioe ! e mafai ona toe faaupu faapea – *O ai lenei tagata o Iesu??* O se fesili e mafai ona toso ai le felefele o ituaiga tagata o lo o i Ierusalem.

Afai o tagata nei na aoao ma molimau i a'oa'oga ma vavega na faia e Iesu. Aisea ua toe fesili ai? Ua vaai mata ma faalogo taliga i mea na faia e Iesu ae le'o mafai ona latou iloa moni le tagata moni o Iesu. E i ai taliga ae le faalogo, e vaai mata ae tupu pea le ola le talitonu. Afai foi ua latou le iloa Iesu, o le ata foi lea o lo latou le faalogo ma talitonu i mea na faia e Iesu.

O Ierusalem o lo o i ai le au a'oa'o i tulafono e pei o Faresaio ma Tusiupu. O i latou nei o lo o tu ma tete'e i a'oa'oga a Iesu. O nisi oi latou nei o lo o sailiili masei i se lape o le galuega a le Alii Faaola, aemaise o ni ala e molia ai Iesu i le faamsinoga. O lona uiga o le alia'e ai o le fesili – e mafai ona faapea o se faatagā fesili pepelo.

Fai mai le tali a tagata e tusa o le molimau a Mataio – *O Iesu lenei le Perofeta mai Nasareta i Kalilaia*. O se tali e atagia ai le papa'u o lo latou iloa o Iesu, O Nasareta ua na'o se nuu sa nofo ma ola ai Iesu. A o Iesu na auina mai le lagi ina ia militino faatasi ma le tagata.

O se fesili foi lea e aumaia se feau mo tatou le fanau. O AI IESU IA TE OE MA A'U? E pei e foliga e faigofie ona tatou iloa Iesu, a o le vaisua e fia tulituliloa, po o tatou ola ai i le olaga faa-Iesu. Ia tatou talitonu ma faatuatua i le Agaga o le Keriso Toetu. Aua foi tatou te ola faafoliga pei o nei tagata na toe fesilisili. O se feau foi lena o le Laupama mo tatou i lenei taeao. Ia tatou talitonu ma le faatuatua o Iesu na Afio mai i se ala maulalo ina ia faaola ia i tatou ma i a tatou agasala.

GALUEGA FAATINO : Fesili Fetufaaa'i

1. O ai Iesu ia te oe??Who is Jesus to you?

NB: E foliga e faigofie le fesili, ae tele ni mea e ono lautele ai pe a faasoa le fanau??Ia tuu mai i le olaga o aso uma le tali e tatau ona faasoa ai...

PESE : Osana pepese Tamaiti Uma.....

A’OA’OGA:

1. O le loto maulalo e i’u i le faaeaina
2. Ia tatou talitonu ma faatuatua o Iesu le Faaola
3. Ia atagia i o tatou ola le olaga faa-Iesu.

.....

ASO SA : **12 APERILA 2020 (Aso Sa Toetu)**

MATAUPU : **TAFA ATA O LE ULUAI ASO**
(Dawn on the first day)

SINI : Ia malamalama le vasega i le uluai aso i le kalena faa- Iutaia, aemaise o le mea sa tupu ai i le tafa o ata.

TUSI FAITAU: Mataio 28 :1 - 10

FESOASOANI MO FAIAOGA:

O le taeao lenei ua faaigoaina o le taeao o le manumalo, o le taeao na tatafa ai ataata o tauleleia ina ua tatala le tuugamau ma ulufafo ai le Alii Faaola i lona tino e ola pea e faaavavau. O le tafa o ata o le faailoga ua lata ona ao, o le faailoga o le a fesui ai le po ma le ao, a o se faailoga foi o le aumaia o le malosi faafouina i le tagata. O se uiga foi lena o lo o momoli mai i le toetu manumalo o le Alii Faaola. O le tafa o ata na fesui ai le pouliuli o le loto faanoanoa o Maria ma Maria ma so’o o Iesu, ina ua malamagia i le malamalama o le manumalo aiai. A o le tafa foi o ata na toe pupula malosi ai le susulu o le faatuatua o le auso’o ma le lalolagi atoa. O le taeao na fofola ai le faavae papa o le faatuatuga faa kerisiano. O le taeao na atoalio ai le lio o le alofa le faatua o le Atua i le lalolagi.

Molimau Mataio, o le uluai aso o le vaisapati na o atu ai Maria ma Maria e asi le tuugamau o Iesu. O le uluai aso o le vaisapati i

le kalena faa-Iutaia o le Aso Sa lea i le tatou Kalena i le taimi nei. A o le Sapatu sa latou faamamaluina o le aso Toonai, o le aso fitu na malolo ai le Atua mai le foafoaga, sa faamamaluina lava e Iutaia. A o lea ua talia lautele ma ua tatou fa’aaogaina le aso na toetu manumalo ai le Alii e fai ma Aso Sapatu, o le Aso Sa lea.

O le tala fai mai na o atu i laua e asiasi i le tuugamau o Iesu. E i ai le manatu, o le toe aso lava foi lea e asia ai le tuugamau o le Alii Faaola. E i ai le mafaufauga faa – Iutaia e po fa loa se tagata i le tuugamau ona le toe asia lea. A o le asia mulimuli lea o le tuugamau na iloa ai e nei tina le tala fiafia ua toetu le Alii Faaola.

Ua to le mafuie, o le agelu na alu ifo mai le lagi ma fuli ese le maa mai le gutu o le tuugamau ma tietie i ona luga, e pei o le uila lona tino mai ma ona ofu ua sinasina pei o le kiona. O nisi ia o vaaiga uiga ese o lo o faamauiina e Mataio e ese mai ai i le molimau a Mareko ma Luka. O lo o fa’aaogaina ai e Mataio nisi o taaviliga matautia o mea o le foafoaga e momoli mai ai le mamalu uiga ese o le Atua. O le mafuie na iloa foi i le taimi na faasatauroina ai Iesu, lea foi ua toe ta’ua e Mataio i le taimi ua toetu ai le Alii. Ua luluina ai le manava o le eleele ma le agelu na alu ifo mai le lagi o malosi lilo ia na tali i le tuufesili o nai tinā na o atu i le tuugamau, po o ai a fuliese le maa mai le gutu o le tuugamau.

Na faaali le agelu i fafine ma faailoa i ai, o Iesu ua toetu. Ua o faatasi faalogona o le fiafia ma le fefe i fafine, o ni lagona e seasea o faatasi. Peitai o lagona ua mafai ona tuu faatasi ona o se mea uiga ese ua tulai mai e ala i le toetu manumalo o le Alii Faaola. E fiafia ona o le tala fou ua toetu le Alii Faaola, ae fefe ona o le fa’aali mai o le agelu. O fafine nei sa na’o le savavali lemu ma le faanoanoa tele i le taimi na o atu ai e asi le tuugamau, a o lea ua tamomo’e fiafia e ave le Tala Lelei i so’o o Iesu. Na faasalavei e Iesu toetu le tamomoe a nei tinā, ma ua la fetagofi ai i vae o Iesu. O le tagotago o nei tinā i vae o Iesu, o se faailoilo mautinoa na talitonu ai nei fafine. Na poloai Iesu i

fafine ina ia ta'u atu i ona so'o ia latou o atu i Kalilaia latou te iloa ai o Ia.

O se a'oa'oga foi lea mo tatou le fanau – O le tafa o ata, o le faailoga ua oo mai le aso fou, malosi fou. O le taimi lea na maua ai le tala fou, na tupu ai se mea fou e ala i le toetu o le Alii Faaola. O lona uiga o le toetu o le Alii Faaola, o le toetu o le tagata fou, o le faaolataga na faia ina fou le lalolagi. Ia tatou talitonu ma faatuatua pea – ina aveia pea i tatou ma tagata fou.

GALUEGA FAATINO: Taliga Fesili?

1. O le a le uluai aso o le vaisapati pei ona faamatalaina?
2. Aisea ua faamamalu ai e le Kalena a le Au Kerisiano le Aso Sa e fai ma Sapati?
3. O a ni taaviliga o le siosiomaga o lo o fa'aali mai ai le mamalu o le Alii?
4. O le a se uiga o le tafa o ata o lo o faamamafa mai i le mataupu?

PESE: He is Lord

He is Lord (x2)
He has risen from the dead
He is Lord
Every knee shall bow
Every tongue confess
That Jesus Christ is Lord
O Ia o le Alii (x2)
Ua toetu mai le oti
O Ia o le Alii
Tootuli uma i ai tulivae
Ta'uta'u atu i laulaufaiva
O Iesu Keriso le Alii

A'OA'OGA:

1. Ua toetu manumalo le Alii Faaola
2. Aveia i tatou ma tagata fou ia Keriso

.....

ASO SA : 19 APERILA 2020

MATAUPU : O LO'U MAFAUFAU I LE 3 I LE VAVEAO (*My brain at 3,00 a.m*)

SINI: Ia malamalama le vasega, aisea e taua ai le vaveao i manatu ma mafaufauga o le tagata soifua, a o le a foi le mafuaaga na o ese ai Lota i le vaveao mai Sotoma ma Komoro.

TUSI FAITAU: Kenese 19:15 -28

FESOASOANI MO FAIAOGA:

O Lota o le atalii o le uso o Aperaamo, sa aumau ma lona toalua ma ona afafine i le nuu o Sotoma ma Komoro. Sa tulagaese Lota ma lona aiga mai tagata uma o le nuu, ona o Lota ma lona aiga sa matatau ma usitai i le Atua. E lei pogisa i le silasila a le Atua le ola agasala o le nuu, ua matua sosolo faa fue lavelave e le mate, ma ua ta'u agasalaina ai ma nai fanau iti. E manatu o le ala lea e lei faigata ai i le Atua lana filifiliga. Lea ua ia manatu ai – e aveese mai Lota ma lona aiga mai le nuu, ae faapulou atoa loa le nuu i le malaia ma le afi.

O le vaega sa faitauina ua ave faamalosi e agelu Lota ma lona toalua ma le la fanau ina ia o ese atu loa ma Sotoma ma Komoro. Na pei e faatuatua le o ese ai o Lota ma lona aiga, ona e manatu alofa foi Lota ia ona o le malaia o le a oo i tagata, ae le gata i lea o ana meatotino ma ona fale ma fanua ma ana lafu

manu. O mea na alu ai lona malosi, sa faalagolago i ai lona ola ma le tausiga o lona aiga. O nisi ia o mafuaaga e manatu ai o lo o mamafa i le mafaufau o Lota, peitai o le finagalo lava o le Atua e le toe toloa. Ua tatau ona faatunuu, e ifo a foi le fuiniu i le lapalapa. O lona uiga e ifo a le tau i le tagata agasala. O mea o lo o popole ai Lota o mea e toe foai mai e le Atua.

O le molimau a Kenese, sa nanati agelu ia Lota i le malama a'e o le taeao, o le upu faa-peretania o lo o i ai o le *morning dawn* o le vaveao e lei malamalama lelei, Mo le faatulagaina o taimi o le po, o le 12 agai le 1 o le vaeluaga o le po, o le 1 agai le 2 lea e masani ona tatou faaupuina o le tuneva o le po, po o le leva o le po, o le 3 agai le taeao o le taimi atoa lea e faaigoa o le vaveao. O le vaveao e mafai ona faaupu o le taimi paganoa. O le taimi ua maua lelei ai mafaufauga ma manatu aua o lea ua mavae se malologa ua faafouina ai le malosi o le tino ma le mafaufau.

O le taimi lea na faaaogaina e le Atua e aveese mai ai Lota ma lona aiga. E manatu ai o le taimi lea ua taugalemu ai le lualuagia o manatu o Lota i mea faaletino, a ua gauai atu lona manatu i le poloaiga a le Atua mo Ia ma lona aiga. Ua iloa mautinoa e Lota o le a oo lava le faamasinoga a le Atua ia Sotoma ma Komoro. E mafai ona faapea o le vaveao na ave atoa ai le mafaufau o Lota i le Atua ma lana faaolataga mo lona aiga. Na polokalame lelei e le Atua le taimi e o ese ai Lota, na iloa lelei e le Atua le uiga vaivai ma le taatele o le tagata e nanau i mea faaletino. Le ala lea o le o ese faalilolilo o Lota ma lona aiga. O lo o i ai foi uo ma e masani a Lota i Sotoma ma Komoro, peitai e le sili ifo le alofa i le uo nai lo le alofa faale Atua.

O le vaveao lea na poloai le agelu ia Lota ina ia sosola i le mauga, peitai sa augani Lota e le gafatia e lona malosi ona sola i le mauga. Ona fai atu ai lea o Lota ae a pe a alu atu o Ia i le isi aai itiiti o Soara le igoa. Ua talia e le agelu le augani a Lota ma ua ave ma ala e le faaumatia ai lea aai itiiti o Soara. Ua o'o Lota i Soara ina ua alu a'e o le la, ona faatoto faaua ifo lea e le Alii i Sotoma ma Komoro o le afi ma le teio ma faaumatia ai.

O le vaveao o le taimi paganoa, o le taimi e manatu e faatusa o le taimi mo le Alii. O le taimi o mafaufauga fou mai le Alii. O le

taimi lona na uu lima ai Lota ma lona aiga ma le agelu ma o ese mai ai ma le nofoaga o le agasala. O se fesili mo tatou le fanau - O le a sou mafaufau i le 3 i le vaveao pe a e ala ai??Ioe o le taimi o mafaufauga fou aua ua paganoa ma ua leai se mea e faalavelaveina ai.

O se a'oa'oga foi lea mo tatou le fanau - Ia i ai so tatou taimi paganoa mo le Atua. O le Atua lava ia o lo o saili mai ina ia aveese mai i tatou i le nuu o agasala, peitai o le vaivaiga lea o le le saili o tatou. Ia maua so tatou taimi paganoa e pei o le vaveao. O le taimi e ave atoa ai o tatou mafaufau i le Atua. O le taimi e tatou te uulima faatasi ai ma le Atua, e faasaoina ai i tatou mai le tele o puapuaga ma faigata.

Uiga o Upu:

- i) Faatoto faaua: toulu mai pei o le timu
- ii) Faatuatuai: faatelegese

GALUEGA FAATINO: Taliga Fesili

1. O le a se uiga o le 3 i le vaveao o lo o faamamafa mai i le mataupu?
2. O ai le nuu lea na o ai Lota ? Ao le a foi lona uiga?
3. O a ni mafuaaga na mafua ai ona faatuatuai le o ese o Lota? (*o lo o ta'ua i le mataupu nisi o mafaufauga e manatu na mafua ai ona faatuatuai,,ae mafai lava foi ona tatala le avanoa i manatu o le fanau i nisi o mafuaga latou se iloa*)

PESE: O le Atua Silisili Ese

O le Atua silisili ese, malosi ofoofogia
E leai se mea e le mafai ona ia faia
Na ia faia o atumauga
Na ia faia o vaitafe
Ona foliga ua vaaia i le lalolagi HA! HA!

My God is so big, so strong and so mighty
There's nothing my God cannot do,
FOR YOU

A'OA'OGA:

1. Ave atoa o tatou taimi mo le Atua
2. E tauia le ola agasala
3. Faamoemoe i le Atua e maua ai le ola saoloto.

.....

ASO SA: 26 APERILA 2020

MATAUPU : TEPA I TUA, TAGAI I LUMA
(Looking back, looking forward)

SINI: Ia malamalama le vasega e taua le vaai i tua, ina ia fausia ai se lumanai lelei.

TUSI FAITAU: 1 Tesalonia 1

FESOASOANI MO FAIAOGA:

O le tala lelei i le Ekalesia i Tesalonia sa muai toto e Paulo ma Sila i le malaga lona lua i le 51 tausaga ua tuanai le maliu o le Alii Faaola. (50AD). E lei malu'ia le ola tala'i o Paulo ma Sila i tulafono ma sauaga a Roma. O le 'auga lava sa fai ma ta'imuaga o le savali - o le **Tala Lelei i le Keriso toetu**. O le tala e faapea na sosofa lava e Paulo le ute (*main place of worshipping*) o le talaiga e ala i le ulufale solo lea i malumalu o Tesalonia. E ui i le tala lasi o tapuaiga i Roma, ae sa faaofiofi atu ai foi e Paulo ma le tala i le Keriso Toetu. Na alofagia le talaiga ma ua amata ona sosolo a'a o le Tala Lelei, ma ua toatele foi Agaga ua laveia i a'a malolosi o le Talaiga.

Na i ai lape o le galuega tau amata a Paulo ina ua tilofia e le puleaga a Roma. Ua fausia ma faatuina ni alafua ma ni aulape o tapuaiga i malumalu, ma avea ma ala e tapu ai le talaiga faakerisiano a Paulo ma Sila. O nei aulape e faapea e faasaina ai ni Missionare e autovaa atu i Tesalonia ma nisi talitonuga fou ona toe ulufale i totonu o malumalu. E lei avea nei aulape ma ala e solomuli ai le sa o le tala lelei, na taualo pea e nei auauna totoa. Ua saili auala pea i laua ma iu ai ina la maua se fale o le tagata e suaia ia Iasoni. O si nofoaga pu moomoo lena sa fa'auau ai le faamiliina o le fatu o le tala lelei i Tesalonia. O avanoa na maua i le fesoasoani o le Agaga, o le mautinoa lea e tatou te iloa ai e le oge auala le Atua.

Peitai o le mea e i ai le lelei e taumulimuli ai foi masei. Na toe alia'e nisi o faafitauli aua ua matua tulituliaupu e nisi le Tala Lelei. Ua faalogo ai nisi o Faamasino ma Faipule ua pei ua faalavelaveina a latou talitonuga i le tala lelei o lo o molimoli atu e Paulo ma Sila. Ua amata ona faapotopoto tagata Iutaia o lo o salalau i totonu o Tesalonia ma ua tupu le Tala Lelei. Ona taupule ai lea o Faipule ma e maualuluga ina ia ave se avefeau i le Emeperoa Sili e aumai ai se faatagaga sei o latou sailia ai ma molia ai tagata o lo o aumaia le talaiga faakerisiano. Ua faalogo ai Iasoni, ma ua manatu ai o le a ia auina ese atu faalilolilo Paulo ma Sila. Ona tuua ai lea e i laua o Tesalonia i le po. Na o ese i la'ua ma le fiafia tele aua ua i ai aiga o le Tala Lelei i totonu o Tesalonia, oi latou ia o le a toso le upega o le Tala Lelei aua ni agaga se tele.

A o i ai Paulo i Korinito , na toe foi ane ai lona atalii faa-leagaga o Timoteo sa i Maketonia. O Timoteo lea na sau ma le tala mai i le Ekalesia i Tesalonia o lo o alualu pea i luma lo latou loto atu i le Tala lelei. Ona avea lea o le tusilima a Paulo e fai ma faamalosi ma saga faamanatu pea ia Tesalonia – e le o se afu e pau fua lo latou tautiga i le Tala Lelei, e ala i le faatuatua ma le faamalosi i le alofa ma le tumau pea i le faamoemoe i le Alii o Iesu Keriso.

O lo o silafia lelei e Paulo le feagai o nai tagata o le Ekalesia ma sauaga, a ua faamalosi pea Paulo e mavae sauaga ae tumau lo

latou manuia i le Tala Lelei. E tau'i foi e le Atua i latou o lo ua faapuapugaina i latou. A ua tãua i manatu o Paulo lo latou faaa'oa'o ina ia lautele le Tala Lelei i Maketonia ma Akaia.

E aoga mea o le tuana'i, e toe faufau ai le lumanai. E lei faigofie le totoina o le Tala Lelei i Tesalonia. O le uiga foi lea o le faamalosi a Paulo i se ata lautele, ia tepa i tua ona tagai lea i luma. Ia vavaai i le tulaga faigata o le taumafaiga o le Tala Lelei, ona maua lea o le malosi faasili e taualo ai pea lo latou sa o le Tala Lelei, ia aua lava ma le faavaivai, a ia galulue punouai pea aua o lo o faatali mai lona Alo mai le lagi. O se a'oa'oga foi lea mo tatou le fanau – Ia tatou galulue pea ma le punouai i le Tala Lelei. E mavae faigata o le ola nei, ae faaofu tatou i manuia o i le lagi.

GALUEGA FAATINO: Taliga Fesili

1. O le a le gaoiga a Paulo ma Sila na fai i Tesalonia i le amataga o le Talaiga?
2. O a ni aulape sa feagai ma le galuega?
3. O ai le igoa o le tagata sa fesoasoani malosi i le galuega?
4. Aisea e taua ai le tepa i tua ma le tagai i luma? (*tatala le avanoa e faasoa mai ai fanau i manatu lautele*)

PESE: Pese 184 (Pese & Viiga)

A'OA'OGA:

1. E aoga le tuana'i e faufau ai le lumanai
2. Tatou onosai e tautua le Tala Lelei
3. E tauia lo tatou tautiga i le Tala Lelei.

.....

ASO SA: 3 ME 2020

MATAUPU: **AU SOO O LE TAEAO SEGISEGI**
(*Disciples of the Dawn*)

SINI: Ia malamalama le fanau ia aua nei manatu le tagata e le afaina le toe afio mai o le Alii, ona o le filemu ma le toamalie ua ia maua i le taimi nei.

TUSI FAITAU: 1 Tesalonia 5: 1 – 11

FESOASOANI MO FAIAOGA:

Tasi lenei o mataupu ua iloga ona vavao ai tagata ma le lalolagi. “O le aso e toe afio mai ai le Alii. Ua manatu nisi o le toe afio mai ai o le Alii, o le gataaga lea o le lalolagi, ao nisi ua manatu o le aso o le filemu, e le afaina lea aso. Lea ua apoapoi atu le Aposetolo o Paulo i le Ekalesia i Tesalonia. Ua outou iloa o le aso o le Alii, e sau e pei o le gaoi i le po, O lona uiga e leai se na te iloaia.

O le manatu o Paulo, aua nei tuufesilisili le tagata i lea aso po o afea e oo mai ai. Aua o lea aso e pule ai le Atua, ua na o Ia foi e iloa le aso. O le mea lea e faamanatu atu e le Aposetolo i le Ekalesia, afai ua latou talia Iesu Keriso, ua avea i latou ma malamalama o le taeao fou o le Tala Lelei. Aua nei fuaina mea latou te fai ma le ola latou te olaina ona o le aso. Afai ua talia e le tagata le Alii ma le loto talitonu atoatoa e ala i le faatuatua faamaoni, e leai se mea o le a popole ai, pe afai e oo mai lea aso. Aua nei manatu le tagata, o lea ua maua le toamalie ma le filemu, ona faatalitali ai lea ma le mautinoa. Nei tei ua faafuasei ona oo mai lea aso, ae faafuasei foi ona fano ai. Aua nei o latou manatu, o le toamalie ma le saogalemu ua latou maua ona o le malo o Roma, o le filemu moni lea. Aua e leai lava se isi malosi e mafai ona faafesagai ma le malosi o le Atua, pe a oo mai lona aso.

“Ia tatou oofu i le ufi fatafata o le faatuatua” O le faatuatua, faamoemoe ma le alofa, o mea tau ia a le tagata ua i le malamalama o le Alii. Afai e tumau le tagata i mea ia, ona avea ai lea o ia ma so’o o le taeao segisegi o le Tala Lelei, pe afai e toe afio mai le Alii.

GALUEGA FAATINO: Taliga fesili

Fa’aaoga le Tusi Paia, e tali ai fesili:

O lo o a le uiga o faaupuga nei:-

(a) “O le filemu ua le afaina”

Tali: O e ua manatu o le saogalemu ua latou maua ma le malosi o le malo o Roma, e maua ai le filemu pe afai e oo mai le aso o le Alii.

(e) “O tagata o le malamalama outou”

Tali: O e ua talia ma faatuatua ia Iesu Keriso.

(i) “O e ua momoe i le po”

Tali: O tagata ua lē mataala

(o) “E lei tofia i tatou e le Atua i lona toasa”

Tali: O le alofa o le Atua na magalo ai le tagata agasala e ala i lona Atalii pele e toatasi.

(u) “A o aso ma tausaga e le aoga ia te outou”

Tali: E le o le taimi, a o le faatuatua.

PESE: Pese ma Viiga 134 (Ou te tagi, lo’u Tama e)

A’OA’OGA:

1. O i tatou o so’o o le taeao fou o le Tala Lelei.

2. O le faatuatua, faamoemoe ma le alofa o le malosi sili lea.

3. E lē o le taimi mo le tagata, a o le tagata mo le taimi.

.....

ASO SA: 10 ME 2020 (Aso Sa o Tinā)

MATAUPU: SAVALIGA I LE FAATOAGA
(*Walking in the Garden*)

SINI: Ia malamalama tamaiti e le manao le Atua e lafi le tagata mai ia te ia. Ae manao le Atua e savavali faatasi ma le tagata.

TUSI FAITAU: Kenese 3: 1 – 13

FESOASOANI MO FAIAOGA:

I le foafoaina e le Atua o le lalolagi, na Ia tuu ai ma le faatoaga matagofie. Ua faaigoaina o Etena. O le uiga o le upu Etena, o le paratiso (paradise). O se nofoaga matagofie ma le toamalie. O le faamoemoe lava o leAtua, ia savavali ma le tagata i totonu o lenei faatoaga. Le sa savavali ai le Atua ma Atamu. Sa iloga ona lelei le sootaga a Atamu ma le Atua aua ua avea le faatoaga ma nofoaga e mafuta ai Atamu ma le na faia o ia.

E le tau fesiligia le matagofie o foliga vaai o lenei faatoaga. O laau ma fugalaau manogi ma laau eseese. E i ai foi ma laau aina e tua i ai le tagata, faapea foi manu vaefa ma manulele. O se nofoaga e mafuta ai ma le fiafia meaola ma manu uma ma le fiafia. Ua na o le olioli e maua ai.

A tuu mai foi i le tino nei, e faapena foi lagona e maua e le tagata, pe a savali i totonu o se nofoaga faapea. O lagona o le fiafia ma olioli. Ae foliga mai e le o lagona ia na lagonaina e Atamu ma Eva. Ua avea le faatoaga ma nofoaga e lalafi ai. Ua lagona le maasiasi ma le fefe. Ua avea le nofoaga ua la faatino

ai le agasala ina ua le usitai i le Atua. Ae ui i lo la le usitai, na savali pea le Atua i totonu o le faatoaga, e saili i le tagata sa ia foafoaina. Aua e taua i le Atua le tagata, ae le taua le agasala. O le mea e ao ona iloa ma malamalama ai le tagata, aua nei lafi pe sola ese mai le Alii, aua e le mafai ona lafi se tagata i luma o le Atua. Pau le mea e finagalo ai le Atua, afai ua agasala le tagata, ia tautino i le Atua lona sese. E le finagalo le Atua e fefe le tagata ia te Ia, ae manao ina ia faamaoni le loto o le tagata ma usitai. O mea uma o le natura e ala i le siosiomaga, na faia ia lelei e le Atua aua le ola lelei mo le tagata, e lei faia ina ia agasala pe lafi ai le tagata. Tusa lava pe agasala ma le usitai le tagata i le Atua, e fiafia pea le Alii, e savavali ma le tagata i aso uma o lona ola, i totonu o le faatoaga.

GALUEGA FAATINO: Taliga Fesili

Fesili ma tali (Fa’aaoga le Tusi Paia e tali ai fesili nei)

1. O ai na faaosoosoina le fafine e ai i le laau?
Tali: Gata
2. O a upu a le gata na fai i le fafine pe a ai i le laau?
Tali: “E pupula ai o oulua mata.”
3. E pupula ai oulua mata.” O le a le uiga o lea faaupuga?
Tali: E iloa ai le lelei ma le leaga.
4. O le a le uiga o le upu “Etena.”
Tali: Nofoaga matagofie (Paradise)
5. O fea e faavae mai ai le upu ‘Paratiso’ (Paradise)?
Tali: Peresia
6. Aisea na lalafi ai Atamu ma le fafine?
Tali: Ua fefefe, ua agasala

7. O le a le agasala a Atamu ma Eva?
Tali: Ua le usitai i le Atua.
8. O le a le finagalo o le Atua mo le tagata?
Tali: Faalogo ma Usitai
9. “Ua sili le atamai o le gata, aisea?
Tali: Ua usitai ai le fafine.
10. O le a le uiga o le ‘Savali o le Atua i totonu o le faatoaga?
Tali: E saili i le tagata ua leiloa ona o le agasala.

PESE: Pese maViiga 67 (Iesu e, ua avea oe)

A’OA’OGA:

1. Savavali faatasi ma le Atua.
2. E taua le tagata i le Atua nai lo o le agasala.
3. E le mafai ona lafi le tagata i luma o le Atua.

.....

ASO SA: 17 ME 2020

MATAUPU: SAVAVALI FAATASI MA IESU
(A *pilgrimage*)

SINI: Ia malamalama le fanau, o le talia ai e le tagata o le Alii i lona loto, e malamalama ai i le ala na te savalia mo le finagalo o le Atua.

TUSI FAITAU: Luka 9: 57 - 62

FESOASOANI MO FAIAOGA:

Sa i ai se tasi taulealea sa savavali faatasi ma le Alii i luga o le matafaga. Ua alu le savaliga ona tepa lea i tua o le taulealea ma ia vaaia ai tulaga vae e lua, ona ia mautinoa ai lea e toalua tagata ia e savavali. Ua alu pea le savaliga ona toe tepa lea i tua o le taulealea, ma iloa ai, e tasi tulaga vae ia na te iloa. Ona ia iloa ai lea, e toatasi le tagata lea e savali. Ona fesili lea o le taulealea ia Iesu.

“Le Alii e, aisea e lua ai tulaga vae i le isi taimi, ae tasi i le isi taimi.”

Ua tali le Alii, “Atalii o taimi ia e lua ai tulaga vae, o le taimi lea o lo o ta savavali faatasi ai. Ae a oo i le taimi e te vaivai ai ma le lava, ona ou siitia lea o oe i ou lima ma ave oe. O le taimi lea ua tasi ai tulaga vae.”

O le savavali faatasi ma Iesu, e malamalama ai le tagata i le alofa ma le agalelei o le Alii. O lona finagalo foi lea mo tagata uma. A oo i tausaga e sefulu ma le lua, ona fai ai lea o le faamanatuga o le tausamiga o le Paseka i Ierusalem a i le malumalu. Po o fea lava o lo o nofo ai le Isaraelu, a oo i le tausamiga o le Paseka, ona agai uma ai ai lea i Ierusalem a i le malumalu. Po o fea lava o lo o nofo ai le Isaraelu, a oo i le tausamiga o le Paseka, ona agai uma ai ai lea i Ierusalem a i le malumalu. O le agai mai ai i Ierusalem a i le malumalu, e taua lea savalia o le “Savaliga Faaleagaga.” (Spiritual Journey) Le savaliga lea na agai mai ai foi Iesu ma ona matua.

Ua maea le tausamiga ona toe foi ai lea o le tagata lava ia i le mea e nofo ai. O le toe foi atu lea sa faatoa iloa ai e matua o le Alii, e le o savavali faatasi ma Iesu. Ua popole ma atuatuvaale o la loto, ona la saili ai lea ia te ia, ma oo ai ina toe foi i Ierusalem a i le malumalu. Ua la maua le Alii, o lo o a’oa’o o ia i tagata i totonu o le malumalu. Ona toamalie ai lea o o la loto ina ua maua o Ia. Ae foliga mai i le popole ma le atuatuvaale o Iosefa ma Maria, o le faailoga e oo foi ia te i laua, e le o malamalama foi i le Alii. “Aisea e te lua saili ai ia te au, e tataua ona o i ai i le fale o lou Tama.” Upu ia a le Alii, sa matua teu fatu i le loto o lena tina.

Afai ua savavali le tagata ma Iesu, ia savali ma le talitonu ma le mautinoa e le mafai ona tuulafoa’iina o ia e le Alii i le ala. Ae afai e savali le tagata ma galo le Alii, e mautinoa lava lona fememeai ma polepole vale lona loto, ma oo ai ina vaivai. Ia manatua e siitia ma tauave i tatou i aao agalelei ma le alofa o Iesu, pe afai tatou te vaivai ma le lava i lo tatou savaliga faale-Agaga.

GALUEGA FAATINO: Tusiga Tala

Ulutala “Savaliga Faale-Agaga”

Tusi mai po o le a le mea e taua ai le savavali faatasi o le tamaitiiti ma le Alii, i lona olaga faaletino. E 2 parakarafa ma le aoaoga mulimuli. A le maea ona avea lea e faauma mai i le fale. Ia faitau e le tamaitiiti lana tala i luma o le vasega.

PESE: Pese ma Viiga 5 (Le Alii e, le Atua)

A’OA’OGA:

1. Savavali faatasi ma le Alii i aso uma o le ola.
2. E le tuua i tatou e Iesu tatou te fano i luga o le ala.
3. A tatou vaivai ma mafatia, e siitia ma tauave i tatou e le Alii.

.....

ASO SA: 24 ME 2020

MATAUPU: O A MEA UA E VAAI ATU I AI?
(*What do you see?*)

SINI: Ia malamalama le fanau, e le o le matagofie o mea faaletino tatou te vaai ai e faamalieina ai o tatou loto. Ia taulai le vaai a le tagata i le Alii, ona faamalieina lea o lona loto i mea lelei uma.

TUSI FAITAU: Galuega 3: 1 – 10

FESOASOANI MO FAIAOGA:

Tele ia o mea matagofie o le olaga nei e gaoia la tatou vaai ma oo ai ina tupu tele lo tatou manao. Faataitaiga, o taavale, TV, lavalava, o fale, fanua, tupe ma isi lava mau mea. Tatou te naunau lava ia maua ina ia faamalieina ai le manao. A o le fesili, tatou te moomia mea ia mo lo tatou faasaoina? (Do we need these things for survival?). A o le upu moni, e foliga mai o mea faaletino ia, ua misi ai la tatou vaai i le Alii ma lona finagalo.

E i ai le taua o nei mea, ae le tumau lo latou matagofie. A oo ina faaleagaina ona tatou tuulafoa'i lea. E foliga mai e faapena se manatu o lo o aumai e le tala lenei a Galuega

O le tagata mai pipili talu ona fanau mai ua fai ma masani a isi tagata le tuu o ia i luma o le faitotoa o le malumalu, e saili ai mea latou te mananao ai. A maea le aso, ona latou toe ave lea o le pipili i lo latou fale ma faasoa ai mea sa maua e le pipili. Ua latou vaai i le tupe, ae ua le vaai ma saili se faamalologa mo le tagata ma'i. A tuu mai foi i le tagata pipili, e foliga mai e pau foi lea o le mea e taulai ai lana vaai, o le tupe.

Ua oo atu Peteru ma Ioane i le malumalu e tatalo, ona la vaai ia lea o le tagata ma'i pipili. Ua aisi mai i se tupe, po o se isi meaalofa mo ia. Ua vaai atu Peteru ma Ioane ia te ia, ona tupu ai lea o lo la alolofa, ua tali atu Peteru – “E leai se auro po o se ario e avatu mo oe, ae ou te avatu ia te oe le suafa o Iesu Keriso.”

“Le mea lea sa misi i le vaai a ē na latou aveina le pipili i le malumalu. Ae faapena foi i le tagata ma'i pipili. Ua latou le vaai ia Iesu Keriso, e na te fai mea sili mo le tagata, e faamalieina ai lona loto i aso uma e le aunoa. Ua faamalolo e Peteru le tagata pipili, ona tulai ai lea o ia, ua momoe ma le fiafia. A taulai le vaai a le tagata i le Alii, ona ia maua lea o faamanuiaga e sili ona faamalieina ai lona loto. E maua foi le faamalologa sili, e toamalie ai lona loto mai faigata ma ma'i faaletino e aafia ai lona ola.

O le mea lava sa sili ona taulai ai le silasila a le Alii, o le agasala a le tagata ia faamagaloina, ma maua ai le saolotoga i lona loto, e ola ai ma le fiafia.

GALUEGA FAATINO: Faafinauga (Debate)

Mataupu (Topic) “A taulai le vaai i le Alii, ona maua lea o le manuia”

Vaevae le vasega i vaega e lua:-

Vaega Muamua - Itu lagolago

Vaega Lua - Itu Tetee

O lona uiga e 12 minute o le Debate (E faamasino lau susuga i le Faiaoga)

PESE: Pese ma Viiga 357 (Iesu matou te faafetai)

A'OA'OGA:

1. Ia vaai i le Alii e faamalieina ai le loto.
2. Aua le seetia le vaai i mea matagofie o le ola nei.
3. O le upu a le 'Poto'. E faatauva mea uma, e leai se mea fou i lalo o le la.

.....

ASO SA: 31 ME 2020

MATAUPU: LAULAUFAlVA AFI
(*Tongues of Fire*)

SINI: Ia a'oa'oina le fanau ia malamalama i le taua o le tino mai o le Agaga Paia o le Atua faapei o Lauaufaiva Afi.

TUSI FAITAU: Galuega 2:1-13

FESOASOANI MO FAIAOGA:

O le Aso o le Penetekoso, o le aso e atoa ai le 50 aso, talu ona mavae vaisapati e 7 (7 aso i le vaiaso ae 7 vaiaso = 49 aso, o le aso 50 e taua o le Penetekoso). O le aso lea e faataunu ai le Sauniga Faapitoa ua faaigoaina o le Tausamiga o Vaiaso – Feast of Weeks poo le Tausamiga o Seleselega – Feast of Harvest. (Silasila i le Levitiko 23:15-21 o lo o faamauina ai le faataunuina o lea sauniga taua). O le sauniga e ofoina ai fua muamua o faatoaga ma atinae a tagata e fai ma taulaga faafetai i le Atua ona o ana faamanuiaga. O se tasi o sauniga e aofia i sauniga tetele i le kalena o le lotu Iutaia e pei: Tausamiga o le Paseka – (1) Passover – aso na laaloa ai le fasi a le Atua i ulumatua o Israelu ae fasiotia na o ulumatua o Aikupito, o le taui o le loto tetele i le Atua, (2) o le Tausamiga o Fale Apitaga – Feast of Tabernacle – Sauniga e famanatu ai taimi o maumausolo le nuu i le vao i le faigamalaga mo le 40 tausaga, (3) o Tausamiga o Iligapu - Feast of Trumpet – sauniga e faamanatu ai le taua o le faalogo ma usitai i leo o pu ao feagai Israelu ma taua i le faigamalaga mai Aikupito. O ia Sauniga Faapitoa e tasi lava le faamoemoe: **o le manatua pea o le Alofa o le Atua na taitai ai Israelu mai Aikupito agai i Kanana.**

O le ituaso tonu lea na tupu ai le vaaiga e pei ona faitauina. Ua afio ifo le Agaga Paia o le Atua, e pei o laulaufaiva peiseai o le

afi ua vaevaeina, ua nofo i luga o i latou o ē na faatalitali ma le loto gatasi i Ierusalem. O le upu – loto gatasi, o lo o faamatala ai le faatuatua o tagata na faatalitali i Ierusalem e tusa o saunoaga (**Galuega 1: 4, Ioane 15:26 ma le Luka 24:59**) a Iesu e faatatau i le auina ifo o le Agaga Paia o le Atua e fai ma fesoasoani mo i latou. O le faamamafa o lenei aso, o loo tulimatai ai foliga vaaia o le Agaga Paia o le Atua – ua tino mai e pei o LAULAUFAlVA AFI. O nisi o tala o le Tusi Paia, o lo o faamatala ai le Agaga Paia o le Atua, ua tino mai e peiseai se lupe. A o le lupe o le faailoga o le Filemu. O le fesili lea o lo o tulimatai i le tatou mataupu: **Aisea ua foliga ai le Agaga Paia o le Atua e peseai o Lauaufaiva Afi ua vaevaeina?**

O le Afi o le isi lea vaega taua o le lalolagi lenei tatou te i ai. Ma ua iloa foi le aoga o le afi i le soifuaga o aso uma. I lomiga lava ia o le Tusi Paia, e lua ni aoga tetele o le Afi. (1) O le Afi na te aveese ni mea lē aoga ina ia iloa tonu se mea aoga/taua: f.t. susunuina o le auro i le afi, ia maua le auro mo'i. (2) O le Afi e faaumatia ai ni vaaiga/faatinoga lē lelei i le silafaga a le Atua: f.t. afi na susunuina ai Sotoma ma Komoro ona o uiga agasala i luma o le Atua. O aoga taua ia o le afi e i tala o le Tusi Paia, o loo atagia foi i le tala na faitauina. Manatua, o tagata o loo faatalitali i Ierusalem, o tagata Iutaia faatasi ma tagata o nuu ese – (**f.9-f.11**). O lona uiga, e moni lava o lo o taua so latou faatuatua, peitai, o lo o i ai foi ma le faalotolotolua ona o faiga faavae ma tulafono a nuu ma siosiomaga o loo aumau ai. Mo tagata Iutaia lava ia, e lē matua saoloto le avee ma Kerisiano ae sili ai ona lē mautonu tagata o nuu ese i tala e faatatau ia Iesu Keriso.

O le afio mai la o le Agaga Paia, e peseai o le Afi, o le faamoemoe lea, (1) ia susunuina talitonuga sese ma faiga o lo o taotaomia ai le ola talitonu o tagata ia Iesu Keriso. (2) o le Agaga Paia na te faaumatia talitonuga ma faiga o loo faapogai ai le ola masalosalo o tagata i le Atua ma lona finagalo. Peitai, o lea ua tauemu nisi ma fai mai: “Ua ona nei tagata i le uaina fou suamalie” – o le tali foi lea a Elia ia Hana ao tatalo Hana i le Atua – 1 Sam 1:14.

A fa'aauau le faitau i le tala, na iloga lava le malosi o le Agaga Paia, ina ua mafai e nei tagata uma ona malamalama o le isi tagata i le gagana a le isi tagata. O le potou ma le iloa ua maua, ona o le Mana o le Agaga Paia o le Atua. (Ken 11:1- 9 na faaeseeseina ai e le Atua gagana a tagata o le galuega (Papelu) na faia e aunoa ma le Agaga o le Paia o le Atua. Ao lea ua toe aumai e le Atua le iloa ma le potou i le tagata e mafai ona fesootai i isi uso a tagata, e ala i lona Agaga Paia). O le finagalo o le Atua, ia salalau atu le Tala Lelei. Ia iloa e tagata uma le Tala ia Iesu Keriso. Ia lē na o le Iutaia, ae ia so'o le lalolagi uma.

O lo o taua lava i tusi atoa o Galuega a le Au Aposetolo le malosi ma le matautia o galuega na faia e le Agaga Paia. Na susunuina loto maa ma loto tetee o tagata le talitonu, ae liua e avea ma so'o moni o Keriso.

O i foi, o lo o faamauina ai le faavae o le Uluai Ekalesia a Keriso i le lalolagi. O i latou ua toia i le Agaga Paia, ua fai ma vaa ma ipu e faailoa atu le finagalo o le Atua i le lalolagi uma e oo mai i o tatou aso. O le Agaga Paia o le Atua ua tino mai peseai o se Afi, ina ia susunuina o tatou loto faigata ma loto masalosalo i le Atua ma ia faaumatia ni faiga agasala o naunau i ai o tatou loto. O le faamoemoe, ia avea i tatou ma tagata moni o Keriso, e tala'i atu lona finagalo i tuluiga uma o le lalolagi.

GALUEGA FAATINO: Fa'aali Manatu

E faapefea ona e iloa ua ia te oe le Agaga Paia o le Atua? – Tali: E mafai ona iloa i au galuega faatino ma upu e te tautala ai. Aua e leai ni faiga lē lelei e faia e le Agaga Paia o le Atua. O lona uiga, o le tagata e faia amio lē lelei, o le tagata ua leai se Agaga Paia o le Atua.

PESE: *Pese ma Viiga: 107 – Ia faamaligi mai....*

A'OA'OGA:

1. O le Agaga Paia lo tatou fesoasoani sili.
2. O le Agaga Paia e susunuina ma faaumatia faiga agasala tatou te faia.
3. Ia faamoemoe i le Agaga Paia o le Atua e taitai i tatou i ala tonu ia ia finagalo i ai.

.....

ASO SA: **7 IUNI 2020**

MATAUPU: **MAUGA UA MŪMŪ**
(A mountain ablaze)

SINI: Ia a'oa'oina le fanau ia iloa le faamoemoe o le fetalai mai o le Atua i le mauga ua mūmū.

TUSI FAITAU: Teuterename 4:9-14

FESOASOANI MO FAIAOGA:

O le tusi o Teuterename o loo toe faamanatu ai e Mose i le nuu o le Atua mea uma lava na tutupu a o agai mai le malaga mai Aikupito. O le toe faamanatu i vavega na faia e le Atua i taimi o le fia aai ma le fia inu faatasi ma taimi e fetai ai ma nuu malolosi, o le Atua lava na tu i matagi'olo aua le manuia o Isaraelu. O le isi vaega tele o lo o talanoa ai Mose, o tulafono ma ona aiaiga. O tulafono e sefulu (10) na tuuina ifo i le mauga o Sinai/Horepa. O tulafono ia o lo o faamanatu pea ma faamanatu pea i le nuu, ina ia tausiusi ma mulimulitai i ai, mo le manuia agai i luma.

O le tala faatatauina o lenei aso, o lo o toe faamanatu ai e Mose i le nuu le vaaiga na latou iloa i le mauga ua mūmū ao fetalai mai le Atua mo ona tagata. O le faamoemoe o le Atua: *Ia ola*

matatau le nuu i tulafono na tuuina ifo i aso uma. Ia lē gata e matatau i latou o tagata matutua, ae ia latou aoao atu foi i a latou fanau tulafono ma vavega ua vaavaai i ai o latou mata ao faia e le Atua. O le upu – mata'u- o le fear of the Lord. O lona uiga, o le iloa e le tagata ona ava ma faaaloalo i lona Atua. E iloa faapefea le ava ma le faaaloalo i le Atua? E iloa i le amio lelei ma ola i tulafono ua faataoto mo le manuia o le nuu. O le toe faamanatu a Mose i le nuu, ia manatua tulafono faatasi ma le feagaiga na osia i le Mauga o Sinai/Horepa. O le naunau mai o le Atua ia ola mata'u le tagata ia te Ia, e lē o se mea e faia fua. Aua o le tagata e tumau lona loto i le Atua e ala i le ola ma tausi i tulafono, o le tagata manuia lea. Ao le tagata e lē mata'u i le Atua, e iu i le faafanoga.

O le mataupu o lenei aso, o lo o faataua ai le manatua pea o le faaali mai o le Atua ia i tatou. O le Tala Lelei ma vaaiga o loo iloa ai le Alofa o le Atua mo oe. Ia lē gata e manatua nei, ae ia a'oa'o ai foi isi tagata, ina ia latou iloa ai le Alofa o le Atua o loo tatou tapuai i ai. I tatou le fanau, e tele lava vaaiga i lou olaga e fai ma molimau o le Alofa o le Atua. E oo mai lava i le taeao lenei, o mea uma ia na faia e le Atua mo i tatou. Auā poo le a lava le tausiga a matua ma o tatou aiga, a lē aunoa ma le Atua e leai se mea e lelei. E tatau foi ia i tatou le fanau, ona tatou iloa ma manatua se faafetai i le Atua ona o lana tausiga i lo tatou ola. O le faamanatu foi lea a Mose i le nuu, aua nei galo le Alofa o le Atua. O vavega na vaavai i ai mata. O tulafono na fetalai mai ai le Atua i totonu o le mauga ua mumu, o mea uma ia e tatau ona teu malu i le loto o le Isaraelu, ma ia ola ai. O le faamanatu taua lea o le tatou mataupu: Ia e manatua le Alofa o le Atua.

GALUEGA FAATINO: Fa'aali Manatu

Tuu le avanoa i fanau e faasoai ai ni vaaiga poo ni mea na tutupu i o latou olaga, o loo fai ma faamanatu ia i latou le Alofa o le Atua.

PESE: Pese ma Viiga 73 – E le alofa o Iesu....

A'OA'OGA:

1. Ia e manatua le Atua i aso uma o lou ola.
2. A'oa'o atu i isi tagata le Alofa o le Atua.
3. Aua nei galo sau faafetai i le Alofa mai o le Atua ia te oe.

.....

ASOSA: 14 IUNI 2020

MATAUPU: UA MATALA LE FAITOTOA
(*A door opens*)

SINI: Ia a'oa'oina le fanau ia faatuatua i le faitotoa ua matala ma o lo o matala pea mo i latou.

TUSI FAITAU: Mataio 7:7-12

FESOASOANI MO FAIAOGA:

O le tusi faitau o lenei aso, o se vaega o upu o le lauga a Iesu i luga o le mauga e pei ona faamauina e Mataio. O lo o talanoa Iesu i le taua o le saili ma le faatuatua i faamanuiaga a le Atua auā o lo o matala pea le faitotoa mo tagata uma. E tolu veape po o upu galue o lo o faamamafa e Iesu i lana fetalaiaga: (1) Ia ole atu - ask, (2) Ia saili - seek, (3) Ia tu'itu'i – knock. Afai e faia ma faatino mea ia e tolu, ona mautinoa lea ua maua le tali o lo o saili. O upu galue nei (ole atu, saili ma tu'itu'i), o lo o aumai i le gagana Eleni, o upu galue faifaipea. O lona uiga, ia aua nei faatasi pe faalua ona ole atu, pe saili, pe tu'itu'i foi. Ae ia faia pea i aso uma ma taimi uma. Ia aua nei fiu gofie. O a foi faigata e fetalai ma le ola saili o le tagata mo se fesoasoani, ia tu'itu'i pea ma le loto faatuatua aua o le faitotoa o faamanuiaga mai le

Atua, o lo o matala pea mo tagata uma. I le faatinoga o fetailaiga ia a Iesu, e moomia lo tatou galulue e faatino le sailiga. Ia le gata tatou te ole i le Atua mo le fesoasoani, ae tatau foi ona tatou saili po o fea e maua ai le fesoasoani. O le sailiga o lo o faia e le tagata, e lē na o le faatasi pe faalua ona saili nofonofo loa. Leai, o lo o manino lava i le fetalai mai o Iesu, ia tu'itu'i.

A tuu mai i le soifuaga lenei tatou te i ai, e lē faigofie ona faatino le ola saili i manuia o le Atua. A silasila foi i le olaga o aso uma, o le isi lea vaivaiga tele o lo o iloa i nisi o tagata. E fiu gofie e saili. E vaivai le ola tatalo po o ole atu i le Atua. E augata ma faatutugata e tu'itu'i ma tu'itu'i pea i le Atua. E fetaitai loa ma faafitauli, vave a ona musu ma faavaivai.

Peitai, o lea ua manino le fetalai mai o Iesu: *“afai tou te avatu o mea lelei ia outou fanau, e lē sili ea ona foaiina mai e le Tama o i i le lagi o mea lelei i e ole atu ia te ia?”*

Silafia lelei e Iesu, e pele fanau i loto o tagata. O a lava mea taugata ma mea anagata e manao i ai le fanau, e ave lava i ai. Tusa lava pe iloa e utiuti ai le faasoia, e faamuamua lava le manao o fanau. O le ata faigofie lea ua aumai e Iesu e faamatala ai le foai a le Atua i le tagata. E ui e lē mafaatusaina le foai a le Atua i le foai a matua i fanau. Ua fetalai Iesu, *e lē sili ea ona foaiina mai e le Tama o i i le lagi o mea lelei i e ole atu ia te ia?”*

I tatou le fanau, e ui i le lelei o mea e foai e matua mo i tatou, ae silisili lava ona lelei o mea e aumaia e le Atua mo i tatou. O le soifuaga lenei, e lē faigofie le ola saili. Ae faigofie mea uma, pe afai tatou te faatuatua i le mana o le Atua e aumai le malosi, o le lototele ma le onosai, tatou te saili ai i ona manuia ua folafola mai. Tau ia moni o tatou loto saili i le Atua, aua o le faitotoa lava o manuia, o le faitotoa e matala ma e matala pea e oo i le faavavau. Ao le faafitauli, e lē o tagata uma e maua lea faitotoa o faamanuiaga. Ua na o le tagata ua faatuatua lona loto e tatalo ma ole atu tusa lava pe faatuai ona tali mai o le Atua. O le isi mea taua ia iloa e tatou le fanau, e i ai mafuaaga e tatau ona tatou iloa e mafua ai ona faatuai mai le Atua i mea tatou te mananao ai. (1) E le o moni lo tatou loto faatuatua i le Atua ma

ana foai. (2) Ua silafia lelei e le Atua, e le o se mea e lelei ai i tatou lea tatou te ole atu ai. O lona uiga, e tatau ona mafaufau atili o tatou tagata pe afai e faatuai ona maua le tali o lou manao. Aua o le mea moni, e alofa le Atua i tagata uma. E faafogaina foi e le Atua la tatou tatalo. E matala pea foi le faitotoa o faamanuiaga mo i tatou. Pau le mea ua manino i le finagalo o Iesu, ia saili ma le loto faatuatua ona maua lea.

GALUEGA FAATINO: Fa'aaliga Manatu

“E leai se mea lelei e maua ma le filemu” – Faasoia manatu o le vasega i le faamaoni o nei upu pe a faatusa i le olaga aoga ma le olaga faigaluega o lo o i ai i le taimi nei.

PESE: Pese ma Viiga: 177 – Galue ia seia uma ai...

A'OA'OGA:

1. O loo matala pea le faitotoa o faamanuiaga mo i tatou o tagata faatuatua.
2. Aua le fiu e saili manuia o le Atua.
3. Ia saili ma le loto faatuatua i le Atua ma ana faamanuiaga.

.....

ASO SA: 21 IUNI 2020

MATAUPU: FAATUATUA MA LE FEFE
(Faith and Fear)

SINI: Ia a'oa'o le fanau ia malamalama o le faatuatua itiiti e tupu ai le fefe.

TUSI FAITAU: Mataio 8:23-9:1

FESOASOANI MO FAIAOGA:

O le tusi faatatauina o lenei aso, e lua tala o lo o tau faamanino ai e Iesu le fesootaiga o le faatuatua ma le fefe. O le tala muamua - *Mataio 8: 23-27*, o lo o faamatala ai le fefefe o le au so'o ina ua to mai le afā tele i le vai ma fesouaina ai le vaa. I le finagalo o Iesu, e lē tatau i le au so'o ona popole pe fefefe, aua o i latou o ona so'o. O e ua filifili e mulimuli ia te Ia. O i latou foi ia, na vaavaai i vavega e pei ona Ia muai faia: faamaloloina o le lepela – f.1-4, faamaloloina o le auauna a le taitai a le to'aselau – f. 5-13, faamaloloina o le tina o le toalua o Peteru na maua i le ma'i vevela – f.14-17. Peitai, o lo o manino lava i le tala, le fefefe o le au so'o ma le fememea'i ona o le fesouaina o le vaa i le matagi tele. Ua fetalai Iesu: *“se a le mea ua outou matatau ai, outou e faatuatua itiiti?”* Ua manino i le saunoaga a Iesu, o le fefe ma le popole e mafua o le faatuatua itiiti poo le leai foi o se faatuatua. Peiseai ua faapea atu Iesu, *ana malosi lo outou faatuatua semanu tou te le fefefe.*

O le tala lona lua: *Mataio 8: 28-9:1*, o loo faamatala ai le fefefe o le motu o tagata ona o le vavega na faia e Iesu i temoni ma le lafu puua. O le manao o temoni, ia tuli i latou i le lafu puua pe afai o le a faamaloloina le tagata. Na faapea lava ona faia e Iesu, peitai, na mamate uma ai le lafu puua ona ua paū i le tofē. O le vavega na molimauina e tagata fafaga puua, ona latou ta'u lea o le tala i le nuu ma i latou e ana lafu puua. O le taunuu ane o tagata o le nuu, na latou aioi ai ia Iesu e alu ese ma lo latou nuu – f.34: *“Faauta foi, ua o uma mai le aai e faafetaiai ia Iesu; ua latou iloa o ia, ona latou aioi mai ai lea ia alu ese o ia i lo latou nuu.”* O le aioi po o le augani e afua ona o le fefefe i le vavega ua faia e Iesu. Ona latou tuli ese lea o le Alii mai lo latou aai.

Ua a'oa'o mai nei tala ma le faitauga o lenei aso, e tupu le fefe ona ua leai se faatuatua po ua itiiti foi le faatuatua. O lona uiga, a malosi le faatuatua ua leai se fefe. Ana malosi le faatuatua o le au so'o semanu latou te le fafagu ia Iesu, ae faamalū e i latou le matagi. Ana malosi ma tele le faatuatua o le nuu, semanu latou te lē tuli ese Iesu mai lo latou nuu, ae taofi Iesu e fa'aaauu pea

ana galuega e tutuli ese ai temoni eseese o lo o i totonu o le nuu. Mo i tatou le fanau, e lagona le fefe, ona ua vaivai le ola faatuatua. Ae maua le malosi e finau ai i le mea moni ma saili le manuia, ona o le faatuatua i le Atua auai mai i taimi uma. E tele nisi aoaoga e mafai ona maua mai lenei tala e pei:

1. O le Atua e pule aoao i mea uma: o le matagi ma temoni e pule aoao ai le Atua.

2. E sili atu le alofa o Iesu i le tagata soifua i loo le lafu puua. O lo o i ai le faitauga, o le lafu puua, o le lafu puua a le tagata mauoa. I le tusi o Mareko 5:6-13 o lo o taua ai le lafu puua e 2,000. O le lē fiafia o tagata o le nuu, e le gata o le fefefe i le vavega a Iesu, ae peiseai ua manumanu tagata i puua. I le finagalo o Iesu, e sili atu le faasaoina o le ola e tasi o le tagata na uluitinoina e Lekeono – (o lona ugia e tele temoni) i lo o le lafu puua e 2,000 ua mamate i le tofē.

Peitai, o le faataua o lenei aso: O le faatuatua itiiti e mafua ai le fefe. Ao le faatuatua ua mausali e tupu ai le lototele, o le mafanafana ma le malosi e finau ai i matagi malolosi ma faiga a le tiapolo o lo o faaososoina i tatou o tagata faatuatua ia Iesu Keriso.

GALUEGA FAATINO: Finauga -Debate

“O le faatuatua itiiti e tupu ai le fefe” – Vaevae le vasega i vaega e lua: tama ma teine. Finau tama e sa'o le manatu autu ae finau teine, leai e sese.

PESE: *Pese ma Viiga: 224 – Le masalosalo ia tia'i ai!*

A'OA'OGA:

1. O le faatuatua itiiti e tupu ai le fefe.
2. E sili le alofa o le Atua ia i tatou i lo o se isi lava mea o le foafoaga.
3. E pule aoao le Atua i le lagi ma le lalolagi.

ASO SA: 28 IUNI 2020

MATAUPU: O LE SILAFAGA A LE ATUA MA LONA AGALELEI
(*God's sight and God's goodness*)

SINI: Ia a'oa'o fanau ia malamalama o le silafaga paia a le Atua na Ia faia ai mea uma i le lalolagi atoa ma le lalolagi.

TUSI FAITAU: Kenese 1: 1 – 5

FESOASOANI MO FAIAOGA:

O uluai mataupu e lua o le Kenese e mafai ona faitauina faapei o se solo, ia po o ni mafauauga ua faavae lelei mai lona faasologa, e faatatau tonu i le amataga o le foafoaga, ma o lo o aumai manino ai le ata o le mataisau o galuega mamana a le Atua foafoa. O nei tala sa finauina i le tele o senituri ua mavae o se faailoga o lo o i ai le malosiaga e faatinoina ai so o se mea. E faapena le tala o le foafoaga lea ua taofia ai le tele o finauga i le foafoaga ma le ola ai o mea uma. E ese mai ai i lea, ae ua matauina ai foi ni itu taua se tolu mai lenei mataupu. Muamua o mea uma ua lelei ua silafia e le Atua, lona lua, o le silafaga a le Atua, sa ia tagi lava mo le lelei o le foafoaga uma, ma le lona tolu, o le silafaga a le Atua ma lona agalelei e o faatasi ma galulue faatasi.

I le mataupu muamua lava ia o Kenese, na silasila le Atua i mea eseese uma o le foafoaga ua lelei lea. O le malamalama, o le laueleele, o le sami, o laau aina, meaola o le vao, ae muliai i le tagata soifua. E amata mai la i le uluai malamalama, se ia faaiu i le tagata soifua, o mea uma ua matagofie ma lelei, sa i ai atoa lava lea i le silafaga manino a le Atua. O le silafaga a le Atua, e silasila mo le lelei atoatoa o mea uma.

Pe e te manatu la o le agalelei o le Atua, o lona faanaunauga lea ina ia saili ai le atoatoa ona lelei o le foafoaga?

Ioe, a o tatou i ai i le amataga o lenei vaiaso ma le tatou matau i ai, o le avea o i tatou ma tagata faatuatua e mulimuli i le Atua e tatau ona suia ma fetu'unai la tatou vaai ina ia o faatasi ma le silafaga a le Atua, tatou te saili ai foi mo le lelei o le foafoaga a le Atua. O i tonu lea e valaauina ai i tatou ina ia manino la tatou vaai faanenefu o lo o i ai, tatou te mautinoa ai, o lo o tatou tuuaifuaina ma taufaifai i nisi ona o o tatou lava manatu vaivai ma le faatauva. Peitai, o le finagalo o le Atua, e ao ona manino lo tatou vaai ina ia tatou iloa lelei ai o le silafaga a le Atua ma lona agalelei e o faatasi ma galulue faatasi. E ao foi ona faapea i tatou ona tatou ola ai.

GALUEGA FAATINO: Taliga Fesili

1. O le a se taua na uluai fai ai e le Atua le malamalama?
2. O a ni feau taua ma le aoga o lo o aumai i le vaega o le tala i le foafoaga sa faitauina?
3. O a ni vaaiga sa i ai muamua a o lei faia e le Atua le lalolagi.
4. Aisea e finagalo ai le Atua ia fai ia lelei mea uma o le foafoaga?

PESE: 24 (Pese ma Viiga)

A'OA'OGA:

1. Na faia e le Atua le lalolagi ia lelei.
2. E alofa ma agalelei le Atua ia i tatou uma.
3. O le Agaga o le Atua e mafai ai mea uma.

.....

ASO SA: 5 IULAI 2020

MATAUPU: O LE ATUA FAIMALAGA
(*A travelling God*)

SINI: Ia a’oa’o fanau ia malamalama ma ia naunau ia avea le Atua ma o tatou taitai malaga, i so o se mea tatou te faimalaga ai. Ona mautinoa lea e manuia ai faamoemoega uma.

TUSI FAITAU: Numera 4: 4 – 16

FESOASOANI MO FAIAOGA:

So o se taimi e sauni malaga ai nisi, ma so o se faamoemoe taua, faapei o taaloga, o se faiva i le tai, po o se faiva i le vao, ia pe faimalaga foi i ni tafaoga i se nofoaga, ina ia aua nei faaletonu pe faamanupoiā i ofaga ona o le faatamala ona tapenaina o se faigamalaga.

A o i ai le nuu o Isaraelu i le la latou malaga i le vao, e tulaga ese foi a latou tapenaga, aua e le gata ina tapena faatasi a latou meatotino ma faleie ae latou te faimalaga faatasi foi ma tauave le falefetafai po o le malumalu e afio ai le Atua. I le Esoto, o i lo o faailoa manino mai ai faatonuga mo le fausiaina o le malumalu. O le Atua e mamalu ma paia e afio faatasi ma ona tagata i lona malumalu ma e matua paia lava ma mamalu lona Afioaga. O le malumalu o le faailoga vaaia lea o le auai o le Atua faatasi i le feagaiga ma ona tagata faatuatua.

Fai mai a o i ai le nuu o Isaraelu i le latou malaga mai le faafanoga mai Aikupito e agai atu i le faaolataga i le nuu na folafolaina. i totonu o le va lea, na latou malaga ai i le vao, o se nofoaga e tofotofoina ai le faatuatua. Na faailoa ai e le Atua lona auai ma lotolotoi faatasi i la latou malaga. Ua iloa foi ii i le teuina ma le tapenaina o le malumalu e le au sa Levi, e le soona pai i ai se tasi aua e fano ai, o le faailoga o le paia ma le mamalu

silisili ese o le Atua. O i foi o lo o ua faamanatu mai ai pea i ona tagata e ala i lona auai mai, faatasi ai ma lona finagalo e ao ona teufatu lea i aai o finagalo ma faamoemoe o ona tagata faatuatua uma.

GALUEGA FAATINO: Tusiga tala

- 1) Tusi mai sau parakalafa se tasi e faamatala mai ai poo a galuega faapitoa e faia e Arona ma ona atalii.
- 2) Faamatala mai pe mafua i se a ona le fetagofi le fanauga a Koato i mea paia o le malumalu, ae po o a a latou galuega e fai?

PESE: Pese ma Viiga 165

A’OA’OGA:

1. E manuia mea uma pe a tatou faimalaga faatasi ma le Atua.
2. Ia mama o tatou loto ia Afio ai le Atua.
3. E mamalu ma silisili ese le Atua.

.....

ASO SA: 12 IULAI 2020

MATAUPU: O LE TAU O LE SAOLOTOGA
(*The cost of freedom*)

SINI: Ia a’oa’o fanau ia malamalama o le saolotoga tatou te maua mai i le Alii. Po o a fita ma faigata e feagai ma i tatou, ia tatou onosai ma faatuatua pea i le Alii aua e tausia i tatou e Ia.

TUSI FAITAU: Numera 11: 18 – 23, 31 – 34

FESOASOANI MO FAIAOGA:

I le soifuaga lava ia e le tumau pea i sona lelei i taimi uma. E i ai taimi e feagai ai ma luitau o le olaga. E le faapea foi o le avea ma Kerisiano e sa ona oo mai ai faigata ma puapuaga e leai. Peitai a tumau i le faatuatua ma faamoemoe i le Atua, ona mautinoa lea tatou te taunuu i le saolotoga moni.

O le tusi o Numera mataupu 11 – 25, o lo o faamatalaina mai ai le malaga a le nuu o Isaraelu mai Aikupito i le mea sa nofo pologa ai. O le malaga mai le nofo pologa agai i le saolotoga. O lo o faamatalaina mai le malosi o le muimui o le fanauga a Isaraelu ona o le tuinanau i meaai atoa ai ma le ola masalosalo i le taitaiga a Mose i le latou malaga. O le latou ola muimui ua atili ai ona faatuputeleina ai le toasa o le Atua, na afaina ai i latou.

E i ai le talitonuga a le au suesue o le Tusi Paia, o le tusi a Numera. Sa faatoa tuufaatasia ina ua maea le tafeaga. Sa suesueina foi e tagata le mafuaaga na faatamaia ai le malumalu, ma le aai o Ierusalem ae na mafua lava i le toasa ole Atua. A toe tepa i tua i le faigamalaga a Isaraelu. Sa tele tofotofoga ma fita sa feagai ma le nuu, faapea taitai o le nuu. O le muimui ai o tagata ona ua le lava le onosai, sa muimui ona ua latou le iloa poo fea o taitai i ai e le Atua i latou. (Unbelief)

Ae o se feau taua ua aumai e ao ina tatou tumau pea i le talitonu ma faatuatua i le Atua aua o Ia na te saunia le saolotoga manuia mo ona tagata. Ia mautinoa foi le onosai ma faamoemoe i le taitaiga a le Atua tusa lava po o a fita ma faigata o le ola ia onosai pea i le tau o le saolotoga. Ua faataoto e le Atua mo le tagata faapea foi ona faia e Iesu i le faaolataga mo le lalolagi uma.

GALUEGA FAATINO: Tusiga Solo/Pese

- (i) Tusi mai sau solo po o se pese, ia lua pe tolu fuaiupu tai 4 laina e faailoa mai ai po o le a le tau o le saolotoga o lo o aumai i le tusi faitau.

PESE: Pese ma Viiga 244

A’OA’OGA:

1. Ia ola faapaiaina i tatou mo le galuega a le Alii.
2. Ia tuu ese le tuinanau imanaoga o le tino.
3. Talitonu ma faatuatua, o le Atua e tausia i tatou.

.....

ASO SA: 19 IULAI 2020

MATAUPU: AUA LE POPOLE (*Don’t panic*)

SINI: Ia a’oa’oina le vasega ina ia iloa o le lagona popole e faalumaina ai, ma e le maua ai se nonofo lelei i totonu, o aiga nuu ma le Ekalesia.

TUSI FAITAU: Numera 22: 1-14

FESOASOANI MO FAIAOGA:

O le popole, o se lagona e maua i so o se tagata soifua, o le fesili tamaiti. O a ni taimi e pito sili ona maua ai lea lagona ia te oe?. Ia lelei, o le taimi o suega, o le taimi e te faia ai se gaoiga le talafeagai ma le vaai a ou matua, o le taimi o tau o afa ma matagi malolosi, o itu aso ma taimi ia e maua tele ai i tatou i uiga ia o le popole. E atagia mai ai, o le popole e vaavaalua ma le lagona fefe, atuatuvaale ma le lē mautonu. E foliga mai foi e ala ona tutupu nei lagona, o le lē lava tapena, e pei o suega, a le lava le suesue, e te popole aua foi ua e le mautali i fesili e fesiligia ai oe.

A oo ina ta ta mai ni afa ma matagi malolosi, e lagona foi le popole pe afai e le mautu o tatou fale, e lagona le fefe pe a uu

matagi ma tofaata'uta'u le agi o savili. Molimau se tasi o tamalii sa i ai i le taimi tonu o le Tsunami na aafia ai le atu Aleipata, o le toatele o soifua na maumau ai, e mafua mai i le popole, o le lē mautonu, ua na ona vaavaai atu i galu ae ua le iloa le mea a fai. O le ogaoga lena o mea e tupu mai i le popole, e oo lava ina maimau ai le ola.

O le vaavaai mai o Palako le tupu o Moapi i le agai atu o Isaraelu, o se matagi agi malosi e faaleagaina ai fale, o le laufanua ma le ola o tagata. Faatoa uma ona fasia e Isaraelu le nuu o sa Amori, e oo atu i Vasana, ao lea ua aga atu i Moapi, o le popole vale ma le le mautonu o Palako, na ala ai ona ia aami ia Palaamo e fetuu i le nuu o Isaraelu, ina nei o atu ma fasia foi i latou.

O le faamamafa o le mataupu o lenei aso, Aua le popole vale, leaga o le popole ma le fefe o Palako ma le nuu o Moapi na afua ai ona manatu e fetuu i le nuu. Peitai e le o iloa e Palako o le nuu lenei o le nuu ua faamanuia I ai le Atua. O le ala lea o le ta'ua i le tatou Sini o le lagona popole, e faalumaina ai ma e le maua ai foi se nonofo lelei.

O le fetuu ma le faamanuia sa tupu tele i le taimi o le Feagaiga Tuai ma ua iloga foi i latou e faia lea matafaioi. E pei la o le tagata lenei o Palaamo, na auina iai e Palako le feau ina ia sau ma fetuu ia Isaraelu. Sa manatu lava Palako o le a usitai mai Palaamo ia te ia, ae o le finagalo o le Atua, e le mafai lava e seisi malosi ona faatoilaloina le nuu ua uma ona ia faamanuia i ai.

E leai ma se mea lelei e tupu mai i le popole, o le atuatuvaile ma le lē mautonu, na o le faatupu misa, faatupu vevesi ma le maua ai se nonofo lelei. O le a'oa'oga foi lea o lo o aumai i le mataupu o lenei aso. E avea lo tatou popole ma ala e galo ai Ia i tatou ona faia mea lelei mo nisi o tatou uso. E avea foi le atuatuvaile ma le fefe e ono tutupu mai ai ni faalavelave ogaoga.

E mafai foi e le popole ona taofia i tatou mai le alofa atu i nisi o tatou uso a tagata, tatou te popole e foai atu ina nei le toe maua mai se mea, e faapena le mea o lo o tupu i lo tatou lalolagi,

toatele faimai o Kerisiano ae ua le mafai ona foai atu mo e o manaomia le fesoasoani.

Aisea e mafua ai ona tatou popole, o le lē lava tapena i taimi faigata o le soifuaga nei. Faapena lo tatou soifua faa Kerisiano, e lagona le popole pe a le mau i le Atua lo tatou faatuatua. O le faatuatua o le auupega sili lena mo le Kerisiano, peitai o le faatuatua e o faatasi ma galuega. E ala ona e popole i taimi o suega, o le lē faia o se meaaoga, e ala ona popole pe a oo mai matagi, o le lē mautu o tatou fale. E mafai ona tatou alo ese mai i lea lagona, pe afai tatou te tutumau ma le lē faagaetia i le faia o le finagalo o lo tatou Atua.

Tamaiti, o Iesu Keriso na ia faasaturoina faatasi nei lagona ma ia i luga o le satauro, le lagona popole ma le atuatuvaile i le taufaafefe mai o le oti, ua faaleagaina e Iesu ina ua toe soifua manumalo mai i le oti ma le tuugamau. O le atoaga lena o lo tatou faatuatua ia te ia le Alii o le toetu ma le ola.

GALUEGA FAATINO:

Ia faia se faatinoga o le faitauga o lenei aso, ma ia atagia mai ai le popole vale o le tupu o Palako.

PESE: 231 Pese ma Viiga

A'OA'OGA:

1. O le faatuatua e o faatasi ma galuega
2. Aua le popole vale, e faalumaina ai.
3. E leai se mea e faigata i le Atua pe a tatou faatuatua ia te Ia.

.....

ASO SA: 26 IULAI 2020

MATAUPU: TALI ATU I LE LOTO E TASI
(*Answering as one*)

SINI: Ia a'oa'oina le vasega ina ia malamalama o le mataupu o lenei Aso Sa, o lo o faamamafa ai o le faalogo ma le usiusita'i ma le galulue faatasi mo se manuia o aiga, nuu, Ekalesia ma le atunuu.

TUSI FAITAU: Esoto 19: 1-9

FESOASOANI MO FAIAOGA:

Ua tolu masina talu ona o ese mai Isaraelu mai i Aikupito le nuu sa nofo pologa ai, ona tolauapi lea e latalata i le mauga o Sinai po o le mauga o Horepa. Ona fetalai mai ai lea o le Atua ia Mose, ina ia toe faamanatu atu ia Isaraelu vavega tetele sa faia e le Atua ia te i latou i Aikupito. O le amataga foi lea o le tapenaga mo le nuu, ao sauni e momoli atu e le Atua i Kanana le nuu na folafolaina mo i latou.

Fetalai le Atua ia Mose, ia ta'u atu ia Isaraelu afai latou te matua faalogo i le siufofoga o le Atua ma tausi i upu o le feagaiga, ona fai ai lea o i latou ma oloa taua a le Atua. O le oloa taua o le mea e faapelepele i ai, faatusa ai fanau, o lona uiga o Isaraelu o le fanau faapelepele a le Atua, o le nuu ua filifilia e le Atua e fai ma ona nuu, o lona uiga o le feagaiga ua uma ona faamaufaailogaina ai o Isaraelu, o le nuu faamanuiaina. O le finagalo la o le Atua, o Isaraelu o lana oloa taua, e le o se oloa a le lalolagi, o le oloa e patino mo Ia. Pau lava le mea e finagalo i ai le Atua, o le matua faalogo i le finagalo o le Atua, o le faalogo e o faatasi ma le usitai, Ia faalogo ma usitai i le Atua ona faamanuiaina lea.

Ona alu atu lea o Mose e faailoa atu ia Isaraelu le finagalo o le Atua, na ia aami toaiina uma o le nuu ua ia faailoa atu ai foi

upu uma na fetalai ai le Atua. O le vaega tonu la lea o le tala, lea e i ai le faamamafa o le tatou mataupu. Fuaiupu e 8 o lo o faapea mai, Ona tali faatasi mai lea o le nuu uma, Matou te faia lava mea uma ua fetalai mai ai le Alii, ona momoli atu lea e Mose o le upu a le nuu i le Alii.

Ona tali faatasi mai lea o le nuu uma, o lona uiga ua au faatasi le nuu e faalogo ma usitai i le finagalo o le Atua, o le mea manaia lea, o le tutu faatasi o le nuu ma tali atu i le finagalo o le Atua, o le amataga o le sasaa mai o faamanuiaga a le Atua mo lona nuu o le faalogo ma usitai.

O le a'oa'oga lea o lenei tala tamaiti, o le galulue faatasi o le malosiaaga lea mo i tatou uma, e le mafai ona manuia aiga pe afai na o matua e o i le lotu, ae tafafao tatou, e le mafai foi ona manuia nuu, pe afai na o matai ae ese le mea e faasaga i ai aumaga, e le mafai foi ona manuia aulotu ma Ekalesia pe afai e eseese loto o le au galulue, o le faamanatu mo i tatou uma, ia tatou maua le loto e tasi, o le loto gatasitasi e afua ai ona tatou faalologo ma usiusitai i le finagalo Paia o le Atua mo i tatou.

Faailoa lo tatou faatuatua ia Iesu la tatou uo, e ala i lo tatou tali atu o le a tatou faia lona finagalo.

GALUEGA FAATINO: Taliga fesili

1. O le a le uiga o le upu laulata o lo o i le fuaiupu e 2
Tali: O le laugatasi e latalata i le pito i luma o se mauga.
2. O le a le finagalo o le Atua mo lona nuu?
Tali: Ia matua faalogo ma usitai Isaraelu, ma ia tausi i le feagaiga ua uma ona osia ma le Atua.
3. O le a le faamamafa o le tatou mataupu e pei ona i ai la tatou Sini?
Tali: O le faalogo, usita'i ma galulue faatasi e manuia ai aiga, nuu ma Ekalesia

4. Faapefea ona tali mai Isaraelu i le finagalo o le Atua?
Tali: O lo o i le fuaiupu e 8, Ona tali faatasi mai lea o le nuu uma, o lona uiga ua loto e tasi le nuu, e faalogo ma usitai i le Atua ma tausi i le feagaiga.

PESE: 91 Pese ma Viiga

A’OA’OGA:

1. O le faalogo ma le usitai i le finagalo o le Atua, e manuia ai o tatou olaga
2. Galulue faatasi aua le atinaeina o aiga, nuu Ekalesia ma le atunuu.
3. E fai i tatou ma oloa taua a le Atua, pe a tatou faalogo ma usitai i lona finagalo.

.....

ASO SA: 2 AOKUSO 2020

MATAUPU: FIFILEMU MA ILOA
(Be still nd know)

SINI: Ia a’oa’oina le vasega ina ia malamalama aua le popole pe a fetaia’i ma lu’itau o le ola, ae ia fifilemu ma iloa e alofa le Atua ia i tatou uma.

TUSI FAITAU: Salamo 46: 1 - 11

FESOASOANI MO FAIAOGA:

O le Salamo e 46 e i lalo o Salamo e ta’ua o Salamo po o Pese o Viiga, o ona faaupuga e atagia mai ai pei o se tagata o lo o vivii ona o se vavega ua faia e le Atua mo lona ola. A o le tala faasolopito o le Salamo lenei na tusia ina ua li’oli’o e le malosi

faa fitafita o Asuria le aai o Ierusalem e pei a faatafunaina. O le taimi o le lē mautonu, ma le lagona o le fefe, ina ua vaai atu i faiga sau a le malo o Asuria, Peitai, e le’i tuulafoaiina lava e le Atua lona nuu, e ui o le ala lea e aoa’i ai e le Atua lona nuu, o le fa’aaoga o isi nuu e faatafea ai ma faasaua ia i latou, ae o le Atua lava e telegese lona toasa ae tele pea lona alofa.

O upu tomua o lenei Salamo, o lo o faapea ai le fai Salamo, o le Atua, o lo tatou malu ia ma lo tatou malosi, e fai o Ia ma fesoasoani silisili i puapuaga. Ua silafia e le fai Salamo ana le seanoa le alofa o le Atua, e lē mafai ona malu lo latou ola, o le upu malu, e uiga tutusa ma le upu paolo, e le ogotia i latou e le vevela o le la, e le laina e le timuia foi, auā o lo o faamalumalu i ai le paolo o aao o le Atua. E manatu la le fai Salamo, po o a taua, o misa, o faamai, ma isi lava faafitauli ogaoga e fetaia’i ma le tagata, ia aua nei galo o lo’o i ai faatasi ma le alofa lavea’i o le Atua.

O le isi lea lagona faa le Atua, o le maua o le to’afilemu i le loto, o le filemu, o se lagona e tupu i totonu o le tagata soifua, e ala ai ona e fifilemu, ma to’a i taimi faigata. O le fifilemu ma iloa, o lou tuu i le Atua i lana pule aoao o mea uma, o a fita ma faigata, o le Atua ā e to’a ai mea uma, ma ia tatou iloa e leai se mea e faigata i le Atua.

Ua tatou i ai i le tele o suiga o nei aso, ua tele taua ma misa, va tau nuu ma aiga, faamasinoga i fanua ma Suafa, ua le maua ai se nonofo lelei, ua va tau atunuu, ua tauau ina le maua ai se filemu o le lalolagi. O lo o tatou i ai foi i suiga ogaoga o le tau, o le isi lea faafitauli matautia o lo o fetaia’i ma le lalolagi i nei taimi, o le pepesi mai o faama’i eseese ma aafia ai le soifua o tagata, ua tele soligatulafono ua aafia ai tupulaga, ma ua tauau ina a leai se fofo o nei faafitauli, o le lu’itau o lenei mataupu, Ia to’a i le Atua, o lona uiga ia fifilemu ma le lē faagaetia, o le filemu a le Kerisiano, e filemu le loto, ae le mapu lana tatalo, tatou te fesootai atu ai i le Atua i lona mana, e malutia ai i tatou mai faigata ma puapuaga.

Ma ia o tatou manatua ma iloa, po o a faigata e oo mai, o lo o lotolotoi ai i totonu ma le malosi o le mana o lo tatou Atua. Le

Atua e, o oe o lo matou malu ma lo matou malosi, fesoasoani mai ia matou saili pea i lou alofa tumau mo i matou, o lou alofa e i ai i totonu o puapuaga ma faigata.

GALUEGA FAATINO: Finauga (Debate)

Vaelua le vasega, o le isi itu e latou te ioeina o lo o i ai le filemu ma le alofa tumau o le Atua i totonu o puapuaga, a'o le isi vaega ia latou finauina, se fesili e faapea, O fea o i ai le Atua, i le taimi e tutupu ai faalavelave ma faigata i le soifua o le tagata?

PESE: And I know, Yes I know

A'OA'OGA:

1. O le alofa o le Atua i totonu o puapuaga.
2. Saili i le Atua ma le loto filemu, e ala i lau tatalo.
3. O le Atua o lo tatou malu ma lo tatou malosi.

.....

ASO SA: **09 AOKUSO 2020 Aso Sa o Tamā**

MATAUPU: **MALOLO ANE TE ISI (*Rest avile*)**

SINI: Ia malamalama tamaiti i le taua o le galue ma malolo.

TUSI FAITAU: Mareko 6:30-32

FESOASOANI MO FAIAOGA:

O le galue ma malolo o le mea lava na amata e le Atua, ina ua mae'a ona foafoaina e le Atua le lalolagi i le amataga. O le finagalo o le Atua, e ao lava ona maua se fa'asiligā malosi mo le tagata, ina mafai ai ona toe fa'aauau ana galuega o le isi aso fou.

O le tatou tusi faitau o lenei aso, o lo'o fa'amatalaina ai le fo'i ane o le auso'o o le Ali'i, ina ua mae'a se vaega o le latou fe'au na auina i ai i latou e lo latou matai. E pei ona ta'ua i le fuai'upu e 7-13, le telē o le galuega a le auso'o sa fai, e ala lea i lo latou tala'i atu o le tala i le malo o le Atua, ina ia salamo tagata uma ma talia lona o'o mai i le lalolagi.

Ua le gata i lea, ae ua latou tutuli fo'i temoni ma fa'amalolo mai e pei ona finagalo ai le Ali'i. O lo latou fo'i ane la ina ua uma la latou fe'au, ua manatu le Ali'i, ua vaivai i latou, ma e ao ina malolo. Lea la na ia fetalai atu ai loa i lona auso'o, ina ia latou o atu ia ise mea tu'ufua na o i latou lava ma Iesu, se'i maua sina malologa teisi.

Ae o i fo'i tatou te iloa ai le amanaia tele e le Alii o Iesu o le galuega a lona auso'o. Ua silafia lelei e Iesu, a tele le fiafia ma le olioli ise mea, ua galo ai le isi mea taua o le olaga. Aua o le itu'aiga lagona lea ua o'o i le auso'o, ina ua mafai ona o latou fa'atino mea ia na latou o atu e fai. Ua lagona i o latou loto le fiafia, ma ua manatu ai e fa'aauau pea, ae galo ai le tausiga o le malosi i le tino, o le mea pito sili lea ona taua. Aua a leai se malosi, o le a fa'aletonu fo'i le fa'atinoga o le galuega.

I le ma le isi mea taua lava e pei ona finagalo ai le Ali'i, ia le gata ia saili le malosi i le tino, ae ao lava ona saili foi i le Atua mo se malosi fa'asili mo o latou agaga, ina ia aua lava ne'i faigofie ona fa'avaivaia i latou e le fili, i le taimi e fa'atino ai la latou feau. O le taua lea o le malolo e tusa o le finagalo o le Ali'i o Iesu.

E taua le galue ma malolo. O lea ua tatou tulalata i le vaitau o le lotu a tamaiti, ma fa'asolo atu ai i su'ega fa'aiu o lenei fo'i tausaga. E matuā mana'omia lava le maua o sina malologa teisi mo oe le tama ma le teine aoga.

E tatau ona maua sina taimi ete alu ai e fai sina koloni, e ave'ese mai ai lou mafaufau mai le aoga, ae ia maua e lou mafaufau sina malologa teisi. Ia tausi lelei lou tino i taumafa e tatau, ma maua ai lou malosi. Ae aua le so'ona taumafa i meaai e te ma'i ai ma e maua ai i le ma'i moe.

Alu e talatalanoa i ou matua ini mea o e fia malamalama ai i le olaga fa'atama ma fa'ateine. Ae au ne'i galo, lou sa'ili malosi lea i le Atua e ala i lau tatalo. Toaga e faitau lau Tusi Paia i ou taimi avanoa, ma tatalo i le Atua mo lana faamalosi'au mo oe.

A e faia fa'apea, e mautinoa lava le maua o lou malosi fa'afouina, e tapena ai lou tino ma lou mafaufau ma lou agaga, aua su'ega fa'aiu ua lalata mai. Ae o le a avea foi oe e fai ma tama ma teine malosi, e mafai ona ola ai nisi tagata, e ala i lau fesoasoani e mafai ona ofo atu mo i latou

Manatua o Iesu a'o galue ai i le lalolagi, e le'i mapu lona malolo pea i lona Tama i taimi uma, ma maua ai lona malosi e fa'atino ai lana feau. Seia o'o lava ina fesaga'i ma le oti, ae o lo'o tatalo pea i le Atua e aumai lona malosi e fa'atino ai lana toe galuega i le lalolagi.

O lana malologa i le fanua o Ketesemane, na maua ai lona lototele, e fa'ataunu'u le finagalo o lona Tama, ina ia maliu e fa'amagalo agasala a le lalolagi. AMENE

GALUEGA FA'ATINO:

Tu'u le avanoa i tamaiti e fetufaa'i ai latou ini fesili e tulituliloa ai le mata'upu. E fai e le isi tamaitiiti se fesili, ae tali le isi. Ae fesoasoani lau susuga a le faiaoga e fa'amalamalama atili tali a tamaiti i a latou fesili ma tali.

PESE: Tulei ese avega mamafa.

A'OA'OGA:

1. E taua le malolo mai se galuega mamafa.
2. Malolo i le taimi tatau.

.....

ASO SA

16 AOKUSO 2020

MATA'UPU:

LE NOFOAGA NA AMATA AI
(Where it began)

SINI:

Ia malamalama tamaiti i le taua o le nofoaga na amata mai ai le olaga.

TUSI FAITAU:

Luka :1-11

FESOASOANI MO FAIAOGA:

E taua le manatua ma le iloa o le mea na soifua a'e ai le tagata, ma le nofoaga na atiae ai lona olaga. O le ituaiga olaga na ola a'e ai i totonu o le aiga, ma le nofoaga ma le taimi na amata fa'aaogaina ai le soifua i feau ma galuega ma vala'auina 'ese'ese.

O le tala o lenei taeao, o lo o fa'aautuina i le vala'auina o ulua'i so'o o le Ali'i. E pei ona ta'ua i le tusi faitau, o le tala'iga a Iesu i luga o le auvai o Kenesereta, po'o le auvai o Kalilaia, na ia silafia ai ni va'a fagota laiti se lua, ma ni taulele'a faifaiva se to'afa, o lo o tau fonofono masae o latou upega.

O lo latou ta'ita'i, o Peteru, le na fa'aigoa mulimuli ane ai e Iesu ia Simona. O le va'ai a tagata o lea vai 'a'ai ia Peteru, o le fa'amatua o faifaiva. Peita'i e tusa ma le tala, na asa lona faiva i le aso lea. E ui o ia o le tautai matapalapala, ae na leai lava se i'a na maua i lona faiva i lea aso.

Ae e i ai le mea taua lava o lo'o ta'ua i le tala,. Fai mai e ui ina o Peteru o le faifaiva iloga, ae na ia usita'i lava ia Iesu, ina ua fetalai atu Iesu e toe tu'u i tai lo latou upega. E le'i mafaufau Peteru o ia o se tautai poto, ae na ia usita'i lava ma toe tu'u lo latou upega i tai, ina ua fetalai i ai le Ali'i.

O le taua o le usita'i, o le le mafai lea ona toso mai i luga lo latou upega. Ae o le ata lea o le tagata e fa'alogo ma usita'i i le finagalo o le Atua, o le fiu e tali manuia e foa'i mai e le Atua ia te ia. Ae o le silasila lea a Iesu ia Peteru, o lo'o ia te ia le

meaalofa a le Atua, e mafai ai ona ia fa'aauauina le galuega a Iesu.

E ui ina fefe Peteru ina ua vaai i ia mea, ae na fetalai lava le Ali'i, "Peteru, aua ete fefe, e amata atu nei, ona fai outou ma faifaiva i tagata. O lona uiga, o le a le toe o e saili mai ni i'a, ae o le a fa'aaoga e Iesu lo latou iloa fa'afaifaiva, e o ai e fagota pe saili tagata mo le malo o le Atua.

O lona uiga o le vala'auina o Peteru ma ona uso i le galuega fa'asoo, e le'i vala'auina mai i se nofoaga taualoa e pei o se faleaoga, po'o se ofisa po'o se falesa fo'i. Ae na vala'auina mai i le sami, o le nofoaga e le tatau ona tofia mai ai ni tagata e auina atu mo se galuega tala'i.

Peita'i, o le taua lea o le fa'amaoni i so'o se tiute ma so'o se mea lava tatou te faia. Aua o tatou e galulue ma fa'atino, ae o le Atua na te silafia i tatou uma ma fa'aaoga i tatou e tusa ma lona finagalo.

E pei foi o le tama o Tavita, na vala'auina lava o ia e le Atua e fai ma tupu o Isaraelu, a'o i ai o ia i le vao i le leoleoina o mamoe a lona tama o Iese. Ae na fa'aaogaina e le Atua lona tomai fa'aleoleo mamoe, e fai ai o ia ma tupu na te leoleoina ma ta'ita'i le nu'u o le Atua.

Tamaiti, e taua lo tatou iloa o le nofoaga ma le mea na tatou amata mai ai. Afai na e ola a'e i se aiga e vaivai lona tamaoaiga, aua e te popole, ae to'aga e tatalo i le Atua, ma e fa'atalitali, po'o le a se mea o le a faia e le Atua mo oe e fa'aaogaina i ai lou ola.

E le afaina le ituaiga aiga po'o le ituaiga nofoaga o lona e te ola ma soifua ai, ae o le mea e sili ona taua, o le fa'aaogaina o oe e le Atua mai le mea o lo'o e i ai. Aua foi tatou te manatu fa'atauva'a ia i tatou lava, ae fa'alogolelei i le vala'au mai o le Atua ia te oe i le mea e ao ona e fai.

O le tatou uo o Iesu, na amata mai i se nofoaga le taualoa ma le manogi leaga. Ae na ia usitai pea i le Aua ma fai lona finagalo, ua fa'aeaina ai o ia e le Atua, ma avea ai o ia ma Tupu o le lagi ma le lalo lagi.

GALUEGA FAATINO:

Fa'amatala mai i ni fuaiupu se lima le taua o lenei mataupu mo oe lava ia le tama ma le teine aoga.

PESE: Ou te le faatali sei ou matua, ona ou gauai lea.

A'OA'OGA:

1. Ia amata ia Iesu lou olaga.
2. O le mata'u i le Atua o le amataga lea o le potu.

.....

ASO SA

23 AOKUSO 2020

MATA'UPU:

“FILIFILIGA O ISARAELU”
(Choice of Israel)

SINI:

Ia malamalama tamaiti i le taua o le amana'ia lelei o le filifiliga a le Atua mo le tagata.

TUSI FAITAU:

Roma 9: 1 – 5

FESOASOANI MO FAIAOGA:

E i ai le tasi taule'ale'a, na vaetama e se tasi o ulugali'i a'o la'ititi o ia. Ina ua matua le tama, sa fai o ia ma tautua i le aiga o lona tama. O se olaga fa'amanuiaina sa i ai le olaga o le tama lea. Ina ua maliu lona tama fai lea, ona filifili lea o le aiga o lona tama mo se tasi e nofo i le suafa matai' na tauave e le toeaina ua maliu, ina ia tulai mai e tausia le aiga.

Ona filifili lea o le aiga i le tama lea, ona o ia sa tautua i le aiga. Ina ua pale mai le tama lea i le suafa, ona va'aia lea e le aiga se suiga tele ia te ia. Ua avea lona tula'i mai e ta'ita'i lo latou aiga,

ua fa'atupuina ai lona tamaoaiga e tele, ae ua i ai ma le suiga i lona olaga, ua pule ma le sãuã.

Ua o'o lava i tagata matutua o le aiga, ua le amana'ia e le tama lea. Na fai pea lea uiga leaga o le tama seia o'o lava ina fiu lo latou aiga, ma tulieseai loa o ia e le aiga o lona tama. Ma ua fa'alogoia ai e le tama le leo e le'i fa'alogo i ai muamua, o ia o le tagata ese e lē se suli moni o le aiga. Ua ave'eseina le mamalu ma le pule, ua ave'eseina foi lona tamaoaiga e tele na maua, a'o fai o ia ma matai tausi aiga.

O le ata atoa lea o le manatu o le aposetolo, e pei ona aumai ai le mata'upu o lenei taeao. E tusa ma le manatu o le aposetolo, o Isaraelu o le nu'u na filifilia e le Atua e fai mona nu'u. E pei ona i ai le feagaiga na osi a le Atua ma Isaraelu, e fai le Atua ma Atua o Isaraelu, ae fai Isaraelu ma nu'u o le Atua.

O lona uiga, o le Atua o le Tamã lea, a o Isaraelu o lona atali'i fai, ua ia tofia e avea ma suli o le aiga. O le fa'amoemoe atoa o le Atua, ia fai Isaraelu ma nu'u manuia. Na te foa'i atu ia i latou manuia e tele, pe a latou fa'alogo ma usita'i i le Atua.

Lea e pei ona ta'ua i le fuaiupu e fa, "O Isaraelu, o tamafai i latou. A ua tu'uina atu e le Atua ia te i latou o mea uma. O le mamalu, o le feagaiga ma tulafono, o le upu e ola ai i latou, fa'atasi ai ma le fa'amanuiaga sili, e tupuga mai ia i latou le Keriso". O fa'amanuiaga e le maua e nu'u ese.

Peita'i, fai mai le Aposetolo, ua mele e Isaraelu ia manuia. Ua latou le usita'i i le Atua ma ua latou auauna atu i atua fa'apaupau. Ua galo ia Isaraelu Lē na filifilia i latou e fai mona nu'u. Ua galo ia Isaraelu o le filifilia o i latou e fai ma nu'u o le Atua, o le mea patino i le Atua. Lea lava la ua o'o mai i taimi o le Aposetolo, o tumau pea le ola femoumoua'i o le nu'u filifilia o le Atua.

Ae o le fa'amalosi lena a le aposetolo mo tagata Kerisiano. O le filifilia o i latou e fai ma tagata o le malo o le Atua, o le filifiliga tupito lena a le Atua. Ae na pau le mea ia iloa e le tagata, ia malamalama ia te ia ma lona pi'itaga i le malo lea.

Ua a'oa'o mai lenei tala mo tatou, ina ia tatou iloa ma malamalama i lo tatou so'otaga ma le Atua. O tatou o tagata ese

po'o tamafai. Ae ua filifilia i tatou e le Atua e fai mona i le ola e fa'avavau, e ala ia Iesu Keriso lona Alo. O le a'oa'oga mo tatou, po o le a lava le tulaga o e i ai, fai ma le fa'amaoni.

Afai o oe o le tamaitiiti aoga, aua ne'i galo ia te oe, o le fa'amanuiaga le mea lena. O le Atua lava ua na filifilia oe e fai ma tama ma teine aoga. E le maua fa'alua lena fa'amanuiaga. A tatou fa'atamala i le taimi lenei, ua tatou melea lava fa'amanuiaga a le Atua mo tatou. Ia fai le aoga ma le fa'amaoni, ma fiafia e tatalo pea i le Atua.

Mulimuli ane, e fa'aeina fo'i i tatou e le Atua i nisi fo'i fa'amanuiaga se tele i le lumana'i. Ae a e fa'atalale i le aoga i le taimi nei, o le a fa'aletonu lou taunu'uga, aua e 'ave'eseina lava e le Atua lana meaalofa o le poto ma le atamai ia te oe.

O le Kerisiano fa'amaoni, na te iloa lelei lona taunu'uga manuia. Na te matua malamalama lelei fo'i, i lona so'otaga i le ola e fa'avavau, ma manuia e tele o le Atua ua tu'uina mai mo ia.

GALUEGA FAATINO: Faamatalaga

Faamatala mai le uiga o le fuaiupu o i lalo i lona uiga sa'o, faatatau i le mataupu.

"Sa fai i tatou ma tagata ese, ae ua avea i tatou ma suli moni o le malo o le Atua, talu lo tatou Al'ii o Iesu Keriso".

PESE: Ua ou filifili e mulimuli ia Iesu.

A'OA'OGA:

1. E alofa pea le Atua i e matata'u ia te Ia.
2. Ia manatua pea Lē na fa'apogai i o tatou manuia.

.....

ASO SA: 30 AOKUSO 2020

MATA'UPU: O ALA O LE ATUA (*The ways of God*)

SINI: Ia malamalama tamaiti i le taua o le iloa o ala o le Atua e fa'aolaina ai tagata.

TUSI FAITAU: Roma 11: 25-36

FESOASOANI MO FAIAOGA:

E le toe tau fa'amatalaina le filifilia o Isaraelu e le Atua e fai mona nu'u. Ua tatou iloa foi, o Isaraelu o le taunu'uga lea o folafolaga a le Atua i lana auauna o Aperamo. Peita'i o le lē usita'i o Isara'elu i le Atua, ma le fa'atāfea ai o i latou e le Atua i nu'u 'ese, ua tatou manatu ai, ua tu'ulafoa'iina e le Atua ona tagata po'o Isara'elu.

Ae o la tatou Tusi Faitau o lenei aso, o lea ua fa'amanino mai ai e le aposetolo o Paulo, e ala i lana tusi i le Ekalesia i Roma, le sese o lea mafaufauga. Ua fa'amanino mai e Paulo, o ala o le Atua, e faigata ona malamalama ai e le tagata, se'i vagana le tagata fa'atuatua.

Ae o le uiga tonu lea o le tusi lenei a Paulo. E ui i le agasala o Isara'elu ma o ese pea ma le Atua i le tele o taimi, ae le mafai ona ave'eseina ai le alofa o le Atua i lona nu'u, ona o le feagaiga na la osia ma lana auauna o Aperamo.

Ae ina ua salalau atu le fa'aolataga i nu'u ese, o lea na toe a'oa'oina ai le mafaufau o Isara'elu, ma latou toe fo'i mai ai e talia Iesu Keriso o le fa'aola. O le va'ai fa'a-lē-fa'atuatua o le aposetolo, o mea ia, o ala lava o le Atua. E le malamalama i ai le tagata, ma o ala fo'i e faigata lava i le tagata ona iloa. O le ala fo'i lea e tu'u fesili ai pea le tagata i le feagaiga lea a le Atua ma lona nu'u o Isaraelu.

E pei la ona taua i le sini autu o lenei mata'upu, o ala ia e ao ona malamalama i ai le tagata. O ala o le Atua e mafai ona fa'aolaina ai le tagata e tumau ma fa'atuatua ia te ia e le aunoa. O tatou foi

le fanau, e faigata lava ona tatou malamalama i ia mea. O nisi taimi ua tatou manatu, a o'o mai faigata ma puapuaga, ona tatou manatu lea ua lē alofa le Atua. Ae leai, o auala lava e faia e le Atua, ina tatou toe mafaufau loloto ai ma tatou toe foi atu ai ia te ia ma le loto fa'amaualalo.

O ala o le Atua, e fesuisia'i mai pea i lea taimi i lea taimi. O le itu faigata lea ona malamalama i ai le tagata o lo'o fiafia pea e ola i le agasala. A'o le tagata fa'atuatua ma pipi'i pea i le Atua, e leai lava se mea e popole ai, aua o lo'o ia malamalama lelei i le natura o le Atua ma lona alofa tunoa.

Manatua foi o le afio mai o Iesu, na faigata lava ona talia e tagata Iutaia ona e ese lo latou mafaufau na i ai. Na manatu i latou, o le Mesia o le a afio mai, e sau ma se pelu ma se tao, e ti'eti'e mai ise solofanua. E sau o ia o le toa nate fa'ato'ilalo fili o Isara'elu. Ae ua tete'i i latou i le afio mai o le Mesia, e fanau mai i le fale o manu, e fiafia i tagata matitiva ma tagata mama'i, e talanoa i le filemu ma le loto maualalo.

A'o ala ia o le Atua e fa'aalia ai lona alofa. Ua le afio mai le Mesia e fa'aumatia fili o Isara'elu, ae ua afio mai le Mesia na te fa'aumatia ma fa'ato'ilalo le fili o le lalolagi, o Satani. Aua o i tatou na fa'apologa i tatou e le ali'i o le lalolagi i le agasala, ae ua fa'aolaina i tatou ma tatou manuia, ona o le fa'aolataga lea na saunia e le Atua e ala ia Iesu Keriso.

GALUEGA FAATINO: Taliga Fesili

Fesili:

1. O le a ua fa'aolaina ai i tatou?

Tali: Ua faaolaina i tatou ona o le alofa tunoa o le Atua

2. O le afio mai o Iesu, e mo ai?

Tali: O le afio mai o Iesu, e mo le lalolagi ina ia faaolaina.

PESE: 199 (pese maViiga)

A’OA’OGA:

1. Ia tatou tatalo i le Atua e faasino mai ona ala, ma tatou savavali ai ma le faatuatua

.....

**ASO SA: 6 SETEMA 2020
(ASO SA TALA LELEI)**

**MATAUPU: AUA LE FAALAVELAVEA E LE
TASI LE ISI
(*Don’t trip one another up*)**

SINI: Ia a’oa’o le vasega ina ia malamalama tamaiti i le taua o le nofo fealofani ma le nofo lelei ina ua le fefaamasinoa’i le tasi i le tasi.

TUSI FAITAU: Roma 14: 13 – 23.

FESOASOANI MO FAIAOGA:

O le va nonofo ai o tagata, o le tasi lenei o vaega taua i totonu o le siosiomaga po o le lotoifale o aiga, nuu, o malo faapea ekalesia ma soo se faalapotopotoga lava. O iina e fausia mai ai le nofo lelei ma le fealofaniga o tagata uma, aemaise o le maopopoga o so o se faalapotopotoga. O i foi e talepeina ai le saogalemu o le nofo lelei o tagata ina ua leai se alofa e faatinoina ai le va fesootai o tagata. E malepelepe ai mafutaga ina ua fefaamasinoa’i tagata aua ua faamamafa tulaga tau-tagata i totonu o le sosaiete, aemaise o tu ma aga eseese .

O le Ekalesia lenei i Roma, e lei faatuina e le Aposetolo o Paulo. Na faavaeina e tagata Iutaia na liliuina e le Agaga Paia i le aso penetekoso ma latou toe foi ai i Roma. O se galuega lelei lea na latou amata i le tau atina’eina o le ekalesia i lea vaitau. Peita’i e

i ai nai vala o le lotoifale o le ekalesia i Roma ua manatu le aposetolo e ao ona faaleleia; e pei o le aafia o le faatuatuaga faakerisiano ona o talitonuga faa-Iutaia i meaa .

I le mataupu lenei e 14, o loo tautala ai le aposetolo i le saolotoga i le alofa. O le tagata e malosi lona faatuatua ma le tagata e vaivai lona faatuatua. O le saolotoga e faia i le alofa ina ua fesoasoania’i tagata uma ina ia mafai ona soalaupule mea uma ma faalaulelei mea o lo o pona’ia ai le fealofaniga i totonu o le mafutaga faakerisiano. Ia faia mea uma ona o le Alii aua pe tatou te ola pe oti foi, o tagata o le Alii i tatou uma aua o Ia na maliu mo i tatou. Aua foi nei faasala e le isi kerisiano le isi, pe ta’ufaatauvaaina e le tasi le isi, aua e oo mai le aso faamasino ona laulaututu uma lea i luma o le Atua. (1 – 12)

I fuaiupu e 13 seia oo i le 23, o loo talanoa ai Paulo i le va fesoota’i o le isi kerisiano i le isi. O lea e fai mai ai, aua nei faia e se tasi se mea e tausuai ai pe tautevateva ai lona uso. O lona uiga, aua nei manatu le isi ua sili lona lelei i le isi aua e tupu ai le fefaamasinoa’i ma tupu ai feeseesea’iga i totonu o le ekalesia. I le manatu o Paulo, aua nei aveva mana’o o le tino ma mea e faaleagaina ai le loto ma le agaga o le tagata. E pei ona fai mai, o le malo o le Atua e le o mea e ‘ai ma mea e inu, leai; a o le faia o le amiotonu, faatupu le filemu ma olioli i le Agaga Paia. Ia tausisi i mea e tupu ai le filemu, o lona uiga; aua nei tausuai le isi i le mea ua manatu iai le isi, a ia fa’aaloalo iai aua e sa’o lava le tagata ia i ona manatu. I se isi faaupuga, ia maua le fefaamagaloa’i e pei ona maliu Keriso ma tasi ai le faatuatuaga faakerisiano, e faapena foi se lagona o lo o taumafai mai i ai le aposetolo.

O le uiga moni lea o le tatou mataupu, “aua nei faalavelavea e le tasi le isi,” e tatau aua e tupu mai ai mea e le lelei i le vaai faakerisiano. Ia fefaamagaloa’i ae le o le fefaamasinoa’i aua e le o le finagalo lea o Iesu mo lana fanau, e pei ona fetalai i lona au so’o ina ua afio ae i lona Tamā; ia outou fealofani.

GALUEGA FAATINO

Vaevae le vasega i ni vaega se lua, ona fai lea o ni suesuega i fuaiupu o le a vaevaeina ai le tusi faitau o le mataupu, ona aumai ai lea o ni manatu o le fanau faatatau lava i le mataupu e pei ona faamatalaina.

Vaega A : Roma 14: 13 – 17.

Vaega E: Roma 14: 18 – 23.

E i lau susuga lava i le faiaoga le faatautaiga o lea faatinoga ina ia iloa ai le malamalama o tamaiti i le mataupu ua uma ona faamatalaina.

PESE: 147 Pese ma Viiga.

A’OA’OGA:

1. Ia tatou maua le ola fefaamagaloa’i e pei ona faia e le Alii Faaola mo i tatou.
2. Ia tatou faatupuina le filemu i o tatou lotoifale aua o Iesu lava ia o le Alii o le filemu.
3. Aua le vaai maulalo i le isi uso a tagata, pe ta’u faatauvaaina e le isi le isi.

.....

ASO SA: 13 SETEMA 2020.

MATAUPU: SA’O PE SESE (*True or False*)

SINI: Ia a’oa’o tamaiti ia malamalama; o le sa’o ma le mea moni, e mai le Atua lea; a o mea sese ma pepelo; e le mai le Atua lea.

TUSI FAITAU: Teuteronome 18: 18 – 22.

FESOASOANI MO FAIAOGA:

O le tusi lenei o Teuteronome o lo o i ai le talitonuga, o le tusi mulimuli lenei o tusi e lima a Mose e pei ona i ai suesuega a nisi. O le tusi o lo o tusia ai upu mulimuli a Mose mo le nuu o Isaraelu a’o lei ulufale atu i le nuu folafolaina o Kanana. O nai toe tapenaga ma le faamanatu a Mose mo Isaraelu a’o le’i tuuina atu ia Iosua le ta’ita’iina o le nuu i lo latou tofi ua uma ona saunia e le Atua.

I le mataupu lenei e 18; o lo o faamatalaina ai le tofi o le aiga o Levi e fai ma faitaulaga; aemaise o tuutuuga o le latou galuega fai i totonu o ituaiga taitasi o Isaraelu (f1-8). E leai ni o latou eleele po o ni fanua aua ua vavaeeseina i latou mo le Atua. I le fuaiupu e 9-14, o apoapoiga mo le nuu ina ia aua nei avaga o latou loto i tu ma aga a tagata o lea laueleele le saili faailoga solo i e iite i ao o le lagi ma e fai togafiti faataulaitu; aua o mea ia e inosia i luma o le Atua. A ‘o se faaitaiga lea o mea sese po o mea pepelo, aua e taumate le taunuu ma le le taunuu.

I fuaiupu e 15-17, o upu a Mose o loo faailoa ai le faatuina e le Atua o se perofeta ia Isaraelu. O le sooupu ia Isaraelu ma le Atua e pei ona latou mua’i talosaga ia Mose a o iai i le mauga o Horepa.(Esoto 20:19) O le finagalo o le Atua ne’i tosina lona nuu i faiga ia a tagata o Kanana. O le perofeta, o le tagata na te vaaia faaaliga mai le Atua i mea ua tutupu, o lo o tutupu ma mea o le a tutupu; po o le tagata vavalo.

I le vaega mulimuli lea o loo taatia ai le tatou mataupu i lenei taeao (f 18-22), o fetalaiga a le Atua e faatatau i le faatuina o se perofeta e pei o Mose ia Isaraelu; aemaise o tuutuuga i le galuega faaperofeta e pei ona faia foi e Mose. Ua fetalai tuusa’o foi le Atua i le eseese o le perofeta na te faailoa le mea moni po o le sa’o ina ua faataunuuina e le Atua mea uma ua ia folafola atu. Peita’i a le faataunuuina mea e folafola atu e se isi perofeta, o mea sese ia mea ma e le mai le Atua ia.

Ioe tamaiti, o mea moni uma lava ma mea sa’o e pei ona fai mai ai le tatou mataupu; o mea ia mai le Atua. O apoapoaiga a Mose ia Isaraelu ma fetalaiiga tuusa’o a le Atua mo le faailoa mai ia te i latou o mea sa’o ma mea sese; e faapena foi mo i tatou. Ua tupu tele le atamai ma le silafia i nei vaiata ma ua tele ai ma talaiga eseese; peita’i o lea ua faailoa mai e le tatou mataupu i lenei taeao, aua nei o tatou atuatuvaile ai pe fememea’i ai o tatou lagona, a ia tatou faalagolago lava i le mana o le Agaga o le Atua na te faailoa mai le mea sa’o ia te i tatou ina ia tupu ai le maotinoia i o tatou loto.

GALUEGA FAATINO: Tusiga Solo

Tusi sau solo ia le i lalo ifo o le 4 fuaiupu taifa laina faataatau i le autu, ‘Sa’o pe Sese.’ Ia aumai ai manatu o le fanau i le uiga moni o le mataupu e pei ona faamatalaina.

PESE: 368 – Pese ma Viiga.

A’OA’OGA:

1. O le Atua, na te aumaia le maotinoia i o tatou loto.
2. E faataunuaina e le Atua mea uma ua Ia fetalai i ai.
3. O le Atua o le Sa’o ma le mea moni.
4. E faamaoni le Atua i ana fetalaiiga.

.....

ASO SA: 20 SETEMA 2020

MATAUPU: AISEA UA FILIFILI AI LE AUALA LĒ SAOGALEMU?
(Why take the risky way?)

SINI: A’oa’o tamaiti ina ia malamalama, o le auala le saogalemu, o luitau o le soifuaga ina ia tatou maua manuia o loo taatia mai luma mo i tatou.

TUSI FAITAU: Luka 4: 14 – 21.

FESOASOANI MO FAIAOGA:

O le tatou mataupu i lenei taeao o se fesili; Aisea ua filifili ai le auala le saogalemu? I le amataga ina ua agasala le uluai tagata na fetalai ai le Atua i aulape o le soifuaga o le tagata; e te ‘ai ma le tiga i aso uma o lou ola, e te ‘ai au mea e ‘ai ma le afu o ou mata. O le amataga lea o le ala le saogalemu o lenei soifuaga. O le uiga o lea manatu, o le auala le saogalemu; e mafai ona faapea, o se auala gaoa ma le lau leaga e faigata ona uia. O se ata manino lea o le soifuaga nei ua uma ona faataatia e le Atua mo i tatou, tatou te lailoa ma maosiosia ona o le naunautaiga ina ia maua se mea lelei. O le faigata lea ua oo i ai le soifuaga nei ona ua agasala le tagata ma toilalo i faiga a le tiapolo ma ana faaososoga.

Peita’i o le auala lea na filifilia e le Alii Faaola mo lana galuega. Ua ia silafia foi, o le finagalo lea o lona Tama mo Ia. O lea faatoa tuanai atu le faaososoina e le tiapolo o Iesu e pei ona taitaiina ai e le Agaga i le mea tuufua. O le ata faataatia lea i le galuega o le a feagai ma Ia. E tumu i faaososoga ma tofotofoga ona o tagata, latou te vaai ae le talia; latou te faalogo foi ae le lagona. (f1-13) O lona uiga, o le gluega o le a feagai ma le Alii Faaola, e le o se galuega faigofie; na te le savalia foi se auala laulelei. O le mea ua maotinoia, o le auala le saogalemu e pei ona taua i le mataupu; o tagata, ona e le faigofie ona asaina e Iesu o loto faigata o tagata ina ia talia o Ia ma lana talaiga i le malo o le Atua. O faaososoga foi e pei ona taua, o mea o lo o tausinio uma i ai taitai uma o le lalolagi i lea vaiata. O vaivaiga ma mana’oga o le tino e tuinanau i ai le loto ina ia mafai ona maua

le mamalu ma viia ai e tagata. O le atoaga foi lea o le taaviliga o lo o i ai le soifua o tagata o le lalolagi i lea vaiatau.

O se vaaiga i le le mafai ona tuuaoina e le tiapolo o lenei lalolagi matagofie na foafoaina e le Atua mo le tagata e soifua ma ola ai. Ua mautinoa lava lea tulaga; aua o le faaogaina e le tagata o faaososoga ia a le tiapolo ua tupu ai le fia atua ma maua ai le ola mativa i nisi. Ua manaomia se faamafanafanaga mo e loto momomo, saolotoga mo e ua fai ma pologa i nisi. Ioe, o le manulauti lea o le afio mai o Iesu, lea ua tautino ai le solo a le tamaloa i lona faitauina o le tusi a Isaia; fai mai, *“Ua i o’u luga le Agaga o le Alii, aua ua na faaui mai ia te a’u e folafola le tala lelei i e matitiva; ua auina mai a’u e ia e faamalolo i e loto momomo, e tala’i le sa’olotoga i le tafeaga, ma ia pupula mata o e tauaso, e tuu saoloto i e ua faasauaina, e tala’i le tausaga e finagalo malie mai ai le Alii.”*

O Iesu, lea ua uma ona faauiina i le papatisoga a Ioane i le vai o Ioritana, na afio mai ai le Agaga i ona luga peiseai se lupe, ma le siufofoga mai le lagi e faamaonia ai o Ia lava o le Mesia; le Alo o le Atua. Na afio mai e talaia pa puipui o mea uma o lenei soifuaga ina ia tuusa’olotoina le tagata ma lana filifiliga. Na amata lava i lona lava nuu o Nasareta le filifili e tausui ma tauemu ina ua latou fesili pe le o le atalii ea lenei o Iosefa le fai fale ie. Le auala le saogalemu lea ua amata savalia e Iesu ina ia tau lau o le faaolataga na afio mai ai, ina ia maliu ma toe soifua manumalo mai le oti ma le tuugamau. O le taiala foi lea mo i tatou le fanau, tatou te le ola ma le fifilemu aua e le gata i le fili e faaososo mai ia te i tatou; a o tofotofoga foi tatou te fetaii ina ia toe faaolaola ai lo tatou ola faatuatua i le faaolataga na saunia e le Alii Faaola ina ia tatou taunuu manuia i le malo o lo tatou Atua. Afai na filifili lo tatou Faaola i le auala le saogalemu, o le auala lava lea e tasi mo i tatou ina ia tatou sapi i le manuia atali.

GALUEGA FAATINO: Tala toe Faamatala.

Toe faamatala mai le tala e pei ona faamatalaina i au lava upu ia le sili atu i le lua pe tolu foi parakalafa le umi.

PESE: 355 – Pese ma Viiga.

A’OA’OGA:

1. Tatou te le maua ni lelei ma le filemu.
2. E mafai ona tatou savalia le auala le saogalemu pe afai e tumau lo tatou ola faatuatua i le Atua.
3. E aoga tofotofoga mai le Atua e toe fafagu ai i tatou aua la tatou folauga o faia nei.

.....

ASO SA: 27 SETEMA 2020.

MATAUPU: O LE VALAAULIA (*An invitation*)

SINI: Ia a’oa’o tamaiti ina ia malamalama; o le valaau a Iesu, o le valaau alofa mo le tagata ina ia mapu ma malolo lona agaga.

TUSI FAITAU: Mataio 11: 25 – 30.

FESOASOANI MO FAIAOGA:

A talanoa i le uiga o le valaaulia e pei ona i ai le mataupu i lenei Aso Sa. O se valaau faaaloalo mo nisi ina ia mafai ona auai e fai ma molimau i se faamoemoe ua leva ona taupoina. Peita’i i le tele o faamoemoe; e tele lava i le faapitoa po o le filifilia lelei o tagata e ave i ai le valaau faaaloalo. E le soona valaauina so o se tagata lava, e masani lava; o tagata o aiga, o nuu, Ekalesia faapea foi ma e mau tofi i totonu o faalapotopotoga ma le malo;

aemaise lava i taimi o aso fanau, faaipoipoga, saofa'i ma le tele o faamoemoe faapenei ua tatou masani ai.

Peita'i o le valaau a Iesu e pei ona i ai i le Tusi Faitau o le mataupu; o se valaau lautele, o le valaau alofa mo le tagata puapuagatia. O lona uiga, e mo soo se tasi lava o loo feagai ma tiga ma mafatiaga o le soifuaga nei. E le faatuaomia le valaaulia, malosi pe vaivai, mauoa pe mativa, taualoa pe le taualoa, ma'i pe maloloina e le afaina lea i le Alii, pau a lea; o e o i ai i mafatiaga i totonu o latou lotoifale ma le siosiomaga o lo soifua ma ola ai. O le fesili pe aisea ua valaau ai le Alii i ia ituaiga tagata? Ioe, manino lava le tali; ina ia mafai ona maua le faamalologa sili ma le faaolataga mai ia te Ia. O lea ua faamafola mai aao o le Alii Faaola mo le tagata. Ua Ia aapa mai ina ia aveesea lagona o le fememea'i ma le popolevale, ae mafutaina le tagata i le toamalie ma le mautinoa. Suia loimata o le faanoanoa e fai ma loimata o le fiafia, o le tagata ua leiloa i ona lava manatu ua toe maua mai ina ua maua le malologa o le agaga. Ae a maua le malologa i le agaga, ona maloloina atoa lea o le tagata ona ua mafuta ma lona Alii o Iesu Keriso le Faaola. Ai o le ala lea e mama ai lana amo, aua ua loto faatasi ma le tagata i mea oi le malo o le Atua ae le o le lalolagi.

Atonu o le ala lea ua faafetai ai Iesu i lona Tama ina ua le faaalua i le au popoto mea lilo i lona malo, aua o i latou lava ia na Ia sa'i ai e pei ona ta'ua Koasini, Petesaita, Kapanauami, Turo ma Saitonu. E le gata i lea, o lana faataoto foi i e ua manatu ua ta'uamitonuina le potu i ana galuega. O tagata ia latou te lei talia le galuega a Ioane le papatiso ma lona afio mai. O lea e faatusaina i ē e le'i saasaa pe sisiva mai ina ua faaili atu, latou te lei faufaitagitu'i foi ina ua latou tagi aue mai. Ae afai e feoloolo le mea na tupu ia Sotoma ia i latou nei; o ai la se tasi o le a le fia amo i le avega a Iesu Keriso.

Tamaiti, o le valaau a Iesu o le valaau alofa mo i tatou uma. O le talia ma le le taliaina, o le mea lena a le tagata lava ia e fai i ai lana filifiliga tataua; a o lea lava ua saunoa manino le Alii Faaola ma valaau mai mo i tatou, o Ia tatou te malolo ai.

GALUEGA FAATINO: Fa'aaliina o manatu.

O nei aso ua tele ma anoanoa'i faafitauli ua aafia ai le soifua o fanau ma tupulaga, faaali ou manatu i se fesoota'iga i le valaau a Iesu e pei ona iai le mataupu ma le pule i le ola. Ia le silia ma le itulau e tasi le umi.

PESE: Ou mafatiaga, ave uma ia Iesu.....
(Cast your burdens upon Jesus)

A'OA'OGA:

1. Talia nei Iesu e malolo ai o tatou agaga.
2. Ua valaau Iesu mo le tagata ina ia faasoa atu iai le alofa tunoa o le Atua.
3. Filifili nei loa e talia le valaau mai a lo tatou Faaola.

.....

ASO SA: **4 OKETOPA 2020**

MATAUPU: **FAI E OE** (*You do it*)

SINI: Ia a'oa'oina le fanau ina ia malamalama, o tatou uma ua filifilia e Iesu e fa'atinoina lana galuega faaola, i lenei lalolagi. O lona uiga, e ao ona tatou galulue faatasi mo le manuia o isi.

TUSI FAITAU: Mataio 14: 13-21

FESOASOANI MO FAIAOGA

Ina ua fa'alogu Iesu i le tala na aumai e ona so'o e uiga i le oti o Ioane le Papatiso ma mea uma na faia e Herota ia te ia, na ia maluu ai loa i se nofoaga tuufua ma nofo ai. E le o ta'ua mai e Mataio pe aisea na mana'o ai le Alii e tuua na o ia i lea nofoaga, pe ai ona o lona faanoanoa i le mea ua tupu ia Ioane le Papatiso,

po ua finagalo foi e fai sina ana malologa. Peitai, o le tuua ai na o ia i lea nofoaga, o se avanoa lelei lea mo le motu o tagata o lo o mulimuli atu e fia faalogologo i ana aoaoga, ma vaavaai i vavega e tele na te faia. E ui lava la i se lagona mafatia o Iesu, a ua le avea lea mafatiaga ma ala e taofia ai le galuega a le Tala Lelei, e fa'aolaina ai le tagata ua galala e fia maua le ola ma le malosi mai ia te ia.

E tusa ma le molimau a Mataio, ina ua silafia e Iesu le motu o tagata, ona mutimuti vale ai lea o lona alofa ia te i latou. O lona uiga, e ui i se mafatiaga faale-tino ona o mea sa tutupu, e pei ona faia e Herota ia Ioane le Papatiso, ae sa faamalosi pea lona itu faale-agaga, le ala lena o le tupu a'e o lona alofa mutimuti vale, sei faamalolō tagata mama'i, ma fafagaina le ola faale-agaga o tagata i le upu o le ola e uiga i le malo o le Atua.

O le mau a nisi o tagata suesue o le Tusi Paia, o le tala lava lenei e tasi o lo o toe faamauina i le (Mataio 15: 29-39), pe a fua i le tutusa o vavega na faia e Iesu, o le faamaloloina o tagata mama'i ma le fafagaina o le toatele o tagata na lolofi atu ia te ia, peitai mo Mataio lava ia, e eseese ia tala e lua ma e tofu foi ma lona aoaoga o lo o momoli mai ai. O le tala i le fafagaina o le limagaafe (Mataio 14: 13-21) o lo o tupu i eleele o Iutaia i le itu i sisifo o le vai i Kalilaia, ma o le feau mo Iutaia, o a faafitauli e tutupu, fia aai, fia feinu, sauaina ma isi, o lo o iai lava le Atua na te fafagaina ma fa'aolaina i latou. O ato foi e sefululua na maua i toe 'aiga na totoe, ua faasino tonu lava i ituaiga e sefululua o Isaraelu.

A'o le fafagaina o le toafagaafe (Mataio 15: 29-39) o lo o tupu i le itu i sasa'e o le vai i Kalilaia, ma o eleele foi na o nuu ese. E fua lava lea manatu ona o le tala o lo o faamauina i le mataupu lava lea (15: 21-28), e uiga i le fafine Kanana ma lana tama teine na maua i le ma'i temoni. O lona uiga, o le galuega alofa a Iesu na te mafai foi ona ia fafagaina tagata o nuu ese e pei foi ona faia i tagata Iutaia. O ato foi e fitu na maua i toe 'aiga na totoe, ua faatusaina i nuu e fitu e taunuu atu Isaraelu i Kanana o lo o i ai.

Ua oo i le afiafi ona augani atu lea o le au soo ia Iesu ia tuu atu le motu o tagata ina ia latou o i aai e faatau ni meaai ma latou, auā e le gata ua leva le aso a o le nofoaga tuufua foi o lo o latou i ai. E lelei foi le faamanatu a le au soo ia Iesu, ona o lo latou manatu alofa i tagata, peitai e ao ona latou iloa, o lo o latou faatasi ma Iesu, e leai se mea e faigata ia te ia, ma e tatau i ona so'o ona tuu atoatoa lo latou faatuatuga ia te ia, na te faia ai vavega mo le tausaiaina o le motu o tagata.. Na tali Iesu i ona so'o "*ia outou avane ni mea latou te aai ai*" O le finagalo o Keriso, ia mataala ona so'o i le feau ma le galuega ua valaauina ai. Afai na taulamua Keriso e faia galuega alofa i tagata, e tatau foi i ona so'o ona latou faia galuega lelei e fa'aolaina ai tagata. E le'i finagalo Iesu e tuuina atu tagata e o ina nei fano i le matelaina i le ala. O fea o le a o i ai, o lo o i ai Iesu o le puna o le ola? Ua le mafai ea e Iesu ona faia se vavega e maua ai ni meaai e fafagaina ai tagata? E tatau i ona soo filifilia ona latou fa'atinoina le galuega ma le faamoemoe e fa'aatoatoaina e Iesu. Na faia e Iesu le vavega, i areto e limagafua ma i'a e lua lau ona ia fafagaina ai lea o le motu o tagata. E leai lava se eseese ma le tala i le fafagaina o Isaraelu i le vao i le manai mai le lagi (Esoto 16). Peitai o le fafagaina e Iesu o le motu o tagata, o le faailoga lava o ia o le manai na auina mai le lagi e faaola tagata uma. O le (Mataio 14: 19) o lo o i ai upu galue: faafetai, tofitofi ma le avatu, ua faapena foi le galuega na faia e Iesu i le taimi o le latou talisuga mulimuli ma ona soo ao le'i faasatauroina. O le aotelega o manatu, o le galuega ua valaauina ai e Iesu ona soo e le faigofie, ae e mafai ma lelei mea uma pe a faalagolago i le Agaga o le Atua. Fai mai le mataupu "*Fai e oe*" o lona uiga, ua tuuina mai e Keriso le galuega o le Talalelei e faaauuina e ona soo, latou te fafaga ma tausii tagata uma i le upu o le ola mai Afioga a le Atua. E pei ona fetalai Iesu ia Peteru "*ia e fafaga i a'u mamoe*" e faapena le finagalo o le Alii mo e uma ua ia valaauina e fa'atinoina lana galuega. Ia latou fafagaina tagata e le gata o meaai faaletino ae ia sili i meaai faale-agaga. O le galuega faaleoleo mamoe, e fai e oe, e fai foi e a'u ina ia manuia tagata uma ae faasilisili ai le viiga o le Atua.

GALUEGA FAATINO:

Ia fefaasoaai i lau susuga le Faiaoga ma tamaiti i le mataupu lenei “*Fai e oe*” ina ia saga malamalama atili ai pea le fanau i le Tusi faitau o lenei aso Sa.

Fesili fa’atupu manatu mo lea fefaasoaiga:

- Aisea na finagalo ai Iesu e maliu atu i se nofoaga tuufua?
- Faapefea ona lava le fafagaina o tagata e silia ma le 5000 i ni i’a e lua lau ma saito e limagafua?
- Finagalo le Alii e saili e ona so’o ni meaai ma tagata, Aisea?
- O le a se eseese o le (Mataio 14: 13-21) ma le (Mataio 15: 29-39)

PESE: 184 (Pese ma Viiga)

A’OA’OGA:

1. O tatou o auauna galulue mo Iesu ma lana galuega
2. Faasoa lou alofa i soo se tasi
3. Faamaoni i tofiga eseese ua valaauina ai i tatou
4. E le tuulafoaiina e le Atua ona tagata mai faafitauli o le soifuaga
5. Tatou te faamoemoe i le mana o Iesu ae le o le malosi faale-tagata

.....

ASO SA: 18 OKETOPA 2020

MATAUPU: TAPUAIGA I LUGA O PANETA (MURASA) (*Worship on Mars*)

SINI: Ia a’oa’oina ma faamalamalama i fanau, o mea uma o le folafoga e pei o le laueleele, sami, o le vanimonimo ma le tele o isi paneta, na faia e le Atua. E tatau foi i ia mea uma o le foafoaga ona tapuai ma vivii i le Atua.

TUSI FAITAU: Kenese 1: 14-19

FESOASOANI MO FAIAOGA:

Na faia e le Atua le lagi ma le lalolagi i le amataga i lona tumu atoatoa. O lona finagalo e ala i lona Agaga ma lana Upu, e ao ona lelei le foafoaga ma faatulaga sa’o mea uma ina ia feso’otai ma galulue faatasi e tusa ma lona finagalo. O lona uiga, e ao ona feso’otai lelei mea uma ma lona lava faamoemoe na faia ai e le Atua. A tuu i se gagana faigofie, e tofu lava mea o le foafoaga ma lona aogā, ma e i ai foi le sootaga o ia mea uma. Faataitaiga: e aogā le sami i le laueleele, e aogā le vanimonimo mo le la, le masina ma fetu ma le tele lava o isi paneta oi fafo atu o le lalolagi o lo o tatou ola ai. A o le aotelega o mea uma na faia, o le tagata. O le faatumutumuga lea o galuega mamana a le Silisili Ese, ua ia faia le tagata i le efuefu i lona faatusa Paia, ma ua ia tuu i ai le manava ola, ona avea ai lea ma tagata ola.

O le mataupu o lenei aso Sa, “*Tapuaiga i luga o paneta (Marasa)*” (*Worship on Mars*), o lona uiga e oo foi i paneta, e i ai foi a latou tapuaiga. O le fesili, “O ai o lo o tapuai i ai ia paneta? E pei ona faamatalaina atu, e tofu lava mea uma o le foafoaga ma lona faamoemoe ma le aogā. E le mafai ona tatou iloa po o ai o lo o tapuai i ai isi paneta, a’o le upu moni, ua tatou mautinoa o mea uma na faia e le Atua. O lona uiga, na faia e le

Atua fetu e faamalamalama ai le vanimonimo po o le lagi, o le masina e faamalamalama ai le lalolagi i le po, o le la e susulu i le ao e faamalamalama ai le lalolagi. A fua i ai, e tofua lava ia paneta eseese ma o latou aogā, ma o la latou tapuaiga lava lena o lo o faia i le Atua, auā o lo o faatino lava o latou aogā eseese e tusa ma le foafoaga na faia ai i latou e le Atua. O fetu, o le la ma le masina foi, e fua i ai le kalena faale-tausaga, e fua i ai aso ma le ituaiga tau e i ai, po o le tau vevela po o le tau malulū foi. Faataitaiga, a susulu fetu i le po, o lona uiga e mugalā le aso e sosoo ai, a lē susulu foi le la, o lona uiga e timuga le aso.

O le lalolagi o lo o tatou ola ma nonofo ai, e i ai foi le aogā o mea uma o lo o tumu ai, o manu ma laau, o le sami ma le laueleele, atoa ai ma le tagata. E tofua lava nei mea uma ma le aogā, ma o la latou tapuaiga lava lena o lo o faia i aso uma e tusa ai ma le foafoaina na faia ai i latou e le Atua. E fesootea faatasi foi, a’o le faatumutumuga o mea uma, o le tagata na tuu i ai e le Atua le pule na te tausia ma vaaia faalelei. O lona uiga e afai e tapuai ma vivii mea uma o le foafoaga i le Atua, e ao foi i le tagata ona taulamua e tapuai ma vivii i le Atua. Auā o le tagata uma tofia e le Atua na te leoleoina ma tausii lelei mea uma o le natura o le foafoaga. E leai se aogā e tapuai ai paneta eseese o lo o i le vanimonimo ma le lagi, o mea e leai ni ola, ae tausolomua i le tagata na foai i ai e le Atua le ola ona le vivii ma tapuai i le Atua.

O le fesoasoani mo tatou, afai e tapuai mea uma o le foafoaga i le Atua e aofia ai ma paneta eseese, e tatau foi la ona avea le tagata ma poutū toa o le tapuaiga i le Atua. O le uiga o le tala, ia vivii ma tapuai le tagata i le Atua i aso uma ma taimi uma o le ola, ma ia maua le agaga faamaoni e faafetai ai i le Atua ona o mea silisili ua ia faia.

GALUEGA FAATINO:

Manuia foi ae faaoga le mataupu atoa (Kenese 1: 1-31) ma le (Kenese 2: 1-25) e fai ai se fefinaua’iga (Debate) i le va o le vasega pe a uma ona vaevae ini vaega se lua.

PESE: 2 Inā vivii i tatou nei, I lē na faia i tatou
(Pese ma Viiga)

A’OA’OGA:

1. Na faia e le Atua mea uma o le foafoaga i lona mataisau poto
2. Ia tausolomua le tagata ona ola vivii ma tapuai i le Atua
3. E taua le galulue faatasi o mea uma na faia e le Atua
4. E faamoemoe mea uma i le mana o le Atua

.....

ASO SA: 25 OKETOPA 2020

MATAUPU: ATAMAI E FAI MA FAAVAE
(*Wisdom as the foundation*)

SINI: Ia a’oa’oina le vasega ia malamalama, na faia e le Atua le lagi ma le lalolagi i lona atamai. O lona atamai lava lea na te toe fa’aleleia ai le tagata pe a o’o ina fulitua mai ia te ia.

TUSI FAITAU: Faataoto 3:19-26

FESOASOANI MO FAIAOGA

O nisi fa’alapopotoga o lo’o galulue i le su’esu’eina o le taua ma le aoga, o le feso’otaiga o le ola tuputupu a’e o tamaiti ma lo latou si’osi’omaga. E faapea le taunuuga o la latou folasaga, o le amataga o le tuputupu a’e o le tamaititi e ese le taua i lona faafaiileleina po’o lona fa’avaeina. A o’o ina avea ma talavou po o le tagata matua, e tauave pea i lona olaga ma lona

fa'asinomaga lona malamalama i le fa'avae mai o lona olaga a'oa'oina ma le tausiga sa faia a o laititi

E faapena fo'i se lagona e pei ona i ai le Tusi faitau mo lenei Aso Sa, o lo o fa'amamafaina ai le taua o le lelei o le fa'avae, na foafoaina ai e le Atua le lalolagi mai le amataga. O lona mataisau poto, na ia faia ai ma le atoatoa mea uma, o le siosiomaga po o le natura o mea, aemaise ai le tagata o le faatumutumuga o ana galuega mamana. Peitai, ua fa'aletonu le foafoaga ina ua agasala le uluai tagata, na silafia e le Atua i lona atamai ma lona silisili ese e ao ona toe faafou mea uma ma toe faaleleia le lalolagi ua malepelepe, e ala ina ua afio mai Keriso e toe faufau ma toe atia'e se lalolagi fou.

O le tusi o Fa'ataoto o le tusi a Solomona le atalii o Tavita, le tupu o Isaraelu, o lo o aofia ai ni tusitusiga e fa'atatau i le poto. Fa'ataoto 3:19-20 o lo o faamatala ai galuega mamana o le Atua ma le atamai o le Atua na mafua ai ona vaeluaina le moana ma toulua ai uaga, pei fo'i ona tusia i le Evagelia a Ioane 1:1-3. O le mafaufau o Solomona, o le poto e maua gofie e so o se tagata pe afai e fa'atuatua ma le mautinoa ua na o le Atua lava e toatasi na te aumaia lea poto po o le atamai i so o se tasi.

Fa'ataoto 3:21-22 E foa'iina e le Atua le poto ma le atamai pe a tatou saili ma le fa'atuatua e ala i le tatalo. Fa'ataoto 3:23 A tumau lo tatou ola fa'atuatua i le Atua ma fa'aogaina ma le tataua le poto ma le atamai ua foa'iina mai mo i tatou, e mafai ona tatou savavali i ona ala uma, ma le leai o ni fa'alavelave ma ni fa'afitauli e lamatiaina ai lo tatou nei ola taumafai mo Ia ma lona finagalo. Fa'ataoto 3:24 O le tagata ua tumau i le poto ma le atamai mai le Atua, e maua e ia le filemu i lona loto, na te mautinoa foi ana galuega lelei o lo o ia fa'atinoaina e auala mai ai ona manuia. Na te iloa foi ona tausi le la va fesootai ma le isi uso a tagata aemaise lava lo la va ma le Atua.

Fa'ataoto 3:25-26 O le ola fa'atuatua i le Atua e maua ai lagona o le mautinoa o lo'o saogalemu ma malutia le ola i aao paia o lo tatou Atua.

O le fa'avae lenei na saunia e le Atua mo ona tagata, e ala lea i le auina mai o lona Alo e toatasi, o Iesu Keriso. O lona maliu

ma lona toetu manumalo mai le oti ma le tuugamau, ua fa'asaoaina ai le lalolagi agasala. Le fa'avae lea na saunia e le Atua ina ia tatou fa'atuatua ma talia Iesu Keriso e fai ma o tatou Alii ma Faaola. O lona atamai lea ua fai ma fa'avae tatou te maua ai le ola fa'avavau pe a tatou talia lana fa'aolataga i le loto atoa ma le fa'atuatua ua moni..

GALUEGA FAATINO

Tu'u le avanoa i le vasega e fa'asoa mai ai lo latou malamalama i le uiga o le "*Atamai e fai ma fa'avae*" le mataupu mo lenei Aso Sa. E mafai fo'i ona latou aumaia ni fa'ataitaiga, pe fa'asoa mai fo'i e ala lea i le si'osi'omaga o lo o i ai – aoga, fale faigaluega, aiga, nuu, atunuu ma le Ekalesia

PESE: 8 Pese ma Viiga

A'OA'OGA:

1. O le atamai o le faavae lea o se manuia mo soo se tagata
2. Na faia e le Atua le lagi ma le lalolagi i lona atamai
3. Ua na o le Atua na te mafai ona toe faaleleia le lalolagi malepelepe
4. E manuia fanau, aiga, nuu, se atunuu ma se Ekalesia pe a faavae i le Atua
5. E le taumasina se tagata ma le mamalu silisili ese o lo tatou Atua.

.....

ASO SA: 1 NOVEMA 2020

MATAUPU: PUAPUAGA MA LE FAAMOEMOE
(Suffering and hope)

SINI: Ia malamalama le vasega i le tāua o le faatuatua i le alofa tunoa o le Atua e ala ia Iesu Keriso. Ma po o le a foi se tāua mo tatou le au Kerisiano.

TUSI FAITAU: Roma 5:1 – 11

FESOASOANI MO FAIAOGA:

O le tusi a Paulo i le Ekalesia i Roma o se feau tauologologo i tagata Kerisiano Iutaia (*Jewish Christians*), faapea foi Kerisiano Eleni (*Gentile Christians*), ua ta'uamiotonuina (*justification*) o tagata uma I le faatuatua.

O le faatuatua o le talitonu i mea e le o vaaia. O lou faalagolago i le agaga o le Atua na te fesoasoani mai i so o se mea e te faia. O le toomaga foi lea o le tagata Kerisiano ina ua iloa lona potu ma lona malosia e le atoatoa, e faamoemoe pe faalagolago i le agaga o le Atua na te faatutumu ma fa'aatoatoa mea o lo o avanoa i o tatou tagata faatauvaa. E leai lava se isi ua na vaai i le Atua. Aua o le Atua e leai se tino, a o le agaga lava ia.

E faamamafa lava e Paulo lo tatou va tapuia ma le Atua. O le agasala o le tagata, na mafua ai ona motusia ai lo tatou va ma le Alii. Ua oti le agaga ona o le agasala. Sa leai se faamoemoe i le tagata ma ana mea e fai. Peita'i, o le Atua o se Atua e tuu avanoa. Ua leva ona faataatia lana polokalame mo le lalolagi atoa. O le faamoemoe, o le auina mai lea o lona Alo pele o Iesu Keriso i le lalolagi, ina ia le fano se tasi e faatuatua ia te ia, ae ia maua e ia le ola e faavavau.

O le alofa tunoa lea o le Atua (*Grace of God*), o le alofa e le faatua'oa. O le alofa e mutimutivale. O le alofa e mo tagata uma. O lona alofa tunoa lea ua uma ona faatino i le maliu ma le toe tu o Iesu Keriso, mo le faaolataga o le lalolagi atoa.

Lea e fa'amamafa ai e Paulo le fa'atuatua o le tagata i puapuaga o Keriso. E tatau ona olioli le tagata Kerisiano i fitā ma tīgā e fetāia'i ma ia i le ola nei, aua ua toilalo e Iesu le oti e ala i lona toe tu manumalo. O le feagai o tatou ma fita ma tiga o le ola nei,

e malosia ai foi le loto o le tagata. E faatupu tele ai foi le onosai o le tagata talitonu. O le onosai foi lea o le tagata, ua malosia ai foi le mautinoa i le alofa tunoa o le Atua mo ia (*hope*). E pei ona onosai lo tatou Alii Faaola i le tauemuga ma le inosia e tagata. Ae na manumalo lava i le agasala a le lalolagi.

O le fa'amoemoe lea na auina mai ai e le Atua lona Alo i le lalolagi, ina ia toe fa'aleleia (*reconcile*) lo tatou vā tapuia ma le Atua. O le avanoa paia lea mo le loto o le tagata ua na talia Iesu Keriso ma fa'atino le tulafono o le alofa i tagata uma.

O le faatuatua o le tagata i le alofa tunoa e ala ia Iesu Keriso, e tupu ai le agaga o le alofa i tagata uma. O le alofa e mafua ai ona onosai le tagata, e tupu ai foi le mautinoa i le faamoemoe ua tuuina atu e le Atua i le tagata. O le a lea faamoemoe? *O LE OLA*. O le agaga o le tagata na oti ona o le agasala, ae o lea ua ola ona o Iesu Keriso.

GALUEGA FAATINO: Taligā Fesili

1. Pe fa'apefea ona tatou fa'aleleia lo tatou vā tapuia ma le Atua?
2. Pe fa'apefea ona tatou manumalo i fita ma tiga o le ola nei?
3. O le ā le aogā o lou feagai ma fita o le ola nei?
4. Fa'amatala mai se taimi o lou olaga sa e lē mafai ai ona e onosai i se mea. Ae pe fa'apefea ona e lavātia lena faafitauli?

PESE: 47 (O le na alofa fua mai) Pese ma Viiga

A'OA'OGA:

1. Ua ta'uamiotonuina uma i tatou i le faatuatua
2. Ia pulea lou loto pe a oo mai fita ma tiga o le ola nei.
3. O le onosai i puapuaga o le ola e tupu ai le mautinoa ma le faamoemoe

ASO SA: 8 NOVEMA 2020

MATAUPU: VALA'AUINA O IEREMIA
(*Jeremiah's call*)

SINI: Ia malamalama le vasega i le tāua o le vala'auina mai le Atua. Auā o le Pule Aoao a le Atua ua ulua'i tofia ai le tagata e fai ma avefeau mo lana Tala Lelei.

TUSI FAITAU: Ieremia 1:1 – 10

FESOASOANI MO FAIAOGA:

O le mataupu lenei o lo o faamatalaina ai le amataga o le valaauina e le Atua o Ieremia, e fai ma ana perofeta. O le vala'auina paia po o le *divine calling*, e lē o se galuega a le tagata. O le galuega lenā e patino lava i le Atua soifua.

E 3 vaega o le vala'auina o Ieremia o lo o fa'amatala mai i le fuaiupu 5 e fia fa'ailoa.

1. **O le Folasaga** (*Forming*) – O le amataga lenei o le galuega a le Atua i le fofoaina o le tagata e fai ma ana 'ave feau. E pei ona silafia e le Atua ia Ieremia ae le'i faia o ia i le manava a lona tinā. O le mana Silisili 'ese lea a le Atua, ina ua mae'a ona fa'ata'atia le polokalame i le faia o le tagata. O le Atua foafoa lava ia. Ua uma ona tu'u matāmaga e ia mea uma na Ia faia.
2. **O le Fa'apaiaina** (*Consecration*) – A o'o ina mae'a ona fa'ata'atia e le Atua ia fuafuaga o mea uma na ia faia. Ona fa'apaia lea e le Atua mo se faamoemoe ua atofaina i le lumanai. O le faapaia lea ina ia manuia ona faiva. Ma o le faailoga lea o le mafutaina o le Agaga Paia o le Atua

i lea tagata. Ae lei fanau Ieremia, ua faapaia e le Atua o ia e fai ma perofeta mo le toe lavea'iina o tagata Isaraelu. O le uiga o le 'fa'apa'iaina', o le tu'u'ese'eseina lea o le tagata ua fuafua i ai le Atua, e fai ma ana ave feau. O le tagata lea, ua ese le tulaga i totonu o le sosaiete. E le o le maualuga i le vaai o tagata, ae o le maualuga i le silafaga a le Atua foafoa. O le tagata foi lea ua fai ma sui o le Atua (*God's Advocate*).

3. **O le tōfiga** (*Appointing*) – O le Pule Aoao lea o le Atua i mea uma i lugā ma lalo nei. O le taimi lea ua faailoa ai e le Atua, e ala i lona Agaga Paia, i le tagata ua tofia e fai ma ana auauna ua faapaia mo le galuega ua atofaina e le Atua. Lea na tofia ai e le Atua Ieremia e fai ma perofeta i le nuu.

O lagona sa oo ia Ieremia, o lagona faaletagata. Ina ua fai atu i le Atua, e le mafai ona fai se tala, ma o ia foi ua na o se tama itiiti (v6). O iina tatou te iloa ai le malosi faaletagata, ma le malosi aoao a le Atua. E le faatusalia. E papa'u le vaai a le tagata, ae mamao lava le silafaga a le Atua.

Ua iloa e Ieremia e le faigofie le galuega faaperofeta o le a feagai ma ia. Aua o le a feagai ma le tele o tagata e pei o tupu, o le a matua tete'e ia te ia ma le feau. O lea na fa'amalosi e le Atua o ia ma faatonu ia te ia, ina ia aua nei fefe, aua o le agaga o le Atua o le a mafuta ma Ieremia (v7-8).

O le uiga lena na valaau ai e le Atua ia Ieremia e fai ma perofeta, ina ia toe faatulaga lelei le fanauga a Isaraelu. Ma ia ta'u atu le faamasinoga a le Atua ia te i latou ona o le loto tetee, faapea foi Asuria ma Papelonia i lo latou loto faamaualuluga (v10).

GALUEGA FAATINO: Taligā Fesili

1. O le a le uiga o le valaauina a le Atua ia te oe?

2. Pe faapefea ona e iloa ua valaauina oe e le Atua.
3. Afai e valaauina oe i se tofi, o ai e e faamoemoe i aim o se fesoasoani?

PESE: 179 (O oe lo matou nei Alii)

A’OA’OGA:

1. Aua nei e masalosalo i le alofa a le Atua
2. Ia e malamalama o le vala’auina mai le Atua e le faigofie.
3. Ia tumau i le loto maualalo ma le agamalu e te iloa ai le Atua e afio i le mea lilo

.....

ASO SA: 15 NOVEMA 2020

MATAUPU: FA’AATOATO A E LĒ NA FAIA I TATOU (*Made perfect by our Maker*)

SINI: Ia malamalama le vasega o le Atua o le fai ipu omea, a o tatou o le omea. O le Atua na faia le tagata ia atoatoa. Ae o le tagata ua fa’atamala i lea tulaga.

TUSI FAITAU: Ieremia 18:1 – 11

FESOASOANI MO FAIAOGA:

O le fai ipu omea o se galuega ua masani ai tagata i Mesopotamia ma nuu i le itu o le Metitirani. O ipu omea e fa’aaoga e teuteu ai fale, aemaise o maota o alii taua e faaaoga e tuu ai meaai i totonu, ma utu ai vai. Ma le tele o isi mea sa fa’aaogaina e tagata i aso anamua.

O lima a le fai ipu omea e fa’aaogaina e faalāmolemole le omea ina ia ata mai pei o se ipu telē. Ina ia ‘aua nei leaga, pe patupatu, pe i ai foi ni ‘omo’omo o le omea. Ina nei faalēaogaina.

(verse 1-4) O le agaga o le Atua sa faamatamata ai Ieremia i le galuega o lo o faia e le fai ipu omea. Ina ia faailoa ia Ieremia o mea o le a tutupu i le nuu a le Atua o Isaraelu. Ma ia faailoa ai foi ia Ieremia o le Atua o le fai ipu omea (*Potter*), ae o Isaraelu o le omea (*Clay*). O le ipu na leaga i le fai ipu omea, e faatusa lea i le faasalaga a le Atua i lona nuu. Ae peitai, o le alofa o le Atua na te tuu avanoa i lona nuu faigata. Lea e faatusa i ai le ipu na toe faia ia lelei.

(verse 5-10) Ua faamaonia e le Atua lana afioga ia Ieremia. E tausia e le Atua lona nuu o Isaraelu. O aao a le Atua na te laveai ia te i latou. Na faalamolemole ma fofoa e le Atua lona nuu ia atoatoa ma lelei. Peitai ane, o loto a Isaraelu ua maaa tele. Ua le iloa e le omea le fai ipu omea. Afai e usitai Isaraelu ma liliu ese mai o latou sese i luma o le Atua, e faasaoina i latou. E le ta’e foi le ipu omea. Ua tuu e le Atua le avanoa ia Isaraelu e salamo ae lei oo i le taimi e faatafunaina ai le aai o Ierusalem. Afai foi e le mafai ona latou liliu ese mai o latou sese, o le pule Silisili ese a le Atua (fai ipu omea) e faamuta ai le faamoemoe sa fuafua e le Atua e totō i Ierusalem pe a mae’a le tafeaga.

GALUEGA FAATINO: Taligā Fesili

1. Afai na faia e le Atua le tagata ia atoatoa ma lelei, aiseā ua tutupu ai taua ma fevaevaea’iga i lenei lalolagi o lo o tatou ola ai?
2. Ta’u mai pe i ai se eseesega o le galuega a le fai ipu omea ma le tufuga fai u’amea (Potter and the Blacksmith)? Ae po o le a foi se taua o mea ia e lua?
3. Ae po o le a foi se mataupu silisili o na mea e lua e faatatau i le tagata?

- PESE:**
1. Have thine own way Lord
Have thine own way
Thou art the potter I am the clay
Mold me and make me
After Thy will
While I am waiting
Yielded and still
 2. Have thine own way Lord
Have thine own way
Search me and try me Master today
Whiter than snow Lord
Wash me just now
As in Thy presence humbly I bow.

(O le pese lenei e fa'aaogaina ai le fati lea e masani ona ao ai le foai i totonu o le sauniga – Pese 158)

A'OA'OGA:

1. O le Atua o lo tatou fai ipu omea.
2. O le Atua o le Pule Aoao i mea uma lava. E pule toatasi lava ia. E leai lava se mea i lugā i le lagi ma lalo nei e tusa ma ia.
3. O le Atua o le foafoaga.

.....

ASO SA: 22 NOVEMA 2020

MATAUPU: TOE AMATAINA (*Beginning Again*)

SINI: Ia a'oa'o le vasega ina ia malamalama i le alofa tulituliloa o le Atua

TUSI FAITAU: Ieremia 30: 1-11

FESOASOANI MO FAIAOGA:

O se vaega o le fuaiupu e 10 o le mataupu e 30: 1-11 ua fai nei ma autu o le tatou mataupu i lenei Aso Sa, e faapea; “O oe foi, Iakopo e, la’u auauna, ‘aua e te fefe, olo’o fetalai mai ai le Ali’i; ‘aua foi e te mata’u o oe Isaraelu e, aua faauta, ou te faaola ia te oe ai le nuu mamao, ma lau fanau ai le nuu ua tafea ai i latou;” O le mataupu e 30-33 i le Tusi o Ieremia i le fa’ata’atiaga o le Tusi o lo o taoto ai le valoaga i le toe fo’i o le nuu o Iuta. O lea o le a sauni le nuu e a’e le tafeaga, o le ala lea o le faamalosi a le Perofeta i le nuu o le Atua, i lona tulai mai i le tofi faa Perofeta. O le upu moni lava, e le itiiti tiga o loo feagai ma le nuu o le Atua, aua foi, o lea ua aumau i nuu ese, ua ola pologa i pulega a le malo Papelonia, ua faoa le aiatatau ma le ola saoloto o le tagata ma ua faitauina faatasi ma mea totino a le malo tele. Ae a tuu foi i Ieruselema, o le mea lava e tasi. Ua soloia le malo, ua faatafunaina mea uma, o le malumalu ua malepe ao mea paia ua lotea ma aveesea e tagata.

Le tafeaga la lea na lagona ai e le Isaraelu le leaga o le ola le faamaoni, ao i foi na latou iloa ai, le toasa o le Atua, ae lei mavae foi lona alofa ia te i latou. Po o fea lava e agai iai le tagata, e faapena foi ona i ai faatasi ma le Atua. Po o le a foi le leaga ma le faigata o le tagata, e le mafai lava ona aveesea ai le alofa ma le agalelei o le Atua. A le vaega o le tusi lea na tatou faitauina, le alofa ma le agalelei o le Atua lea ua aliali mai, “O oe foi, Iakopo e, la’u auauna, aua e te fefe, aua foi e te mata’u o oe Isaraelu e; aua faauta, ou te faaola ia te oe ai le nuu mamao, ma lau fanau ai le nuu ua tafea ai i latou; e foi mai lava Iakopo, e totoa foi o ia, ma nofo filemu, e leai foi se tasi e faamatau ia te ia.”

O le fa’amalosi ‘au ma le fa’alototele a le perofeta ia Isaraelu e lotototele ‘aua le fefefe. O le feagaiga a le Atua e tumau lea i luga o Isaraelu ma lana fanau. E ese le maua luga ma le maoae o le alofa tulituliloa o le Atua i lona nuu, e tiga lava ona faalogogata ma le usitai le Isaraelu, ae le mafai ona taofia ai le agalelei faifaipea o le Atua. E le gata ina faatafea ma fa’aaunua,

a o lea foi ua toe fa'aae ma faafoi. E le gata ina aoai ma faatonu, "aau ua ou taia oe i le ta a le ua ita, ma le aoaiga a le ua saua, ona o le tele o lau amioletonu; ua faateleina au agasala, o le mea lea na ou faia ai ia mea ia te oe."

Le fanau e, ou te talitonu, o se faamanatu lelei foi lea mo i tatou. E le mavae le alofa o le Atua ia te i tatou, lona alofa lea na te lavea'i ai ia te i tatou. Afai na sese le amataga o lau filifiliga ma le gasologa o feau ma galuega o lenei tausaga, o le taimi nei manu o maua lo ta avanoa e toe faufau ai le sa o lau folauga. Vaai po o a ni mea o faaletonu, e toe faalelei. Toe fonofono ma ooloo pitova'a faatasi ma le Atua; aua o le Atua lava na toe amataina, le faaolataga e ala i le afio mai o Iesu Keriso i le lalolagi ma faaola le lalolagi agasala.

GALUEGA FAATINO: Taliga Fesili

1. O ai Iakopo olo'o ta'ua i le tala?
2. O a foliga vaaia o le matata'u o Isaraelu lea e faatusa i ai e le perofeta o Ieremia?
3. Aisea ua fa'atafea ai le nuu o Isaraelu?
4. E fapefea ona toe amataina lou ola na masofasofa ona o le agasala?

PESE: Pese ma Viiga 73 (E le alofa o Iesu)

A'OA'OGA:

1. E le mavae le alofa o le Atua i luga o lana fanau
2. 'Aua le fefe, 'aua le popole e i ai le Atua i so'o se mea
3. Ia faatuatua i le Atua ma le loto atoa ma le agaga

.....

ASO SA: 29 NOVEMA 2020

MATAUPU: MAUGA PAIA O LE ATUA
(*God's holy mountain*)

SINI: Ia a'oa'o le vasega ina ia malamalama o le mauga paia e afio ai le Atua, tatou te molimauina ai lona mamalu silisili ese.

TUSI FAITAU: Esoto 19: 10-25

FESOASOANI MO FAIAOGA:

E i ai le talitonuga a tagata Eperu fai mai, o le mauga o le mea paia e afio ai le Atua. O le mauga o le afioaga o le Atua, lea e pepese ai le 'au fatu solo Eperu i Salamo o le mauga o le Atua o le faatusa o se mea maua luga e afio ai le Atua. Peita'i e molimau nisi o tagata sutesue o le Tusi Paia, o le mauga paia ua faatusaina o le malumalu o le Atua. O le fuaiupu e 20 ua fai nei ma autu o le mataupu, lea e faamatala e le Tusitala, ona afio ai lea o le Alii i luga o le mauga

O le ata vaaia o le Atua e auai (*Omnipresence of God*) lea ua faatusaina ai le mauga paia o le Atua lea na fetaia'i ai ma Mose. O le mataupu e 19 o le tapenaina o Isaraelu ma lo latou faamamaina. Aua o lea o le a tuuina mai Tulafono e limataitaiina ai le nuu o le Atua. I le ma lea, ia faatumauina pea le Feagaiga a le Atua ma lona nuu, o Tulafono ia o le a tuuina mai, ina ia taitaiina ai Isaraelu ma ia iloa ona mulimuli ma matata'u i le Atua. Le Feagaiga lea na faamausali i luga o le mauga paia o le Atua, lea na ia valaau ai ia Mose e alu ifo i luga o le mauga o Sinai.

O faailoga e iloa ai le mamalu silisili ese o le Atua, ua emo uila ma papa faititili, o le ao uliuli ma le pu ua matua tele. O mea ia na molimauina e Isaraelu na tupu a'e ai le fefe ma le matata'u, ma o latou iloa ai o le mauga paia o le Atua e iloa ai ua afio le Atua i le mea nei. E tatau i le Isaraelu ona matatau ma faia le

finagalo o le Atua, o taimi foi ia e lagonaina ai e le tagata le valaau mai a le Atua. O le valaau a le Atua ia Isaraelu, ae o lo o nofo sauni ma ola tapenapena.

Lea e fai mai Mose, ia outou nofo sauniuni i le aso i e lua. E faapefea ona sauni? Lea ua ia faamalosi i le nuu o Isaraelu ina ia 'au nei tou o ane i a outou ava. O le ata vaaia o le agasala ma tuinanauga o le olaga o tagata Isaraelu. A o le faamalosi a le taitai o le nuu, ia ola faamamaina le nuu o le Atua; 'aia nei o i luma o le Atua ma le agasala. O le mauga paia e afio ai le Atua, e manaomia le alu ma le loto atoatoa male loto ua faamamaina, 'aia nei o tatou o masalosalo.

O le faamalosi foi lea i le tatou vasega, ia o tatou lagonaina le mamalu silisiliese o le Atua. Tatou te iloa ai foi ona ola matataua ma faia pea lona finagalo, ma fultua mai ile leaga sa o tatou faia. Lea ua a'oa'oina i tatou, o le mauga paia o le Atua o le fa'aaliga foi lea o lona mamalu silisili ese. O Iesu Keriso lava ia, na ia saunia le faaolataga mo le lalolagi agasala. Na tu mati'e lava lana taulaga ofoina i luga o le Mauga o Korokota, ina ia faaolaina i tatou uma pe afai tatou te salamō faamaoni.

Uiga o Upu:

- i) Aso i e lua: o le aso tolu pe mafai foi ona faapea o tala atu taeao.
- ii) Faasiosioina: faataamilo
- iii) Papa'i: e i le vaega o le numera tele, sau mai le upu pa'i / tago
- iv) Tumutumu: taunuuga po o le tini. O le vaega pito i luga o le mauga

GALUEGA FAATINO: Taliga Fesili

- 1. O a faailoga tatou te iloa ai le Atua auai pei ona taua mai le tala?
- 2. I lau faitau o oe o le tama ma le teine Aoga Aso Sa, aisea ua afio ai le Atua i le mauga?

3. O le aso fia na afio ifo ai le Alii i le Mauga o Sinai?

PESE: Pese ma Viiga 11 (O lou mamalu le Alii e,)

A'OA'OGA:

- 1. E auai le Atua i so o se mea
- 2. Tatou lagonaina le matata'u pe a feagai ma le mamalu silisili ese o le Atua
- 3. E ofoofogia mea e faia e le Atua mo i tatou uma

.....

ASO SA: 6 TESEMA 2020

MATAUPU: E LĒ I AI LE ALII I LE MAFU'Ē
(The Lord was not in the earthquake)

SINI: Ia a'oa'o le vasega ina ia malamalama i mea ofoofogia e faia e le Atua mo i tatou

TUSI FAITAU: 1 Tupu 19: 9-18

FESOASOANI MO FAIAOGA:

O le vaega o le mataupu sa faitauina, ole fesagaiga a Elia ma le Atua, fai mai le molimau a nisi o tagata iloga o le Tusi Paia e foliga e faapena foi le fesagaiga a le Atua ma Mose na ia iloa ai i le laau talatala. Peitai i le vaaiga sa vaaia e Elia, o se vaaiga e matua matautia tele, o le valaau a le Atua ia te ia ao ia nofonono ai i totonu o le ana. Lea ua sola mai Elia mai ia Iesepela ma ia lafi ai i totonu o le ana, ona valaau ai lea o le Atua. Silafia lelei e le Atua le fefe ma le palaai o Elia, o le ala lea o lona sola ma nofo i totonu o le ana.

A o le fuaiupu e 11 o le mataupu sa o tatou faitauina ua fai ma autu o le tatou faitauga i lenei taeao, o le fa'aaliga lea o le silisili ese o le Atua. Aua e ofoofogia mea e faia e le Atua mo i tatou,

lea na ia fetalai ia Elia e sau i fafo ma tu i luga o le mauga ma ia molimauina ai le ofoofogia o mea na faia e le Atua. Fai mai le tala na vaaia e Elia le matagi tele ma le malolosi ua faaumatia ai mauga, faapea le mafuie tele ua luluina. A o le molimau a nisi popoto o le Tusi Paia, a o’o ina tutupu mea o le natura o mea e le o’o i ai le malosi ole tagata o taimi ia e iloa ai le auai ole Atua.

Peitai o le autu o lenei aso “E le i ai le Alii ile mafuie”, afai la o le tutupu o mea faalenatura ole faailoga lea o le auai o le Atua, ona fesiligia lea o le manatu autu o lenei aso. E foliga e le’i auai le Alii ile mafuie e tusa o le tala sa faitauina. A o le uiga loloto lea o afioga a le Atua, o le fuaiupu sa o tatou faitauina o i tonu na molimauina ai e Elia le ofoofogia o mea na faia e le Atua lea na ia vaai i ai. Ae fai mai le tala ina ua ia vaai i ai, ona lagona lea o lona fefe tele. O lona uiga a oo ina feagai le tagata ma le mamalu o le Atua, e le mafai ona ia vaai i ai, aua e leai se tasi e mafai ona ia vaai i le Atua.

Le ala lea o le manatu autu o lenei aso, o le faailoga na faia e le Atua ia Elia ina ia iloina o le Atua lava e ofoofogia ma silisili ese lona malosi. O le fesili e luitauina ai i tatou le fanau, ana faapea e i ai le Alii i le mafuie na vaaia e Elia, o le a se mea e oo ia te ia? E mautinoa o le oti lava le iuga. Aua e le mafai e se tagata ona ia pale feagai ma le Atua, e faapena foi i le tala ia Mose i le Tusi o Esoto i le fa’aaliga na ia iloa i le laau talatala. Na o le siufofoga na lagonaina e Elia, o le uiga foi lea o lenei aso “E le i ai le Alii i le mafuie” (humanity form) o le vaaiga faaletagata, ma mea na vaaia e Elia. A o le itu faaleagaga (God in Spirit) o le mea na e le iloa e Elia, aua e le mafai e se tasi ona ia vaaia le Atua

O le faamalosi foi na mo le tatou vasega i lenei taeao, e ofoofogia lava mea e saunia e le Atua mo i tatou. A o mea foi ia tatou te iloa ai lona mamalu ma lona malosi; aua e i ai taimi e gata mai ai le malosi faaletino o le tagata, mulimuli ane o le Agaga o le Atua e na te faatupu lo tatou malosi. O Iesu Keriso la tatou uo sili na ia saunia le faaolataga mo le lalolagi atoa, ina ua maliu ma toetu manumalo mai le oti ma le tuugamau o le

taulaga ofoofogia lea ua ia faia mo i tatou pe afai tatou te salamo faamaoni.

GALUEGA FAATINO: Taliga Fesili

1. O a faailoga na iloa ai e Elia le mamalu silisili ese o le Atua?
2. Aisea na sola ai Elia i le ana?
3. E mafai ona e faamatala se mea ofoofogia na fai e le Atua i lou olaga?

PESE: Pese ma Viiga 224 (Le masalosalo ia tia’i ai)

A’OA’OGA:

1. E ofoofogia mea e faia e le Atua i lo tatou ola
2. Tatou faamoemoe i le Alii i taimi uma
3. E le feagai le tagata ma le mamalu silisili ese o le Atua
4. O le Atua e pule aoao i mea uma o le foafoaga na Ia faia.

.....

ASO SA: **13 TESEMA 2020**

MATAUPU: **APEFAI A IAKOPO**
(Jacob’s ladder)

SINI: Ia malamalama le vasega, o le fa’aaliga ua iloa e Iakopo i lana miti, o le Atua lava lea ua fesotai mai ia te ia mo se faamoemoe lelei.

TUSI FAITAU: Kenese 28: 10 – 22

FESOASOANI MO FAIAOGA:

O le valaauina o Iakopo e lona tama o Isaako, o se lagona lea ua tupu a'e i le tamā, ina ua matua pipii atoatoa atu sona manatu, i le lagona o i le loto o le tinā o Repeka. O le au faatasi o i la'ua, ina ia tuua e Iakopo lo latou aiga, ae malaga atu ma aumau i le aiga o lona tinā i Patanarama, o se gaioiga foi e ao ina tulimata'ia e i tatou o le au faatuatua, pe afai tatou te tulimata'iina le faasologa ma fuafuaga potō a le Atua ia Iakopo. Tatou te iloa ai iinei, se fetaiiaiga e lei mafaufauina, ua fa'aalia ai le natura mata'utia o le Atua.

Afai na valaau Isaako ia Iakopo ma faamanuia ia te ia a'o lei malaga ese ma le aiga, o lona uiga o se malaga e tapua'ia ma auai le Atua i taimi uma. E ui lava o le faamamafa o i fautuaga faamavae a Isaako i lona atalii, o le vaioia lea o Iakopo mai le faiavā atu i se fafine o nuu ese (Kanana), peitai na matuā faateia Iakopo, ina ua matua aveesea e le Atua le ie pupuni oi le va o le lagi ma le lalolagi, ma faailoa atu e le Atua lona paia atoatoa ia te ia. O le Atua paia e le ma faamatalaina e se tasi, e i ai i so o se vaipanoa o le foafoaga, ma e maoo'e mea na te faia, e liliuina ai le ola o le tagata ua talitōnu ma faatuatua ia te Ia. Le Atua lea na manino ma atoatoa lona faailoa atu ia Iakopo, o ia lava o le suli o le folafolaga (the heir of the promise)

O le tuua e Iakopo o lona aiga, e foliga o se malaga e lē alofagia i le vaai faale-tagata, pe a fua i aga faa Isaraelu i le va nonofo ai o matua ma fanau, o fanau foi i le faasologa o le olaga faataoto e ao ina faasolo i ai. Na faoa e Iakopo le tofi o le ulumatua mai lona uso o Esau. Na ia maua foi faamanuiaga ua na o Esau e agavaa i ai e tusa ma tu faa-Eperu. Peitai, e ui lava ina alu ma le manatu fefe nei tuliloa mai lona uso taulamalama ia te ia, ae na ia filifili lava e alu toatasi i se ala fou ina ia faateleina se mamao e savali ai, e ui i ni tulaga mata'utia o le a la feagai i le ala.

Na faamalosiā le savali a Iakopo ma taunuu ai le savaliga i le nuu o Peteli (Lusa), tusa lea ma le 60 maila mai Peresepa. Na ia avane ni maa e fai ma ona aluga ma malolo ai i lea mea, auā ua oo mai le po.

O iina na faia ai lana miti. O le fa'aaliga na ia iloa, o le apefai ua faatuina i le elelee, ua oo lona iu i le lagi, o agelu foi a le Atua ua a'ea'e ma ifoifo ai. O se ata faatusa ua i ai le saolotoga ma le mafanafana, o le faamalosiā'u foi ma le ola mautinoā i le solaaga toatasi a Iakopo, ua le gata o mea ua tutupu ia te ia i le taimi nei, ae o se faamoemoe foi lea mo ia i le lumana'i. O ona mafauauga sa i ai, e tataua ona feagai o ia ma tiga auā ua tuuaia lava e ia ia lava ua mafua ai lana tafeaga. Peitai e maualuga lava i le manatu o Iakopo, ua faamalo mai lona tamā ia te ia, ae faasili i sona lagona le mata'u i le Atua. O le mea moni lava o le ola popole ma lagona faavavau o le loto, e gafatia lava e le Atua ona soloia mai i le tagata mafatia, ua faatuatua ma tumau lona faamoemoe ia te Ia. O le aveesea o le fefe o Iakopo ma ia soloia le ola lē mautonu o lona mafaufau, o le feau lea mo ia o i le apefai tele na amata mai ia te ia i le lalolagi, i le afioaga o lona Atua i le lagi.

O le ata o le tausiga faia pea a le Atua mo le ola o le tagata i aso uma, ae faapea foi i e ua moomia i se taimi e feagai ai ma faigata. Le tausiga lea a le Atua o lo o faataunuuina i lo tatou lalolagi, e ala i le feau taulogologo a ana agelu. E le gata i lena, ae o le uluai faatusa foi lena o le liutino tagata, o le Upu o Iesu Keriso, na mafai ai ona toe sosoo faatasi le lalolagi agasala ma le lagi, le afioaga faavavau o le Atua.

Na toamalie le loto o Iakopo, ina ua ia iloa le faamoemoe o le Atua mo ia, i lenei fa'aaliga, auā na i ai lava le Alii i ona luga. O le siufofoga paia na ia faalogoina mai le Alii, o le folafolaga lava lea mo ia i le faafouina o le Feagaiga, auā ua sosoo atu o ia i lona tamā ma le tamā o lona tamā. E puipui le Alii ia te ia, na te saga faapaiaina o ia ma faamalosiā i lona mafaufau ma lona loto.

O le feagaiga a le Atua na folafola ia Aperamo ma Isaako, o lea foi ua ofoina atu ia Iakopo, auā na tauivi lava o ia ina atia'e se fesootaiga mautu ma lona Atua. O se faasinoga foi lea mo i tatou, ina ia i ai pea o tatou foi fesootaiga ma le Alii. E lē lava lo tatou fesootai atu ia te Ia, i le na o tala ofoofogia o Kerisiano

tatou te faitau ai i tusi i o tatou aiga. Peitai ia tatou faatuatua i le Alii i taimi uma o le ola, i le sololelei ma le faigata.

Na ala Iakopo i lana moe, ma ia faapea – “E moni lava e i ai le Alii i le mea nei, ae ou te le iloa.” O le gagana ua i ai faatasi ma faalogoga i le mafaufau o le tagata ua faatumulia e le loto maofa ma le paia. Ua naunau foi i le faamaoni ma le agaga o le faafetai i le Alii. E ui lava foi i lona alu ese mai lona uso matua o Esau, ae tumau lava i le loto o Iakopo lona famoemoe, e toe foi lava i lona aiga ma le filemu, auā o le finagalo lea o lona Atua i le laueleele, na amata mai ai le aiga. O le maa foi na ia aluga ai, na ia faatuina e fai ma faailoga i le lumanai, e manatua ai pea le fetaiiga ma le Atua. Na ia liligi ifo i lea maa le suāuu, o le faailoga faa-le-tapuaiga o le faapaiaina faale-Agaga, e o faatasi ma le paia auai mai o le Atua. Ua na faaigoaina foi o Peteli i le gagana Eperu e fai ma fale o le Atua e tapuai ai tagata uma ma mafuta ai ma le Alii.

O le tatalaina e le Atua o le ie pupuni, na va ai le lagi ma le lalolagi, e ala i le apetai na iloa e Iakopo i lana miti, o le faailoga lava lea ia te ia o mea lilo ma mea paia, o i tua atu o faigata. A vaai foi i le auauna ai o Iakopo ia Lapana le tuagane o lona tinā, e matuā tumu i faigata. Peitai o le fa’aaliga i le apetai, na tapena ai lona tagata faatuatua mo so o se luitau o lona ola faimalaga e le Atua. O lona taliaina o le faaeaea a le Atua mo ia, na ia tauto ai ma folafola atu i le Alii, lona loto faagaetia e auauna ai ma faitaulaga ai mo Ia i mea sili, auā o lona Atua na feliuaina lona ola i Peteli.

Tamaiti, e tele a’oa’oga taua o i totonu o lenei mataupu:-

- i) So o se matua lelei lava, na te faatonu ma faasino fanau i mea lelei mo le manuia o lona lumanai.
- ii) O tua atu o faigata ma luitau tatou te fetaii, o lo o faatalitali mai ai faamanuiaga a le Atua mo le tagata tauivi ma faatuatua ia te Ia.
- iii) E i ai le Atua i mea uma o lo tatou ola.

- iv) O le maliu ma le Toetu o Iesu Keriso, o le taulaga lea o le faaolataga mo i tatou tagata agasala. Aua sa tatou valavala ma le Atua ona o a tatou agasala, ae ua avea le maliu ma le Toetu o Keriso, ua toe sosoo ai tatou ma le Atua. E moomia ai lo tatou salamō ma faatuatua i lona Alofa Tunoa.

GALUEGA FAATINO: Tusitusiga

Toe faamatala mai e oe i ni au lava faaupuga le tala o le tatou mataupu.

- 1. Ua alu ese Iakopo mai lona aiga ma malolo i se tasi nofoaga.
- 2. O lana miti.
- 3. O le fetalaiga a le Atua ia Iakopo.
- 4. Ua ala Iakopo na moe.
- 5. O le tautoga a Iakopo.

(Tau o le 2 pe 3 fuaiupu e faamatala ai vasega taitasi 1 – 5)

PESE: Pese ma Viiga 179

A’OA’OGA:

- 1. E i ai le Atua i mea uma.
- 2. Ia fesootai i le Atua i so o se taimi.
- 3. O Iesu ua tatou fesootai ai ma le Atua.

.....

ASO SA: 20 TESEMA 2020

MATAUPU: **FAAILOA MAI LE ALOFA O LE ATUA** (*God's love revealed*)

SINI: Ia malamalama le vasega, o le liutino tagata o le Atua i le lalolagi e ala ia Iesu Keriso, o le faailoga atoatoa lava lena o lona alofa.

TUSI FAITAU: 1 Ioane 4: 7 – 19

FESOASOANI MO FAIAOGA:

O le tatou tu latalata atu i le Kerisimasi i lena vaiaso, o se vaitau tatou te mafaufau loloto ai i le faailoa mai o le alofa o lo tatou Atua ia i tatou, e ala i le soifua mai o le Pepe o le Faaolataga. Tatou te manatunatu ma le filemu i ai, i le meaalofa sili ua aumai e le Atua mo i tatou, ina ia saunia foi tatou pe se ā tatou te mafai ona tali atu ai i le alofa uiga ese. Afai ua alofa mai le Atua ia i tatou, e faapefea ona tatou ola e faatino lea agalelei i lo tatou tau, “o i tatou o Kerisiano.”

Ia Ioane lava ia i lana evagelia ma isi ana tusi, ua ia faamatalaina ai ma faamalamalama mai, ni lagona loloto i le uiga o lona alofa mo i tatou. Afai ua mua’i alofa mai le Atua ia i tatou, e tatau foi la ona tatou faapea ona alolofa atu ia te Ia, aemaise le fesootaiga ma o tatou tuaoi. Afai ua faailoa mai e le Atua o ia lava ia i tatou, e ala ia Iesu Keriso, o se mea lelei foi i tagata uma ona alofagia o Ia, faalogo ia te Ia ma fuafua i ai, i taimi uma o le ola. Na liliuina lava o Ia e Ia lava, e fai ma fesootaiga o i tatou ma le Atua, ma ia tatou malamalama i le uiga o lona Afio mai. Afai e Afio le Atua i le lagi, e faigata foi ona tatou faamatalaina lona mamalu ma le paia, ae po o le a lava ua finagalo ai e fai ma tagata ola, ua afio mai e fia mau faatasi ma le lalolagi lē mamā ona o le agasala? Peitai, e ui lava o le tagata soifua, lenei pepe ua fanau mai i Peteleema, e tumau pea o Ia o le Atua. O amio a

Iesu, o amio lava e iloa ai, o Ia lava o le Atua. O lona alofa faa-le-Atua ua fia faailoa mai ia i tatou, ina ia tatou ola ma le mautinoa, o le alofa lea e tatau ona tatou alolofa atu ai foi i isi tagata.

O le mea moni, ua tatou talitonu ma le mautinoa, o le alofa e taua. Ma o le Atua lava le puna o le alofa mo i tatou uma, aua o Ia lava o le Alofa, le taitai o alofa uma. O lona uiga, e mai le lagi le Alofa, e tupu pea aua e faavavau lava mo i tatou. O le alofa ua lava ma totoe mo i tatou, aua na ositulaga le Atua i lona Alo pele mo le lalolagi agasala. Lona Alo lea na afio mai ma mau mai tatou, ma na matuā fa’aali mai le uiga moni o le alofa, e tatau ona tatou ola ai. O mea uma na ia a’oa’o atu ai, ma le soifuaga na soifua ai, na molimauina ai a’oa’oga-alofa, o amioga alofa, ma faatinoga alofa i tagata. O le alofa, o le filifiliga tonu e tupu ae i o tatou loto, ina ua galue le Agaga Paia o le Alii e aumai le malosi tatou te alolofa ai, faapei o Keriso. Afai e iloa moni e le tagata le paia, le amiotonu ma le atoatoa o le Atua, ua ia te ia foi le alofa faa-le-Atua, ma ua ta’ua foi o le atalii ma afafine o le Atua.

Na faia e le Atua le tagata ina ia alofa. O lana tausiga foi i tagata, e le faailoga tagata e oo lava i tagata agasala. Ma o le ala lea o lona afio mai i le lalolagi, se ia matuā faatino lona alofa moni, e ala i lona ola ofo atoa mai, e soloia ai le leaga o le agasala ua faatamaia ai o tatou agaga ma faailoa mai le ola faavavau i lona malo alofa. Fetalai Iesu, “Aua ua faapea lava ona alofa mai o le Atua i le lalolagi, ua Ia aumai ai lona Atalii e toatasi, ina ia le fano se tasi e faatuatua ia te Ia, a ia maua e ia le ola faavavau.” (Ioane 3: 16)

Le alofa lea e ao foi ina fausia ai o tatou olaga faa-le-faatuatua i le va o i tatou ma isi tagata. Aua afai tatou te maua le fealofani ma isi tagata, ua tatou maua foi le ola ua folafolaina mai, aua ua atoatoa ia i tatou le alofa o le Atua. O Ioane, o le Aposetolo na mafuta faatasi ma Iesu. Na faalogo ia Iesu o a’oa’o atu, na savavali ma talanoa faatasi ma Iesu. Na ia molimau foi i le maliu ma le Toetu o le Alii se ia oo lava i lona afio ae i le lagi. Ui lava e lei vaai i le Atua, ae o lona mafuta i le Alii, o le

faamatalaga atoatoa lava lena o le Atua i lona tulaga faa-le-tagata. Pe afai tatou te alolofa i isi tagata, o le Atua lava lea ua na faailoa ia i latou, lona alofa ua i totonu foi ia i tatou. E oo lava i le oti, po o le ola, po o agelu, po o alii, po o e malolosi, po o mea inei ona po, po o mea atali, maualuga, loloto poo se tasi mea na faia, e le mafaia lava e ia mea ona toe faateaeeseina mai i tatou i le alofa o le Atua o loo ia Keriso Iesu lo tatou Alii (Roma 8: 38, 39). Le malosi lea o le alofa ua mafai ona tatou alolofa atu ai i le Atua, aua o Ia lava na mua'i alofa ia i tatou.

O lo tatou faamanatuina pea, o le faailoa mai o le Alofa o le Atua e ala i le pepe o le Kirisimasi i lea tausaga ma lea tausaga, o le saga fafaguina foi lea o lo tatou ola faatuatua, i le silisili ese ma le lē faatuaoia o le alofa o le Atua mo ona tagata. O le alofa ua o'oo'o i so o se itu o lana foafoaga, e pei foi ona paie lo tatou lalolagi agasala, ina ia liliuina lo tatou vaivai i tuinanauga leaga, a ia foi atu ma le loto ua salamō moni e faatuatua ai i le alofa tunoa ua faia e le Atua mo i tatou. Alofa i le Atua ma ou uso. Ia saunia tatou le fanau i le Kirisimasi i lena vaiaso fou.

GALUEGA FAATINO: Taliga fesili

Tali mai i fesili nei faatatau i le mataupu.

1. Po o le a le alofa o le Atua, o lo o tatou faamanatuina pea i lea Kirisimasi ma lea Kirisimasi?
2. O le a na mua'i alofa mai ai le Atua ia i tatou?
3. Po o le a na afio mai ai Iesu i le lalolagi?
4. Po o tatou alolofa ea i o tatou tuaoi?
5. Po o le a le alofa na o upu?

(Tali mai i au lava upu. Tau o le tasi pe lua fuaiupu)

PESE: Pese ma Viiga 139 (Lou alofa le Atua e)

A'OA'OGA:

1. Aofa i le Atua ma tagata uma.
2. Faailoa lou alofa i ou matua e ala i lau tausiga.
3. O le Atua le puna o le Alofa.

.....

ASO SA: 27 TESEMA 2020

MATAUPU: ILOAINA (*Knowing*)

SINI: Ia malamalama le vasega, so o se tasi e iloa Iesu ma faatuatua ia te Ia, o le a faapena foi ona silafia o ia e le Alii ma fesoasoani i ai.

TUSI FAITAU: Ioane 10: 11 – 18

FESOASOANI MO FAIAOGA:

O le toe mataupu o lenei tausaga mo le tatou vasega, ua aumaia ai se faatusatusaga o le leoleo mamoe lelei ma faamaoni, i le leoleo mamoe leaga ma le faamaoni. I Palesitina, o le leoleo mamoe, e matuā tuuina atu atoatoa lona ola, i le faataunuina o ona matafaioi mo le manuia o ana mamoe oi le lafu.

O se ata faatusa lea na taatele i le Feagaiga Tuai, sa ta'ua ai taitai o le nuu o Isaraelu, faapei o ni leoleo mamoe i le tausiga ma le vaavaaia o le nuu o le Atua. O le Atua lava, o Ia o le leoleo mamoe sili i e na fai ma taitai atoa ma ona tagata. O le upu 'leoleo mamoe', o lo o i ai lea ta'u, se ata o se tausiga lelei, faafaileleina ma le faaeteete, ma le tuuina atoa atu ma le loto alofa mo mamoe. Peitai, a tatou vaavaai i le galuega faa-leoleo mamoe a taitai o le nuu, sa tele lava ina tuuaia ma faitioina e perofeta o le Feagaiga Tuai, auā na pagatia ma taape atu tagata i isi talitonuga sese, ona o lo latou faatalale ma le leaga o le latou

taitaiga. Ua latou le amanaia tagata ua sese ese ona o le sese ma le lē faamoemoe atu o le latou taitaiga, i le Atua le Leoleo mamoe silisili.

O le leoleo mamoe e lamatia pea lona ola i le puipuia o le lafu, auā o lana lava lafu. E le manumanu i lona ola, ae o le ola e tuuina atu mo le ola o ana mamoe, pe afai o i ai ni tagata gaoi, faomea ma i latou ua fia faatamaia le lafu. O le leoleo mamoe moni lava, e le 'alo ma faatuai e tuuina atu le laveai mo le ola o ana mamoe ua feagai ma faigata.

O Iesu, o le leoleo mamoe silisili ona lelei. Na te tausi lelei na te iloa le taimi e sese ese ai se mamoe ma Ia saili mai ia te ia. Ua saunia foi o Ia e oti ina ia puipuia lana lafu mamoe. E sili i le Alii lona silafiaina o ana mamoe. Na te iloaina o latou uiga, ni amioga sese ua latou fai. E le gata i lena, ae o e foi ua fia o ese ma le lafu, na te a'oa'o ma faasino i latou i le nofoaga e maua i ai le vao lelei, ina ia toe maua le malosi ma le fiafia, e tumau ai le Alii le leoleo mamoe lelei. O le leoleo mamoe lelei, e galue e tusa ma lona valaauina. E avea mamoe o ni ana uo, o e ua latou fiafia i lona leo ma faalatalata pea i lo latou taitai latou te savavali faatasi ma mafuta faatasi.

O le esesega lena o le leoleo mamoe lelei ma le leoleo mamoe leaga ma lē faamaoni i lana galuega. O le leoleo mamoe lē faatuatuaina i le galuega, o le tagata lea ua faafaigaluegaina i le lafu mamoe e lē o sana lafu, ina ia maua se totogi mo lana auaunaga. O ia o le auauna ua lē galue ona o le valaauina, ae ua manatu o se ala lea e maua ai ni ana tupe se tele. O le faatau lea o i lona loto, o se totogi mai lona tiute faaleoleo mamoe, pei ona faapitoa i ai o ia. A vaai atu foi i le luko ua sau e faaumatia mamoe, ona lafoa'i lea o le lafu ae sola, ma oo ai lava ina pu'ea mamoe e le luko ma faasalalauina. O le manatu o Iesu o fia faailoa mai ia i tatou, o le tagata ua galue mo se tau, e mafaufau pea o ia ina ia tele ni oloa ma ni ana tupe, e sili lea i so o se isi lava mea. Peitai le tagata ua galue ma le alofa, e maua pea i lona loto tagata ua auauna i ai na i lo se isi lava mea. O Iesu le leoleo mamoe lelei o le na sili lona alofa i ana mamoe ina ia faasaoina. O le tagata 'lelei' o le tagata lea ua agalelei atu i isi,

e tauagafau ma tausaaafia ona uiga, e matagofie mea na te faia ma alofa i tagata i taimi uma. E fiafia ina ia soso atu ma mafuta ma isi ina ia tino e tasi, pei ona finagalo i ai Iesu.

O le tasi lea mea faigata tele o i le lalolagi e ao ina tafiese, o le ola tusitusi-lima ma le ola lē amanaia o isi tagata. Le faafitauli lea e lei malamalama i ai le au Iutaia mai lava i le Feagaiga Tuai, e oo mai i le taimi o Iesu. E talitonu lava latou, ua na o i latou lava o tagata ua filifilia e le Atua mo Ia, ae o isi tagata ma isi atunuu e le fa'aaogaina e le Alii. O tagata ese, o a latou pologa ia, o ē o le a tuueseina ma lepetiaina e le Atua i le fogaeleele i se taimi. Peitai ua fetalai Iesu, e i ai le aso o le ana taitai mai ai tagata uma ua lē amanaia e le talitonuga faa-Iutaia, ma tuu faatasi ina ia tasi le lafu i le leoleoga a le taitai e toatasi. O Iesu o Ia o le malamalama mo Iutaia ma le lalolagi uma. O lona afio mai i le lalolagi, e lē faapito-augafa i se vaega o tagata, ae mo tagata uma ina ia iloaina le Atua e toatasi ma ia maua le ola.

O le mea moni lava, ua na o Iesu Keriso e mafai ai ona tasi le lalolagi, pe afai e talia e tagata uma lana Tala Lelei i le faatuatua ia te Ia, ma soloia ai pa vaeloto o le feitagai. O se sosoo faatasi e lē faamalosia ai tagata uma i se faatasiga e tasi, peitai o tagata uma o ē faalogo, usitai ma tali mai i le valaau a le leoleo mamoe e tasi, o i latou lava ia ua faamaoni e talia Iesu Keriso, le leoleo mamoe lelei. O le tasi o le lafu, e lē faapea o le tasi le Ekalesia, tasi le faiga o le tapuaiga, tasi le puleaina o le lotu. Peitai, e faavae lea tasi mai le faamaoni ua i le tagata ia Iesu Keriso.

Sa silasila Iesu i lona soifuaga atoa, o se faatinoga o le usitai i le Atua. Na tuuina atu e le Atua ia te Ia se feau ia faia, ma sa saunia atoatoa o Ia e faataunuu lea feau, se ia oo i le iuga. O lona maliu na iloa ai, o Ia lava o le Alo o le Atua, auā na toetu manumalo mai lava i le oti. Ui lava na Ia silafia le satauro, peitai o i ai lava iina le viiiga mo lona Tamā, i le feau na tuu mai ia te Ia e faataunuu. Na ia talia mea inosia uma na oo ia te Ia, ma e lei taumafai foi Ia faasao mai lona ola mai ia mafatiaga. Na atoatoa lona loto e talia ai mea leaga uma, ina ia faasaoina i tatou ua ē ese mai lana lafu ona o le ola agasala.

O se ata ofoofogia lea o i lo tatou fesootaiga ma Iesu lo tatou taitai sili, e ao ina tatou iloaina ma manatua pea i o tatou loto. O i tatou uma o lana lafu, o lo o Ia tausia, puipuia, ma faia mea uma ina ia tatou maua le solo lelei o le ola. Ia tatou iloa foi ma le faatuatua, na matua lafoa'i lava lona ola ona o i tatou, ina ia toe aumai i tatou i le mafutaga ma Ia, auā sa tatou lē iloa o Ia ona ua tatou taase i le agasala.

O se a'oa'oga foi lea e tatau foi ona iloaina pea e tatou le fanau, a o faasolo atu lo tatou ola e fai ma tagata matua o le Ekalesia a Keriso i le lalolagi. Afai ua tatou iloa o Iesu Keriso lo tatou leoleo mamoe, na matuā tuuina mai lona ola ia faaolaina lo tatou ola agasala, ua tatau nei ona tatou iloa ona ola ma le faatuatua, e mulimuli ma faia lona finagalo alofa. Ia faaulufale o Ia i o tatou ola na te taitai tatou i le ala sa'o e taunuu atu i lona malo e faavavau.

GALUEGA FAATINO: Taliga Fesili

Tali mai i fesili nei faatatau i le mataupu

1. I le Feagaiga Tuai, o ai i latou na faasino i ai le upu leoleo mamoe?
2. O a ni uiga e iloa ai se leoleo mamoe lelei?
3. Afai o Iesu le leoleo mamoe lelei, ae o ai o faatatau i ai lana lafu?
4. Na faapefea ona faatino e Iesu, le leoleo mamoe lelei o lona ola mo mamoe?
5. Afai o i tatou o tagata o le Ekalesia a Keriso, po o tatou faataitai ea i amioga faa-Iesu, pei o le alofa, loto faamagalo, onosai, loto fesoasoani, ma isi e tele lava?

PESE: Ua ou iloa, ua ou iloaina
Ua soifua Iesu ia ita

(pese masani – Aoga Aso Sa)

A'OA'OGA:

1. Faataitai ia Iesu le leoleo mamoe sili.
2. Ia e ola mo le Alii
3. Faamaoni i so o se galuega tatou te fai.

.....

MANUIA LE KIRISIMASI MA LE TAUSAGA FOU